



THE UNIVERSITY OF
WAIKATO
Te Whare Wānanga o Waikato

Research Commons

<http://researchcommons.waikato.ac.nz/>

Research Commons at the University of Waikato

Copyright Statement:

The digital copy of this thesis is protected by the Copyright Act 1994 (New Zealand).

The thesis may be consulted by you, provided you comply with the provisions of the Act and the following conditions of use:

- Any use you make of these documents or images must be for research or private study purposes only, and you may not make them available to any other person.
- Authors control the copyright of their thesis. You will recognise the author's right to be identified as the author of the thesis, and due acknowledgement will be made to the author where appropriate.
- You will obtain the author's permission before publishing any material from the thesis.

Tariao Whitiwhitiora

A thesis
submitted in fulfilment
of the requirements for the Degree
of
Masters
at the University of Waikato
by

Te Oko Horoi Maioha Totorewa



THE UNIVERSITY OF
WAIKATO
Te Whare Wānanga o Waikato

University of Waikato

2022

Ariaa

I te tau 1875 i tiihooka tahi atu a Kiingi Taawhiao ki Taranaki ka tau ki mua ki te aroaro o Te Uahaumeene. Matua raa ko te rongomau me te rangimaaria, te kotahitanga me te aroha o teetehi ki teetehi maa roto mai i te whakapono ki te atua te whaainga i haere ai ia.

Ka tutuki i a Kiingi Taawhiao te rongomau me te rangimaaria, te kotahitanga me te aroha o teetehi ki teetehi maa te whakakotahi i ngaa ngaa koorero, ngaa hiitori, ngaa whakapapa, ngaa maataapono mai o te taioretanga o ngoo taatou tuupuna ka toopuuria ki te whakapono Tariao.

He whakapono teenei i whakaorangia e ia, e Kiingi Taawhiao maa roto mai i te tongikura, “E Ua, e toru ngaa taonga kei te kapu o taku ringa, ko te Mihinare, ko te Katorika me te Weteriana. Homai taau ka whaa. Kopi katoa ngeenei taonga i au ki te kapu o taku ringa, ka puta ko te Paimaarire.” Ko te whakapono Tariao me ngaa karakia Paimaarie ka hikitia, ka haapaingia tonu e maatou ngaa mangainga, ngaa kaiwhakapuumaui i te Kiingitanga inaa raa koia teenei te whakapono matua moo te Kiingitanga.

I teenei tuhinga whakapae ko te whakapono Tariao te taahuhu o ngaa koorero. I konei ngahere mai ai te kaupapa matua o teenei tuhinga.

“He kura Tariao he kura whakapapa, te herenga ki te whakaoranga o Waikato tangata”

Ko teenei kaupapa ka whakarukuhia maa te rangahau i te ahunga mai o te maatauranga kei aa teenei whakapono i whea. Ka rangahautia ko te whakapaparanga o Kiingi Taawhiao mai i te Kore, ki a Rangi raaua ko Papa heke iho mai ki a Hoturoa, aa, ka tau ki a ia ki a Kiingi Taawhiao inaa raa, ko ngeenei momo he mea e tauratia ana ki roto ki ngaa karakia, ki ngaa Kura kei teenei whakapono.

Ka hereherea ko Te Uahaumeene ki koneki naa, ki ngaa koorero e kitea ai maa whea i puaawai mai ai te Tariao me ngaa karakia Paimaarire. Ko te Kiingitanga me ngaana pehonga kaupapa e taapae atu ana ki te oranga o teenei whakapono maa te whakamahi i teenei whakapono teeraa ka waahia. Taea noatia ki te puutakenga mai o te whakapono ake, ngoonaa koorero, ngoona tuuranga, ngoona karakia, ngoona kura, ngoona whakamaaramatanga, tau iho mai ki te reo

tupuna o roto. Ko ngaa aupiki me ngaa auheke, te whakaraakeiora hoki i waatea mai, i whaipaanga atu ki te whakapono Tariao ka whakamaaramahia. Ka whakamutua atu me te taatari i ngaa putanga ka puta e kite ake ai me he herenga too teenei whakapono ki te whakaoranga o Waikato tangata.

Mihi

Tuu wanowano kua karakia i taana karakia ka pai.

Tuu te rangi aaniwaniwa ka pai

Tuu te rangi aawhiowhio ka pai

Tuatahi he mea tika kia taakina ake raa i ngaa whakawehi ki to taatou atua, te atua nui o te rangi. Mngoonā i ruiruia ko ngaa manaakitanga me ngaa whakaaro nui ki runga ki ahau kia amo ake ai te toki hahau koorero, e taarai neki i taku ringa tuhirau ki runga ki tooku tuhikura. E te atua, ahakoa ngai nui, ngai roa, ngai papa, i wherawherahia tonutia kia kite kooiwi. Naau i pou kia uu, naaku i uu kia mau, naa tooku whaanau i tautoko.

Ka whakamihia atu i oo taumanaakitanga e te atua. Tauwhakaaahurutia i te Kiingi Maaori e ko Kiingi Tuheitia Pootata Te Wherowhero VII. Koia raa te Taahuhu-matapu e tuu nei i toona taumata tapu. Tatu iho raa ki te huinga takapu-nui-o-rangi e tare mai naa ko ngaa pane ariki taatai whakaheke o te poo. Paimaarie te whare tapu o Te Wherowhero, otiraa ngaa pehonga tuaiwi o te Kiingitanga.

E koro Taawhiao te mauri o te maungaarongo. Ahakoa too whare kua mihia, kua whakareia keetia ki ngaa whakakai whakamaanawanawa, me whai kupu tonu ki a koe. I waatea mai ai ko te taahuhu o teenei tuhinga whakape i a koe. Naau te ora o te Tariao i ora ai. Naau te tapu o te Tariao i whakatapua ai. Naau te puukenga, i te taura, i te ngaio, i te toi, i te wheoko o te Tariao i pae mai Hawaiki raanoo. I ngeenei katao, koia teenei ka hinga, koia teenei ka hinga.

Naa te tini makehua teenei tuhinga whakapae, tuhinga roa i taea ai. Ehara naa te kotahi. Naa konaa ngaa kupu whakamiha o te ngaakau ka tiu ki te uru, ka tau ki runga ki a koe e Haki. Kei te Manutatakii, i oo aawhina, i oo tauhaapai, i oo tautoko, i oo aaki, i oo whakaaronui, koe i whakatupu i ahau ki te hua o te Rengarenga, koe i whakapakari i ahau ki te hua o te Kawariki e rohe pai ko teeneki tuhikura, nei ka mihi, nei ka mihi e Haki e.

Ka tiu hoki ko ngaku mihi ki runga ki a koe kei taku matua, Jason Kereopa teena rawa atu koe. Teena rawa atu koe i whai kupu mai ai ki teeneki kaupapa me teenei whakapono e arohanuitia ana e taaua. Ko te puaawaitanga mai o teenei whakapono naau i waha mai, mai oo

te waa o Kiingi Taawhiaio atu ki teenei waa tonu e noho nei taatou, toona hoohonutanga, toona matawhaanui, matawhaawaho, matatiketie anoo hoki. I rewa ake ai ko te puu o ngaa koorero i a koe. E mihi kau ake ana te ngaakau ki a koe. Teenaa rawa atu koe.

Ki a koe kei taku tuaakana Mahana Toka, e mihi ana ki a koe i oo homaitanga ki teenei kaupapa. E mihi nei ki a koe i koha kupu mai, i koha koorero mai, i koha whakaaro mai, i koha maaramatanga mai hoki. Ka noho mai ko koe hei taurira maaku i a koe e takahi nei i te ara takahanga e hiahiatia ana, e manakotia ana, e toominatia ana ahau kia whai. I ngeenei aahuatanga katoa e Mahana, ko aumihi teenei te rere atu nei.

He aawhina anoo i riro mai ki ahau i Te Poari manaaki o Raukawa. E manakotia ana ka noho ko teenei tuhinga whakapae hei tohu whakatutuki i ngaa tikanga taautuutu e paeheretia nei i a taatou kia kotahi. I taa kouotu haumi puutea mai, kaaore hoki he aha i tua atu i te whakahokitanga o te aroha ki a koutou. Kei taku iwi o Raukawa ki te Kokaoroa-o-Paatetere, Tangata Marae, nei ahau taa koutou mangainga e kookiritia ana, e apoapohia ana i te maatauranga hei painga maa maatou. Ko ngaa waioha teenei e topa atu nei.

Nga wai hono i te poo, kei taku kurutongarerewa, kua kore e taea e ahau teenei tuhinga whakapae ki te kore ko koe. He ahakoa ngaa pierenuku, ngaa piererangi, i whiri tonu koe i te taura whirioti o te aroha kia rena i roto i a taaua. Koia teenei e mihi nei i runga i te aroha. Ki taa taaua hei piripiri, te whakaaio o to taaua ao, Braxton Te Kawa o Kaarihi, ahakoa ka tuurangaranga a kare-aa-roto i a koe, moou hoki te tuhinga nei.

Kia mihi iho ko koe e Mother. Naau ahau i tautiaki tahi me tooku tuakana Te Ahorangi Te Rangituataka. I a maaua e tamariki nokinoki ana taea noatia ki naiane, ko koe tonu hei taituara, hei kaiwhakaahuru maa maaua i roto i te aroha mauroa. E Mother, e kore e rohe ko ngaa mihi ki a koe. Kua tutuki i ahau teenei tuhinga moou hoki te take.

Ko te whakamutunga o ngaku mihi ka tau rawa mai ki a koe kei taku Paapaa. Naau ngaa toi tupuna i rumaki ki roto ki ahau e tangata mai ai ko Te Oko Horoi Totorewa ki teenei ao nei. E kore rawa e ea i te mihi ngaa mahi nui kua mahia mai e koe mooku, aa, e mahi tonu nei, e mahi tonu nei. Ko te awhero e whakahii nei koe i teenei whakatutukitanga. Ko koe te whakatauiria e tauratia ana te tika, te pono, te aroha, te whakaiti anoo hoki. Ko koe, ko ahau, ko ahau ko koe.

Raarangi Upoko

Ariaa - i

Mihi – iii

Raarangi Upoko – v

Upoko Tuatahi: Waahia te urutapu nui

1.1 Kupu whakataki

1.2 Taku kaupapa

1.3 Paatai matua

1.4 Ngaa hua

1.5 Te takahanga rangahau

1.6 Ngaa upoko

1.7 Ngaa kete o te waananga – Taawhaki

1.8 Whakakapi upoko

Upoko Tuarua: Te Uri o Haio

2.1 Kupu whakataki

2.2 Tainui Waka

2.3 Waikato

2.4 Taawhiao

2.5 Te Uahaumeene

2.6 Te puutake mai

2.7 Whakakapi upoko

Upoko Tuatoru: Io Rangi, Io Io Whenua

3.1 Kupu whakataki

3.2 Rangiriri

3.3 Kiingitanga

3.4 Puna kai – Poukai

3.5 Te Whakapono ake

3.5.1 Tariao

3.5.2 Ngehe

- 3.6 Ngaa kupu ki ngaa Kura
 - 3.6.1 Kura o te Ata
 - 3.6.2 Kura o te Awatea
 - 3.6.3 Kura o te Ahiahi
 - 3.6.4 Te whakamaaramatanga
- 3.7 Te Reo me ngongoona tikanga
- 3.8 Whakakapi upoko

Upoko Tuawhaa: He toi ora, he toi ahu mai Hawaiki

- 4.1 Kupu whakataki
- 4.2 Te moe
- 4.3 Te whakaarahia o Te Puea Te Kirihāehae Herangi
- 4.4 Te Rangamaaheuheu
 - 4.4.1 Whare wairua
- 4.5 Whakakapi upoko

Upoko Tuarima: Teenaa purutia too iwi

- 5.1 Kupu whakataki
- 5.2 Te oranga tuu
 - 5.2.1 Ngaa Hapuu me ngaa Marae
 - 5.2.2 Waikato tangata
- 5.3 Whakakapi upoko

Upoko Tuaono: Ka pai

- 6.1 Kupu whakataki
- 6.2 He hokinga whakamuri
- 6.3 Te paatai matua
- 6.4 Te Herenga ki te whakaoranga o Waikato tangata
- 6.5 Te pae huaki
- 6.5 Ngaa whaaaitanga
- 6.7 Kupu whakakapi

Upoko Tuatahi

Waahia te uru tapu nui

1.1 Kupu whakataki

I teenei waahanga e whai ake nei, ka waahia ake ngaa uru tapu rangahau. Ka tohi atu raa te kaupapa matua, anoo hoki, ngaa paatai matua kua iriiriia hei pou koorero, pou whakaaroaro hoki. E werohia ana teneki upoko ki ngaa whiwhia me ngaa hua kua manakohia, kua kookoo mai te takinga o te tuhinga nei. Ko te takahanga rangahau kua tukia ki runga me ngngoona anoo ara pikinga i puta ai ngeenei koorero. Kei raro ko ngaa upoko te whakarakeiora i te raranga mai o teenei tuhinga whakapae. Ki konei raranga hoki ai i ngaa kete o te waananga e pupuru nei te mauri o te kaupapa matua, me ngeenei koorero kua hahua mai Hawaiki.

1.2 Taku kaupapa

E rua ngaa taahuhu matua o teenei rangahau. Tuatahi, ko te ahunga mai o te Kaupapa Tariao, ngaa karakia Tariao me ngngoona koorero, ngngoona anoo whakapapa, ngngoona anoo tukuihotanga. He huhua tonu ngaa momo kura o ngaa karakia Tariao wheoi, e toru tahi ngaa mea matua ka aata whakatewhatewhangia. Tuarua, ko te rawea, ko te herenga o ngaa koorero, ngaa whakapapa, ngaa tukuihotanga o te Kaupapa Tariao me ngaa karakia Tariao ki te whakaoranga o Waikato tangata.

1.3 Paatai matua

Ko te paatai matua ka whakautua i te tuhinga whakapae nei e wheenei ana:

- Ka whai waahi raanei te Tariao i roto i ngeenei raa?

Hei whakautu i te paatai matua, ko ngaa kaupapa aapiti e whai ake nei ka tirohia e kitea mai ai te mea ngaro:

- He aha te puutake o te Tariao?
- Ko wai maa ngaa iwi, hapuu kaha ki te whakapuumaui i te Tariao?

- He aha ia te paanga mai o te whakapono Karaitiana?
- He aha Ngaa Kura Tariao, he aha hoki te momo reo ka whakamahia?
- He aha ngongoona tikanga whakahaere?
- Te mimiti haere o te Tariao, he aha ai?
- I whea toona pakaritanga?
- I ora mai te Tariao i te aha?
- He aha ngaa hua o te Tariao i roto i ngaa iwi me ngaa kaupapa o teenei raa?
- He aha ia te Herenga o te Tariao ki te whakaoranga o Waikato
- He aha ngaa wawata moo te Tariao ki tua o te pae?

1.4 Ngaa hua

Ko te oranga tonutanga o te Tariao te hua matua e whaaia ana i teenei rangahau. He huarahi teenei kia taawhia tonutia ngaa koorero a Kiingi Taawhiao, kia ora tonu mai teenei taonga te Tariao. Ki te ora tonu teenei taonga, koia teenei he taapaetanga ki toona ora, koia teenei he whakapuamau hoki i ngaa koorero whakapono a te Kiingitanga.

Ko ngaa akoranga o te hahunga mai o te Tariao me ngaana tawhito, ngaana hereherenga, ngaana momo tikanga haapai kei te whakakaho i te ihinga, i te warenga. Ka tuhura mai, ka whakamahuki hoki i te aahuatanga o te reo Maaori e takitaki nei i ngaa Kura o te Tariao. Ko te momo o taua reo Maaori he uaua ka kite, ka rongorangi. Inaa raa te iti o te kupu, inaa raa te huhua o ngaa hua o te koorero. Inaa maarama te tangata ki ngaa momo kupu, ki te momo o te reo Maaori kua whakamahia, ko te oranga te hua. E wawata hoki ana ka puta ngeetehi rauemi he ahakoa iti, he ahakoa nui i teenei rangahau hei rauemi taunaki. Me he pukapuka aawhina, he waananga karakia, ngaa hui Tariao raanei.

1.5 Te takahanga rangahau

Ko Te Whare Tongikura te ingoa o te takahanga rangahau, te uho o te rangahau ka whaia e au hei whakatutuki i ngaku mahi rangahau. Ko te tikanga o ngaa tongikura a Kiingi Taawhiao ka whakamahia hei waihanga i teetehi momo whare rangahau. Kua hangaia teenei whare i runga hoki i ngaa maataapono rangahau, i te whakaaro Maaori anoo hoki. Na, maa te whakawhanaungatanga e tuu ai te whare.

Ko ngaa pou o roto he ngaakau whakaiti, ko te tuuaarongo ko te reo me ngngoono tikanga. Ka noho ko te angitu me te koha hei hua. Kei ngaa tongi koorero a Kiingi Taawhiao kua whakahiato o roto tonu i te whare nei e mau ana, e tauira mai ana i te ia o ngaa tongi ake, inaa hoki, taana haangai ki ngaa momo takahanga rangahau i para kia tutuki raanoo ngaa mahi.

He takahanga rangahau teenei e whakamahia ana i ngaa koorero me ngaa tongi tupuna, hoi anoo, naa Brad Totorewa i whakahiato kia puta wheenei ai. Ka whakamahia katoatia e au teenei takahanga rangahau i tana haangai ki taku kaupapa rangahau, me te tika o ngaa huarahi rangahau moo te kaupapa nei.

Te Whare Tongikura

Tongikura	Tikanga - Takahanga
Maaku anoo e hanga i tooku nei whare	Whakawhānaungatanga
Ko ngaa pou oo roto he Maahoe, he Patete	Kia Ngakau whakaiti
Ko te taahuhu, he Hinau	Te Reo me ona Tikanga
Me whakatupu ki te hua o te Rengarenga	Te Angitu
Me whakapakari ki te hua o te Kawariki	Koha

1.6 Ngaa Upoko

I te mea ko te aronga puu o taku kaupapa rangahau ko te Tariao, kua kapohia ko ngaa pane me ngaa whiti o roto mai ngaa Kura hei upoko takitaki i ngaa koorero kei roto tonu i teenei tuhinga whakapae. Ko ngaa pane me ngaa momo whiti e tau nei hei matamata upoko, hei koorero raungaiti i te matuu, i te ngako o te katoa o ngaa koorero ki te kupu iti. Engari, ka mautonu ki te tiketike, te reetoo, te rangiwhaawhaa, te whakaohoho o te kupu.

Waahia te urutapu nui

E waahia ake ana teenei upoko tuatahi ki te urutapu nui, ki te urutapu roa e noho nei te hirahira, e noho nei te tapu o ngaa koorero me ngaa tikanga whakamaarama i teenei rangahau. Ko te whakamutunga o teenei upoko ka pau ki ngaa tua koorero a Taawhaki me ngaa kete o te waananga i riro mai nei ki a ia.

Te Uri o Haio

E waahia ake ana teenei upoko ki ngaa taahuhu koorero i tere mai Hawaiki raanoo, aa, ka awhitia ki konei. Ko te maanutanga o ngaa koorero a Tainui waka kei teenei waahanga, anoo hoki ko Taawhiao ki Waikato, ko Te Uahaumeene ki Taranaki ka matapakihia. Inaa raa ko ngaa rangahau o te puutake mai o te kaupapa nei kua herea hei haika ki teenei upoko.

Io Rangi, Io Io Whenua

E whaa rawa ngaa kaupapa matua kei teenei upoko. Tuatahi ko te paahuatanga o runga i a Rangiriri. Koia te kaupapa hei huataki i ngaa koorero kei teenei upoko i runga noa ake i te nuinga o ngaa kaupapa hirahira i ara ake noo muri tonu mai i teenei riiriri whenua.

Ko te waawaahitanga mai teenei o te Kiingitanga hoki. Ko te Kiingitanga ka noho hei kaipupuru, kaimanaaki i te kaupapa Tariao, i toona whakahirahira, i toona tapu. Tuarua ka puare whaanui ngaa kuuaha ki te puna tangata, ki te puna kai, ki ngaa puna koorero o te Poukai e haapai rawa ana i te kaupapa tonu.

Ko te otinga iho ko te iringa o te Whakaponu ake me ngaana Kura e toru. Ka waanangahia te reo takitaki i ngaa Kura, aa, ka maataingia ngaa tikanga taketake me ngaa tikanga whakahaere i ngaa kura noo roto mai i ngaa pou wairua.

He toi ora, he toi ahu mai Hawaiki

E waahi ake ana teenei upoko i ngaa torotoronga koorero mai anoo i te taamemehatanga o te Tariao, atu ki te koiranga mai o te kaupapa me taa Te Puea taapae atu ki taana maahuri mai. Hei whakakapi i teenei upoko ka whakamau atu taku rangahau ki runga ki a Te Rangamaaheuheu moo te Kiingitanga me ngaa raatou huarahi whakaoho i te Tariao kia ora tonu mai te kaupapa nei.

Teena purutia too iwi

E waahi ake ana teenei upoko i te herenga o ngaa kaarangatanga Hapuu, Marae, uri o Waikato ki teenei kaupapa whakaora tangata. Ka koorerotia hoki a Ngaa Mare Toopu ki teenei upoko, inaa raa he Kaupapa i tuu mai, i rewa ake i runga i ngaa maataapono o te Kiingitanga. Koia he kaupapa tuuariari, kaupapa whakauu tonu ana i ngaa tikanga, me te tapu o te Tariao.

Ka pai

E waahi ake ana te upoko whakamutunga i ngaku kupu whakapae ki ngaa paatai kua whakaopeope i te upoko tuatahi. Hei teenei upoko ka whakatakotohia hoki ngaa torotoronga whakaaro a te herenga o te Tariao ki te whakaoranga o Waikato tangata. E rohe ake ai ngaa koorero ka tukutuku ruatia e au he whakaaro ki te pae huaki o te Tariao me te anganga whakamua o te kaupapa.

1.7 Ngaa kete o te waananga - Taawhaki

Piki ake piki ake Taawhaki i te rangi tuatahi i te rangi tuarua

I toona raa ko Tuuhokainuku, ko Tuuhokairangi

Papaa te whaititiri

Ko Matire hoahoa katohi

Ka pai

Ka noho a Kai-tangata ki te atua e kiia nei toona ingoa ko Whaititiri, ka puta mai ki waho ko Hema. Ka noho a Hema ki a te atua e kiia nei toona ingoa ko Uru-tonga, ka puta mai ko ki waho ko Taawhaki (Jones,2013).

Hei taa ngaa Whare waananga o Tainui wheenei nei i a Taamaki, i a Ahurei, i a Te Papa -o-Rotu, i a Kahu-wera me ngaa Tuuahuroa o aua waananga, a Te Kete-ana-taura, a Riu-ki-uta, a Hoturoa raatou ko Rakataura maa, ka noho a Taawhaki ki te atua e kiia nei toona ingoa ko Tangotango (Jones, 2013). Koia raa te tamaahine tuawhaa o roto mai i ngaa tamaahine e waru o Whaititiri. I heke mai a Tangotango i te Toi-o-ngaa-rangi ki te noho tahi ki a Taawhakai, naawai raa, ka whaanau mai taa raaua tamaiti. I a Taawhaki me Tangotango e ngangare nei, ka hoki tuu atu a Tangotango ki te Toi-o-ngaa-rangi, tahi me taa raaua tamaiti.

Ka piki ka piki ka tau a Taawhaki ki te aroaro o Tangotango ka kite hoki ia i a Haapai, teetehi teina ki a Tangotango. Ka noho mai ko Haapai hei makau atua tuarua ki a Taawhakai, aa, ka hoki rawa mai raaua ki te whenua. I a Haapai ka puta mai ki waho ko Matire-hoahoa. Koinei te oorokohanganga mai, te tiimatatanga mai o te pikihanga ake o Taawhaki i Ngaa-rangi-tuuhaahaa ki te whai i tana tamaiti e piri poho ana ki a Tangotango ka tahi noo muri tonu mai i teenei pikihanga, ka tuupikitia anoo e Taawhaki ngaa rangi.

Ko te pikihanga ki te kapo kau ake i ngaa kete o te waananga me ngaa whatukura i timata i muri tonu mai i te pakanga i ara ake i waenga i ngaa Pona-turi me Taawhaki. Ka hinga rawa ngaa Pona-turi kaatahi a Taawhaki ka piki ki te Toi-o-ngaa-rangi.

I a Taawhaki e tuupiki ana i ngaa rangi, ka whati mai raa, ka waahia mai raa e ia te pou-koohatu, koia teenei he momo puru kei ngaa Toi o ngaa rangi. Ka whawhatirua teenei puru e Taawhaki ka ngahoro mai ko ngaa riiriri o Taawhiri-maatea ki runga ki te whenua.

Hei taa ngaa koorero, ko te ingo o ngaa tuupuhi me ngaa riiriri i tarawhati mai raa ki te whenua ko: Raka-mamao, ko Maakoi-rangi, ko Tonga-nui, ko Marangai, ko Ka-ruia, ko Hauaauru-tuupoki, ko Tuu-a-Raki. Koia teenei te aituaa nui i ingoatia, Te Hurihanga a Mata-aho.

Ahatia ngaa pierenuku ka tuupiki tonu a Taawhaki i Ngaa Rangi-tuu-haahaa. I toona pikihanga ake ka kau ia i Te Wai-o-Taane i Rangi-mata-wai, aa, ka piki tonu. I te tatuunga atu o Taawhaki ki Taauru-rangi ka rongoa ia i ngaa hau angiangi a Hauaauru-tuupoki, he ahakoa teenei ka kake tonu, ka piki tonu a Taawhaki. Ka eke a ia ki Tiritiri-o-matangi ka kau ia i Te Wai-o-rongo-mai. Naa ngaa Wai-o-rongo-mai a Taawhaki i tapu rawa teena i te tapu i a ia i mua noa atu.

I a Taawhaki e noho nei ki Tiritiri-o-matangi i whai whakaaro ia ki ngaa kete o te waananga me ngaa whatu-kura, aa, ka puta i a ia te whakaaro kia kawea ake e ia ngaa taonga nei ki te whenua. Ka whoatu ia i ngaana anoo whakaaro ki a Io, ka tika atu tana whakaae. I riro mai ki a Taawhaki te mana o te waananga me ngaa Tauira o ngaa kete e toru, ngaa Whatu-kura e rua hoki.

I te hokitanga mai a Taawhaki i ngaa rangi ka rongoa toona Matua moo taana i riro. Ka pukuriri toona Matua i toona kuare, i toona anoo kore moohio ki ngaa mahi a Taawhaki. Kaaore hoki a Taawhaki i whai waahi atu ki toona Matua ki te aata waananga i teenei kaupapa i te nui o te pakanga, i te nui o te nguha o toona Matua ki a Maau.

He aha hoki, ka karangatia te Matua o Taawhaki teetehi huihuinga i runga o Maunga-nui ki te arohaehae i ngaa mahi a Taawhaki. Ko te rirohanga atu i a Taawhaki te mana o te waananga me ngaa Tauira o ngaa kete e toru, ngaa Whatu-kura e rua hoki. Ka tau te karere ki a Rehua e hui tahi ana, e toopu tahi ana he huinga taangata kia koorerotia te kaupapa, ka puta te riri.

Ka tukua a Rehua ngaa atua Whetuu ki te whenua kia tau ko te whakawhiunga ki runga ki te hunga waananga. I puku hoki te rae o Rehua i te tukuhanga atu o Taawhaki i ngaa tauira tapu ki toona Matua hei waanangananga maa raatou. Ko Rehua naana i paohotia, i paanuitia ki te rahirahinga o Tiritiri-o-matangi i tika atu te whakaae o Io ki ngaa hianui a Taawhaki.

I tino kore nei a Rehua i whakaae ki teenei aahuatanga, ki ngaa hiahia o Taawhaki. Hei taana, ko tuuaahae, ko taruhae hoki teeraa ka mahuta ake i te whenua, aa, maa reira i horohorohia te tapu o ngaa tauira i a raatou. Anei teetehi karakia e tauira ana i teenei takunetanga hei taa (Jones, 2013).

*Ka tiimata teenei i a Maunga-nui
Ka toopu i a Uenuku toona iwi
Ka Puaki tana kupu ki a Tiorea
Naa Tiorea ki a Te Ihiihi
Naa te Ihiihi ki a Pakipaki
Naana ki a Te Puutahi-nui-o-Rehua
Naa Rehua i whakatara
Ngaa whetuu o te rangi
Kia ngau ki te tangata
Ka hoki teenei ki a Taane-tapu
Ko Taawhaki nei teetehi ngoona ingoa
I whauwhia a ia ki ngaa waahi tapu
Ka puaki nei te reo o Rehua
Ki toona atua ki a Io
Kua hoatu nei te ao, te mana
Me te mauri ki te tangata
Kei toona huringa ki toona iwi ake
Ka murua ko te toi tapu
Ko te ahurewa ko te whenua tupu
Naa, ko te mate teenei o te tangata
I mate ai, e mate nei, e mate nei
Aa taea noatia mai teenei raa
Hou (pp. 61-62).*

Noo te taenga iho o Taawhaki ki te whenua tahi me ngaa kete o te waanagna ka puaawai mai te whakakitenga atu o Rehua. I tupu te tuuaahae, i ara ake anoo te riiriri i runga i te whakaaro maana anoo maa Taawhaki e hora ngaa tauira o te waanga puta i te ao.

I whakatuuria te Tariao ki te aakinga i te oranga mai o te tangata. Ko ngaa kupu koorero o Kiingi Taawhiao teena i puta, “E te iwi ko teenei taonga ka whakahokia ki ngaa pae maunga, ki te toimaha koutou tiikina atu maana koutou e whakaora.” (Kirkwood, 2000, p. 116). Koinei tonu ngaa aahuatanga kua ngahoro mai raa ki a taatou e noho nei i teenei ao hurihuri, ko te puuhaehae, ko te whakahaawe, ko whakawhiu, ko te whiu heitara, ko te taami i te mana o te tangata.

Haaunga ngaa wero, koia teenei te puutaketanga mai o te maatauranga kei aa te ira tangata hei taa te whakapono a ngaa uri o Tainui hei taa (Jones, 2013). Koia hoki teenei ngaa koorero moo Taawhaki me ngaana anoo tuupikihanga. He peeraa me ngaa koorero o ngaa tuua-iwi moo Taane Mahuta, moo Taane-nui-aa-rangi.

E haaere ake nei ngaa whakapapa Tapu o Tainui. Ko ngeenei whakapapa e whakaata mai ana i te whakapaparanga mai Te Kore ki a Io, a Io ki a Rangi raaua ko Papa, raaua ki a Taawhaki, a ia ki a Hoturoa, Hoturoa ki a Kiingi Taawhiao heke mai ki a Kiingi Tuheitia e noho nei i toona ahurewa tapu.

Ko Taawhiao i noho hei mana, hei ihi, hei wehi, hei tapu moo runga i te whakapono Tariao me ngoona katoa. Ko ngeenei whakapapa te haere nei e tauira mai ana i te kura rawa me te maarama o Taawhiao ki ngaa akoranga o roto mai i ngaa waananga o Tainui i whai waahi mai ki a ia. Ka kite hoki i ngaa puutake whakaohooho i puta peeraa rawa ngaa Kura o te Tariao e rongo nei e taatou i ngeenei raa.

Ko te whakapapa tapu o Io teenei e kiiia nei te ingoa Te Aho tuatahi. Ka hiimata ake ai teenei whakapapa i te Kore ka tau ki a Io. I hira ake ai teenei whakapapa taa te mea koinei te tiimatatanga, koinei te kunenga mai o ngaa mea katoa. Hei taa te Kura o te Ahiahi; *Ko te Kore Kore nui Kore para Kore whiwhia Kore rawea Ka pai.*

Te Whakapapa Tapu o Io

Te Aho Tuatahi

Te Kore

Kotahi-te-kii

Kotahi-te-koorero

Kotahi-te-waanaga

Te Kore-whiwhia

Te Kore-makiki-hii-rere

Maakaka

Io

(Jones, 2013, p. 65),

Ko te whakapapa tapu teenei o Ngaa Ao Whetuu kua ingoatia, Te Aho Tuarua. Ka hiimata ake ai teenei whakapapa i a Io ka haere ka haere, ka tau ki a Rangi raaua ko Papa. Ko te Whakaari mai o ngaa Ao me ngaa Poo heke iho i a Io te whakahirahira o teenei whakapapa. Hei taa te Kura o te Awatea; *Ko Io rangi Io Io whenua Ka pai.*

**Te Whakapapa Tapu o Ngaa Ao Whetuu
Te Aho Tuarua**

Io

Te Whetu

Te Raa

Ao-nui

Ao-roa

Ao-papa-kina

Ao-pako-rea

Ao-ki-tua

Ao-ki-roto

Ao-ki-tawhiti

Ao-ruru

Ao-aaio

Ao-whero

Ao-maa

Ao-pango

Ao-whaka-rito

Ao-kumea

Ao-i-runga

Ao-ki-raro

Ao-ki-katau

Ao-ki-maui

Rangi-nui

Tau-ana-te-marama
Te Poo-nui
Te Poo-roa
Te Poo-papa-kina
Te Poo-pako-rea
Te Poo-ki-tua
Te Poo-ki-roto
Te Poo-ki-tawhiti
Te Poo-ruru
Te Poo-aaio
Te Poo-whero
Te Poo-maa
Te Poo-pango
Te Poo-whaka-rito
Te Poo-kumea
Te Poo-i-runga
Te Poo-ki-raro
Te Poo-ki-katau
Te Poo-ki-maui
Papatuuaanuku

(Jones, 2013, pp. 66-67).

E whai ake nei ko te whakapapa o te Tangata mai te Atuatanga. Kua whakaingoatia teenei whakapapa Te Aho Tuatoru. E taura mai ana i ngaa taura whiri-toi a te tangata ki ngaa atua, ki a Taawhaki raano. He mea nui teenei whakapapa i te mea koia teenei te herenga o te whakaeketanga o Taawhaki i ngaa rangi me ngaa waananga i riro mai ki a ia heke iho mai ki te tangata, taea noatia ki ngaa koorero o roto mai te Kura o te Awatea.

Ko te whakapaparanga o te Tangata mai te Atuatanga te whakatauiria hoki o te maatauranga me ngaa waananga e mau ana ki Te Kura o te Awatea. Taihoa ake ngaa whakamaaramatanga me ngaa koorero here i Te Kura o te Awatea ki teenei whakapapa, me te whakamaaori o ngaakupu ake e tuhura, e whakamahuki i te Pane tuatoru. Ka iriiria he koorero i konei naa Te Kurao te Awatea hei whakapaataritari tonu i te hirikapo e tau wawe ai koe, te kaipaanui ki te pane tuatoru; *Ko Tiki, ko Tohi, ko Rakeiao, ko Tama-ki-Hikurangi Ka pai.*

Te Whakapapa o te Tangata mai i te Atuatanga

Te Aho Tuatoru

Rangi-nui = Papatuuaanuku

Tumatauenga = Hineahuone

Aitu-a

Aitu-ere

Aitu-kikini

Aitu-tamaki

Aitu-whakatika

Te Kore

Te Kore-nui

Te Kore-roa

Te Kore-para

Te Kore -te-whiwhia

Te Kore-te-oti-atu-ki-te-po

Ngana

Ngana-nui

Ngana-roa

Ngara-ruru

Ngana-maoe

Hotu-wai-ariki
Ta-pa-tai
Tiki
Tiki-te-pou-mua
Tiki -te-pou-roto
Tiki-ahu-mai-i-Hawaiki
Whiro-te-tupua
Toi
Ha-tonga
Rakei-ora
Taha-titi
Tama-ki-te-rangi
Piro
Kaitangata = Whaititiri
Hema = Urutonga
Taawhaki = Haapai
(Jones, 2013, pp. 68-69).

Ko te whakapapa e haere ake nei he whakapapa tapu o te tangata ki ngaa tuupuna o Tainui. Ko te Aho tuawhaa teenei. E hiimata ake ana teenei whakapapa i a Taawhaki raaua ko Haapai, toona makau atua tuarua. I a raaua ka puta mai ki waho ko Maatire-hoahoa.

Ka koomuri taku hoki ki ngaa kupu e tare mai nei, e taahuhu mai ana i teenei upoko e kite ake ai taatou i ngaa momo here ki teenei whakapapa, me te Kura o te Awatea; *Piki ake piki ake Taawhaki i te rangi tuatahi i te rangi tuarua i toona raa ko Tuuhokainuku, ko Tuuhokairangi papaa te whaititiri ko Matire hoahoa katohi Ka pai.*

**Te Whakapapa Tapu o te Tangata ki ngaa Tuupuna o Tainui me Te Arawa
Te Aho Tuawhaa**

Taawhaki = Haapai

Maatire-hoahoa

Rutui-pahu

Tangi-pahu

Ngai

Ngai-nui

Ngai-roto

Ngai-peha

Hauraki-ki-te-rangi

Mapuna-ki-te-rangi

Te Kura-i-monoa

Oho-mai-rangi = Puu-hao-rangi

Miringa-te-kakara

Rua-mutu-rangi = Haapai-kura

Tarao

Tara-waene

Koku-o-te-po

Hoturoa

(Jones, 2013, p. 70).

Ko te whakamutunga o ngaa whakapapa teenei. Koia teenei te whakapapa Tapu o Te Whare Ariki. Ka hiimata ake ai teenei whakapapa i a Hoturoa te Rangatira o runga i te waka o Tainui.

Ka heke ka heke ka heke teenei whakapapa ka tau ki te Kiingi Maaori tuatahi a Pootatau Te Wherowhero, e mau nei i te wehi me te tapu o ngngoonā tupuna e raarangi mai ana.

Ka heke, ka heke, ka heke tonu kia tau rawa ki a Kiingi Tuheitia Pootatau Te Wherowhero te tuawhita, e pupuru, e taawhia tonu nei i ngā mauri o ngngoonā tuupuna peeraa me toona tuupuna a Pootatau. Koia te whakahirahira o teenei whakapapa kaatahi, ka rua, ko te herenga o teenei whakapapa ki a Taawhia te kaipupuru koorero, te kaipupuru i te mauri o tewhakapono Tariao.

Te Whakapapa Tapu o Te Whare Ariki

Hoturoa

Hotuope

Hotumatapu

Mootai

Ue

Rakamamao

Kaakati

Taawhao

Whatihua

Uenuku-te-rangi-hooka

Mango Hikuroa

Mootai II

Kuranui

Rereiao

Pikiao

Hekemaru

Mahuta

Uerata

Tapaue

Te Putu

Taawhia-ki-te-rangi

Tuata

Te Rauangaanga

Pootatau
Taawhiao
Mahuta
Te Rata
Koroki
Te Atairangikaahu
Tuheitia
(Biggs & Jones, 2005).

Ko te matuu me te ngako o ngeenei koorero he whakatauiria, he whakaata i te takenga mai o te maatauranga ki taa Tainui titiro, ki taa Tainui e whakapono nei. I peenei maa roto mai i ngaa koorero tukuiho me ngaa whakapapa kua whakaraakeingia ki teenei tuhituhinga.

Aa, e maarama ana te kite ko ngaa koorero ko ngaa whakapapa ko ngaa karakia e tare mai ana, koia teenei te puawaitanga, te oorokohiimatanga o te maatauranga i teenei ao hurihuri, te maatauranga kei a taatou te tangata, te maatauranga i whiria e Taawhiao ki ngaa kura o te Tariao. Ka hiimata ake i Te Kore, ka heke ki a Io, ka ngahoro iho raa ki a Rangi raaua ko Papa taea noatia ki a Taawhaki te atua i tuupiki i ngaa rangi ki te kapo kau i ngaa kete o te waanaga me te maatauranga, ngaa whatukura hoki. Aa, ka tau ki a Hoturoa te rangatira o runga i te waka o Tainui me ngaana mangainga taatai whakaheke a Pootatau, a Taawhiao, a Mahuta, a Te Rata, a Koroki, a Te Atairangikaahu, a Kiingi Tuheitia Pootatau Te Wherowhero te tuawhitu.

E whai ake nei ko tooku ake whakapapa mai anoo i a Hoturoa ka heke ki ngooku tuupuna, aa, ka tau ki tooku tupuna koroua. E whakatakoto ana ahau i teenei whakapapa hei whakatauirā atu ki te hunga paanui he kaawai whakaheke ahau noo Tainui, aa, he uri hoki teenei e pupuru tonu ana, e taawhia tonu ana ki ngaa tukuihotanga o ngoo taatou tuupuna.

Tooku Whakapapa mai i a Hoturoa

Hoturoa

Hotuope

Hotu-aawhio

Hotu-matapuu

Mootai

Ue

Rakamamao

Kaakati

Taawhāo

Turongo

Raukawa

Rereahu

Maniapoto

Te Kawa-irirangi

Wai-maapuna

Rangatahi

Hekemaru

Mahuta

Uerata

Tapaue

Pouate

Ueroa

Horo

Te Para

Te Hiko Totorewa Te Para

Waati

Taihuri

Te Awaiti
Rapirapi
Te Uriwhakapuku
Kirimangu
Miware
Tioone

Katoa o eenei koorero he mea i whaangaia ki ngoo taatou tuupuna i waimarie ki te noho ki te waananga i ngaa puukenga, i ngaa atamai, i ngaa horohoro, i ngaa tauira o teenei mea te maatauranga i roto tonu i ngaa Whare Waananga tapu e ora mai ana i ngaa raa o uki. I pakeke mai ai a Kiingi Taawhiao i ngaa rekereke o ngaa tohunga nei i matatau ki ngeenei aahuatanga, ngaa tohunga i whai waahi, i whai taringa atu ki aua akoranga.

Naa konei a Taawhiao i aahei ki te tuitui i teeraa atua me ngoona koorero, teeraa atua me ngoona puukenga, teeraa atua me ngoona ihi, teeraa atua me ngoona tapu, teeraa atua me ngoona mana, aa, whakakotahi atu nei ki te whakapono Tariao. Hei taa ngaa koorero he waahanga nui hoki too te Karaitiana me ngaa koorero Karaipiture kua uwhia tahingia me ngaa koorero, ngaa whakapono Maaori peeraa me ngaa koorero e iri mai ana. Ko te whakapono Tariao te otinga iho o te rangitaamirotanga o ngeenei whakapono, o ngeenei koorero.

1.8 Whakakapi upoko

Kua horahia taku kaupapa matua hei maataamua moo ngaa whakapaparanga koorero e toomuri mai ana. Kua whakatakotoria hoki taku paatai matua hei aarahi i te anganga whakamuatanga o aku rangahau. He paatai taunaki hoki aaku hei tautoko i te anganga whakamua. Ko ngaa hua o taku rangahau teera kua koorerotia. Ko taku takahanga rangahau teera Te Whare Tongikura kua tohia hoki ki teenei upoko e maarama ai te kaipaanui ki ngaa ara rangahau i haere ai au. Araa te koorero a Kiingi Taawhiao “Whaia te manu ki te hauauru, kei reira te maaramatanga.” Ko ngaa upoko takitaki me ngaa waahanga o taku rangahau kua titia. Ko te rironga atu i a Taawhaki te mana o te waananga me ngaa tauira o ngaa kete e toru, ngaa Whatu-kura hoki me ngaa hereherenga ngoona, o ngaa koorero me ngaa whakapapa mai Te Kore ki te tangata kua tauratia.

Koia hoki teenei te puutaketanga mai o te maatauranga e noho nei ki roto i te whakapono Tariao. Ko taaku, he kohikohi i ngaa purenga koorero kia kotahi anoo te panga atu o te reo o ngoo taatou tupuna aa puta noa.

Upoko Tuarua

Te Uri o Haio

2.1 Kupu whakataki

I te upoko e haere ake nei ka tooia mai te Waka o Tainui ki teenei tuhinga whakapae. Mai i te hanganga mai o te waka o Tainui ki toona terenga mai Hawaiki, ka tau ki te paa herenga wakai Kaawhia i te hauaauru raanoo. Ka kuumea mai ko ngaa parenga o Waikato awa, e hae tonu nei i te puku o te ika. Waikato iwi e takoto tonu nei hei whenua taurikura maa ngaa uri o Pootatau, o Taawhiao tau ki runga ki too taatou Kiingi i teenei waa tonu.

Ko Taawhiao ka aa mai ki runga me ngoona tawhito, me ngoona muri nei hei tirohanga maa taatou. Ko Te Uahaumene ka paiheretia, ka rarautia ki teenei upoko hoki me ngaa hononga ngoona ki a Taawhiao, ki te whakapono e rangahautia ana e au. Ka oti teenei upoko ki te puutake mai o te whakapono Tariao.

E whai ake nei ko ngaa kaupapa matua e taarewa tuu mai ana i teenei upoko, maa eenei kaupapa e whoatu atu he maaramatanga moo te hoononga o ngaa koorero ki taaku e rangahau nei.

2.2 Tainui Waka

Te Karakia o Tainui

Tooia Tainui tapotu ki te moana
Maa wai e too Maaku e too Maa whakatau e too
Whakarongo ake au ki te taha o te rangi
He tarawai nuku he tarawai rangi
Puuhia te ahi e
Nau mai e Taane ka kau taaua i te wai
I Pikopiko-i-whiti
Kia maatakitakina koe
E te tini e te mano
Naaku koe i tiki atu i te Wao-nui-a-Taane
Miroi e Taane Koakoa e Taane

Turuturu haere ana te wai
O te hika o Maru-a-nuku
E patu ana mai e te koomuri hau
Na runga ana mai
O Wai-hiihii o Wai-haahaa
Te iringa teenaa o Tainui
Ura te raa wewero te raa
Ngaa taangata whakaririka mamau ki te taura
Kia tuu maataa-torohi atu
Taku tuu maataa-toro
Ihu o waka
Turuki turuki
Paneke paneke
(Biggs & Jones, 2005, p. 27-28).

Ko te karakia e tare mai ana, e waawaahi ana i teenei waahanga o teenei tuhinga whakape, koia teenei ko Te Karakia o Tainui. Naa Hoturoa te karakia i taki i a raatou e tootoo ana i too raatou waka ki tai. Ka tika hoki kia taahuu mai teenei karakia i ngaa koorero moo te puutaketanga mai o te whakairotanga o te waka o Tainui teenei te haere nei. Me toona terenga ki Aotearoa.

I tiimata ake te hanganga mai o te waka i runga i te huhua o ngaa pakanga me ngaa riiriri i eeraa waa. Ko te tini o iwi ko te mano o tangata hoki e noho nei i Hawaiki, ngaa momo tuu aahuatanga i taapae atu ki ngaa whakaaro o ngoo taatou tupuna kia rite mai ai he waka e tere ai raatou i te moana.

Ka tau ki roto i oo ngaa tupuna ngaakau koia teenei te ara maa raatou, aa, ka karangahia e Memeha-o-te-rangi he tohunga taarai waka. Ka karangahia e ia a Raka-taaura. He tohunga a Raka-taaura i ahu mai i ngaa kura tawhito. He kura waanangahia i ngaa tauira me ngaa akoranga o tuawhakarere, Hei taa ngaa kooreo e toru ngaa toki whakairo a te tohunga nei. Ko Hahau-te-poo te toki turaki, ko Paopao-te-rangi te toki waawaahi, a ko Manu-tawhio-rangi te toki taarai. (Biggs & Jones, 2005).

Ko te raakau i whakairohia e ngoo taatou tupuna hei waka, i ahu mai i te nehenehe o runga i a Maungaroa. I ngahere mai ai teenei raakau i runga tonu i te waahi i tanumia teetehi tamaiti whakatahe.

I mua tonu i te tuatuaanga o te raakau ka koorerohia a Raka me ngaana anoo apataki ki te tohunga e kii nei toona ingoa ko Maahu-rangi. Naa Maahu-rangi ngaa tohutohu i whakatakotoria, naa Raka maa i whai.

Ka tuatua e raatou te raakau i tohua hei raakau taarai waka, aa, ka hinga te raakau. Ka hoki rawa a Raka me ngaana apataki ki te kainga i te poo uriuri. Ao te poo ka tatuu atu raatou ki te raakau naa raatou i tua, ka kitea mai raatou i te raakau e tuu mai ana, anoo nei kaaore raatou i tuatuaahia. Ka tuaina te raakau anoo heoi, i te hokihanga mai i te ata, ka tuu mai anoo te raakau.

Ka tuaina anoo te raakau e Raka, eengari ka noho raatou ki te aata matapaki he aha ia te take ka tuutuu mai te raakau noo muri tonu mai i toona poroatanga. Ka kite a Raka maa i ngaa manu, i ngaa popoko-tea, i ngaa porihawa e kohikohi nei i ngaa maramara raakau hei whakaara i te raakau kua hinga.

Naa, kua tuu mai anoo te raakau. Ka hoki haere a Raka ki te waananga tahi ki a Maahu-rangi, aa, ka whakatakoria e Maahu-rangi he tohutoho atu anoo maa Raka hei whai. Ka taki whaiwhai haere a Raka i ngaa tohutohu a te tohunga nei, ka hinga te raakau ka karakia a Raka i Te Karakia o te Tuanga o te Raakau. Ka hoki atu a Raka maa i te ata ki te aata matai arotake i te raakau, mehemea raanei e hinga tonu ana, mehemea raanei kua tuu mai anoo.

Ka tatuu atu ki te raakau e takoto tonu mai ana. Koia teenei te tiimatatanga mai o te hanganga me te whakairotanga o te waka o Tainui.

Kua kapi i aau he koorero moo te puutaketanga mai o te whakairotanga o te waka o Tainui, naa, ko ngeetehi koorero moo toona terenga mai ki Aotearoa te haere nei. Hei taa (Biggs & Jones, 2005). He karakia teenei i taakina ake e Ngaatoro-i-rangi hei whakaputa i a Tainui ki te moana nui.

*Ika waerea te one tapu
Ka hura taangata a uta
Me turaki atu ki taangata a tai
Ka hura taangata a tai
Me turaki atu ki taangata a uta
Peeraa hoki te korepe nui
Te korepe roa
Te waahi awa
Te toetoe awa
Whakamau tama i te ara
Whakamau tama i te ara
Ko Tuu ko Rongo
Tama i aaraia te ara
Kauraka tama e uuhia
Tukua atu tama kia puta
I waho i te taawhangawhanga
He putanga ariki noo Rongo
Ki te ata taurira mai e
Mai ea mai ea te tupua
Mai ea mai ea te tawhito
I haramai raa koe i whea
I haramai raa koe i te whakaoti nuku
I te whakaoti rangi
Ko too manawa e ko taku manawa e
Taane ka irihia
Whaano whaano haramai te toki
Haumi e huia e
Taiki e*

(Biggs & Jones, 2005, p. 31-33).

Naa teenei karakia i taakina ake raa e Ngaatoro-i-rangi ka tau, ka marino te moana, aa, ka puta pai ai a Tainui ki te Moana-nui-a-Kiwa. Naana hoki a Tainui i aarahi ki Rarotonga. Ko ngaa ninihitanga a Tama-te-kapua i ara, aa, ka riro mai ki a ia me te waka o Te Arawa a Ngaatoro-i-rangi raaua tahi ko Kearoa.

Ka tere tonu a Tainui i toona terenga i raro tonu i ngaa aarahitanga a Riu-ki-uta. Ka karangatia a Riu-ki-uta ki ngaa taniwha o te moana hei arataki i te waka. I karangatia e ia i a Mawake-nui-o-rangi raatou ko Pane-iraira, ko Ihe, ko Mangoo-hikuroa hoki. Hei taa ngaa koorero neke atu i te waru tekau ngaa taniwha i arataki i te waka o Tainui, tau rawa ki Aotearoa. Ka tere, ka huri, ka tau te waka ki teenaa muka whenua, ki teenaa muka, aa, ka huri taiaawhio i te motu e ai ki a (Phillips, 1995) i mua i toona uunga mai ki te paaherenga o te waka o Tainui ki Kaawhia raanoo.

Koia teenei he taipitopito koorero noa. E kore e kapi katoa i aau ngaa koorero katoa i teenei tuhinga whakapae heoi anoo, ko te ito kua whakatakotoria. Koia teenei te takenga mai o te whakapaparanga a Kiingi Taawhiao. Inaa raa te hiranga ake o te whakapapa nei. Ka kitea i eenei koorero me ngeenei whakapapa te aaheinga ngoona ki ngaa waka katoa, ki ngaa kaihautuu katoa i uu ki ngaa tahatika o Aotearoa. I konei, i a Tainui ka puta mai ko te iwi o Waikato.

2.3 Waikato

Ka maatakitaki iho au ki te riu o Waikato
Anoo nei hei kapo kau ake maaku
Ki te kapu oo taku ringa
Ka whakamirinoa i toona aratau
E tia nei he tupu pua hou
Kia hiwa ake au i te tihi o Pirongia
I naa hei toronga whakaruruhau mngoona
Ki tooku tauawhirotanga
Anaa te ngoto o toona ngaawhaa i ngoona uma
Kihai i aarika
A Maungatautari a Maungakawa
Ooku puke maunga ngaa taonga tukuiho
Hoki ake nei au ki tooku awa koiora

Me ngoona pikonga
He kura tangihia o te mataamuri
E whakawhiti atu ai i te koopuu mania
O Kirikiriroa me ngoona maara kai
Te ngaawha whakatupu ake
O te whenua moomona
Hei kawē ki Ngaruawahia te huinga
O te tangata
Araa te pae haumako hei okiokinga moo taku upoko
Hei tirohanga atu maa raro i ngaa huuha o Taupiri
Kei reira raa kei te orokohanganga o te tangata
Waahia te tuungaroa o te whare
Te whakaputanga mai moo te Kiingi
(Kirkwood, 2000, p. 75).

Ko ngaa kupu e tuu taawharau nei i teenei pehonga o te tuhinga whakapae nei he maimai aroha naa Kiingi Taawhiao. I tuhia e Kiingi Taawhiao i teenei waiata i a ia e noho wehe nei i te riu o toona whenua, noo muri tonu mai i ngaa mahi raupatu, me ngaa riiriri paraweranui a te Paakehaa.

E tauira mai ana teenei maimai aroha i te whakatakotoranga o te riu o Waikato ka tahi, ka rua, e whakataurite ana e Kiingi Taawhiao i te riu o Waikato me toona whakatakotoranga ki taa te tinana o te Wahine. I whakaarohia e au kia noho mai eenei kupu hei taahuu i ngaa koorero te haere ake nei i runga i te mea i roto tonu i ngaa koorero e tare mai ana, ka kite koe i te aroha a te Kiingi o taua waa ki toona whenua, ki toona awa, aa, ki a Waikato.

E haere ake nei he tuhinga naa Taa Apirana Ngata. Kia noho mai ai teenei tuhinga hei whakamaarama i te whaanuitanga o te iwi o Waikato me toona hongana ki ngaa tuua waka, tuua iwi, tuua hapuu, tuua rangatira hoki.

Teeraa e takoto raa te riu o Waikato, e haehae tonu ana i te puku o te motu, aa, tuakina rawatia ki te tai hauaauru. Ko Te Heuheu i Tongariro te maataapuna. Kei reira pea te toka i paatukia e te taniwha, i piipii mai ai ko Waikato, ka ngaki mai i waenganui o Taupoo ka tiitaha mai i a Te Arawa, kaatahi ka koopikopiko mai, ka whati, ka maaroo, ka miri i te whenua, i te raakau, me te kohikohi haere i ngaa awa ririki, i ngaa awa nunui, i ngaa rukenga o ngaa repo. Tae rawa ake

ki Ngaaruawaahia, ka tomo mai a Waipaa. Naa reira i whakahiato mai ngaa whaawhaarua o Maniapoto.

Ka hui ngaa awa nei, ka poka i a Taupiri, aa, ka maaroo te whai ki Taamaki Taamakimakaurau. Ehara! Ka whakahokia mai te whenua, aa, pakaru kee atu ana ki ngaa one kirikiri o te tai hauaauru. Moo konei te kupu nei, “Waikato taniwha rau, he piko he taniwha, he piko he taniwha.”

Araa, teetahi aronga o taua kupu, kei ngaa mana taangata toona tino taunga. Ka pae i te taha o te awa nei ko Ngaati Raukawa tae atu ki Maungatautari. I konaa ki te takiwaa o Ngaaruawaahia ko Ngaati Hauaa, te iwi o Te Waharoa. Ka takoto atu i konaa ki te moana ko Waikato, he maha ngaa wehewehenga i roto.

Ka takoto ngaa maania o Waikato, aa, i waenganui me te mea nei i aata whakatuuria ngoona pukepuke hei parepare. Ko Maungakawa, ko Maungatautari, ko Kakepuku e titiro iho ana ki Puuniu, ki te rohe wehenga o Waikato, o Maniapoto. Ko Pirongia e toha raa ki ngaa hau e whaa e kite atu ana i Kaawhia, i Aotea, i Whaingaroa.

Ko Taupiri, ko te puke whakataukii a Waikato, e kii nei, ‘Ko waikato te wai, ko Taupiri te maunga, ko Pootatau te tangata.’

Kei Taupiri ka whakanoti ngaa hiwi, aa, ka puta uua ngaa wai ki teeraa taha. Ka takoto atu i tua he maunga, he wai, he maania. E tika ana kia waiho te wai o Waikato hei mea pepehatanga, naa reira nei a Waikato iwi i tupu ai, i nui ai, i kotahi ai, i rangona ai e te motu. I ngoona raa e noho maru ana teetahi taha o te awa me teera atu i kapi ki te tangata. Inaaiane kua tuu takitahi ngaa paa, ka whakauruuru ko ngaa paa o te Paakehaa i waenganui.

He iwi nui a Waikato. Ki te toopuu tahi mai a Waikato me ngoona iwi e pae nei i ngaa tahataha, kaaore he huihuinga aa iwi o te motu nei e rite. Noo te mea ahakoa he maha ngaa wehewehenga tuupuna, hapuu i roto, he Maniapoto, he Raukawa, he Ngaati Hauaa, he Ngaati Paoa, he Ngaati Maru, he Ngaati Te Rangi, e taea ana te kii he kotahi eenei iwi me Waikato. Kotahi te waka taua, kotahi te tangata kei runga.

Koia teenei ngaa koorero naa Taa Apirana Ngata moo Waikato. I whakatakotoria e au i ngeenei koorero ngoona kia moohio mai te kaipaanui i ngeenei koorero koo wai e manaaki nei i te

Kiingitanga. Ko wai e whakauu tonu nei i ngaa maataapono i waiho mai ai e Taawhiao ki a maatou hei tiaki, hei whakamarumaru. Ko te Tariao teeraa e koorero nei, ko ngaa karakia Paimaarire teeraa e koorero nei.

2.4 Taawhiao

E kore teenei whakaoranga e huri ki tua o ngaaku mokopuna
Maaku anoo tooku nei whare e hanga
Ko ngaa pou o roto he Maahoe he Patate
Ko te taahuhu he Hiinau
Me whakatupu ki te hua o te Rengarenga
Me whakapakari ki te hua o te Kawariki
Teeraa anoo ooku nei hoa
Kei ngaa toopito katoa o te ao
Ko ngaa Huumeka ko ngaa Kaamura me ngaa Parakimete
Ahakoa ngaa mano huri atu ki te haamaarietanga
Mahue mai ki au
Kotahi mano
E rima rau e rima tekau tekau maa rua
Ko ahau kei roto
Ko te atua tooku piringa
Ka puta ka ora

Koia teenei he toopuutanga o ngeetehi tongi kura i tongingia ake ai e Kiingi Taawhiao hei taa (Kirkwood, 2000), i te waa o te ora. E whakakoorero ana ngeenei tongi i te aahuatanga o te oranga o ngoo taatou tupuna i te waa i a raatou. I wahaina mai ai e Taawhiao i eenei tongi hei kupu aarahi, hei tongi whakapono, hei tongi aroha, hei kupu whakakitenga moo ngoona iwi. He kupu akiaki, he kupu whakaora i te wairua. E taawharau ana ngeenei tongi koorero i ngaa koorero e haere mai nei moo Kiingi Taawhiao i runga i te mea ko eenei kupu te tuuaapa o te oranga o Taawhiao i a ia e noho nei hei Kiingi, aa, koia te waa i ora mai ai ko te Tariao, ko te Paimaarire.

I whaanau mai a Kiingi Taawhiao ki Oorongokoekoeaa. Ko toona ingoa taketake ko Tuukaaroto. Ko toona whakapaakehatanga ko teenei (To stand daunted with-in). Koia raa he ingoa e whakamaharatia ana i ngaa pikau nui i pikauria e toona matua e Pootatau Te Wherowhero i te pakanga i Maatakitaki paa i te tau 1822 (Jones, 2010). Ka iriiri e ngaa Mihinare ka whakaingoatia e ia ki te ingoa e kiia nei ko Matutaera, hei taa (Ballara, 1996). Haere te waa, haere hoki ngaa tau naa Te Ua Haumene i tapa te ingoa a Taawhiao ki runga ki a ia, hei taa (Stokes, 1983). Hei taana, hei taa Te Ua Haumeene “Haere, whakataawhia i te ao”. I konei ka ora mai te ingoa Taawhiao. Ko taana he whakataawhia i te ao hei Kiingi hei mauri whakakotahi i te iwi Maaori.

I pootaetia a Kiingi Taawhiao ki te pootae o te motu i te tau 1860. Koia i noho hei Kiingi, hei mana, hei mauri whakatiketike moo te iwi Maaori i a ia ka waawaahitia hei Kiingi. Ka hori ko ngaa tau e toru ka ara mai ko te hoari whakawai i whakakitea atu e toona matua e Pootatau. Ka whewhera he koorero moo Pootatau i te upoko tuatoru, hoi anoo i teenei waa ka mau tonu ki a Taawhiao.

I te tau 1863 i whakawhiti atu te taua hurunuku aatea, te taua paraweranui, te taua tahumaawake, te taua tahumaakaka i te rua taniwha i oo te manga pokopoko i Mangataawhiri (O’Malley, 2016). I teenei whakawhitinga ka mahuta ake ai ko te raupatu a ture, ko te whaanako a ture, ko te koohuru a ture, ko te paawherawhera a ture, ko te urutomo mai a te Kaawana pookokohua ki runga o Rangiriri.

Ko te otinga iho ko te taamemehetanga o ngaa taonga tukuiho o te Maaori. Ko ngaa taatou tikanga, ko ngaa taatou rawa, ko te reo, ko te matemate o ngoo taatou tupuna, ko te rironga atu o te 1.2 miriona eka whenua o Waikato. He pehonga koorero ngeenei i ngaa koorero e whai mai nei moo te paahuaatanga o runga i a Rangiriri hei te upoko Tuatoru.

Heoi anoo i runga i eenei pierenuku me ngaa whakahaaweaa o te waa ka noho wehe, ka noho taratahi a Taawhiao me toona iwi i o raatou whenua ake ka noho, ka tau raatau ki roto o te Nehenehenui, ki roto puu i a Ngaati Maniapoto koia raa ko te Rohe Pootae. Haere te waa, haere hoki ngaa kaupapa huhua me ngaa kaupapa nui i pupuru tonu i taawhia tonu a Taawhiao ki ngaa whakaponohia e ia, i whakaakona hoki ki a ia mai anoo i toona nokinokitanga.

Hei taa (Kirkwood, 2000) ko aua whakapono raa ko te Mihinare, ko te Katorika, ko te Weteriana hoki. E mau hoki a Taawhiao ki ngaa whakaakoranga o ngaa Wharewaananga tawhito o Tainui wheenei nei i a Te Papa-o-Rotu me ngeeraa momo. He mea nui kia maharatia taatou ki eenei koorero ki taku titiro i te mea koia teenei mahuritanga, te mahuetanga iho hoki o te tongikoorero i pupuu mai i a Taawhiao ki a Te Ua. Hei taana hei taa Taawhiao, “E Ua, e toru ngaa taonga kei te kapu o taku ringa ko te Mihinare, ko te Katorika me te Weteriana. Homai taau ka whaa. Kopi katoa ngeenei taonga i au ki te kapu o taku ringa, ka puta ko te Paimaarire.” Noo te tau 1875 teenei whakapono te Tariao me ngaa Karakia Paimaarire i puurangiaho hei whakapono matua moo te Kiingitanga.

I noho ko Taawhiao hei upoko takitaki i teenei whakapono Tariao moo ngaa taane, i noho ko Tiria te teina a Taawhiao hei upoko takitaki i ngaa Ngehe o te whakapono nei. Hei te upoko tuatoru ka ruku ki te reetootanga o ngaa koorero moo ngaa momo tuuranga o te whakapono i waatea mai ki ngoo taatou tupuna.

Heoi anoo, i piikauria a Taawhiao i ngaa pikautanga me ngaa haepapa peeraa me toona matua moo te roanga ake o ngaa tau 34. I roto i teeraa waa ko taana i whakarerea mai ki a maatou ngaa uri he tukuihotanga e kore e mahea, e kore e taea te wetekina. Ko aana kupu ka koorerotia haere ake nei. Ko aana karakia ka karakiatia haere ake nei. Ko aana waiata ka waiatatia haere ake nei. Ko aana tongikura ka noho tonu hei takinga whakaaro moo ake tonu atu. I naa raa he tangata whakapono, he tangata rangimaaria, he tangata arohanui ki toona iwi. He tangata i taapae atu ki te ora o te iwi me ngaana anoo uri e ora mai ana i teenei waa tonu.

I mate a Taawhiao i te tau 1894 ki Parawera. I mua tonu i toona rehurehutanga ki te poo, ko teenei te kii a Taawhiao “Papaa te whaititiri ka puta Uenuku ka puta Matariki. Ko Mahuta hei Kiingi”. Naa runga i ngeenei kupu a Taawhiao i tuu ko Mahuta hei Kiingi moo te iwi Maaori. Ka tukuna a Taawhiao ki toona ruatapunui e toona iwi Maaori ki Taupiri maunga raanoo. E kiia ana te koorero he whaa marama te roanga ake o taua tangihanga. Koia raa he tohu o toona mana nui. Ka whakatepe ake ai teenei waahanga ki teetehi ngeri i hakaina ki te taketake o Taupiri. Moo Taawhiao te haka nei.

*Ka hua au i te whaititiri e whakatuupuru nei
Ki runga i te rangi
Kaaore ko te unuhanga o te taniwha i te rua
Ka ngaue Mookau
Ka ngaue Taamaki
Ka ruu te whenua
Ka mate te maarama
Ka taka ngaa whetuu i te rangi
Ka ara Waikato i te rua
Aue aue aue taukuri e
(Kirkwood, 2000, p. 215).*

2.5 Te Ua Haumeene

I whaanau mai a Te Ua Haumeene Horopapera Tuwhakararo uri o Te Atiawa, Taranaki i Waiaua i te moatatanga o ngaa tau 1820. Hei taa ngeetehi ko Te Hau, ko Tunoi hoki ngaana ingoa. He matatuhi a Te Ua naa Tutawake raaua ko Paihaka. I ngaa tau nokinoki a Te Ua i mauheretia a Waikato i a ia tahi me toona whaea, aa, ka kawea rawatia raaua ki Kaawhia noho ai hei ngarengare, hei taa (Clark, 1975).

I a Te Ua raaua tahi ko toona whaea e noho nei i Ngaati Mahuta ki Tai, ka iriiritia teetehi o ngaa mihinare i a Te Ua, aa, ka whakaingoatia a Te Ua ki toona ingoa mihinare e kiia nei ko Horopapera. Hei taa (Kirkwood, 2000), teeraa pea i haria keetia ia ki Hokianga kee kauga ko Kaawhia. He ahakoa toona iriiritanga kaaore nei ia a Te Ua Haumeene i kuraina ki ngaa kura Mihinare engari, i kura rawa ia ki i roto i te maatotorutanga o te ao Maaori. Naa ngaa tohunga o Kaawhia Moana ia i ako ki te paanui me te tuhi hoki.

Ko toona reo taketake i noho hei reo maataamua ki a ia. Noo muri tonu mai i ngaa 1840, i runga hoki i te whakauu o te ariki o Waikato a Pootatau moo te aahuatanga ki ngaa mookai pononga i waatea mai a Te Ua ki te takahi i te nukuroa o te whenua e tau pai ia ki toona whenua taurikura ki Taranaki, te whenua i ora mai ia ki teenei ao.

I konei ka noho ka mahi hoki a Te Ua moo ngaa taumata tiketike o te Haahi Weteriana. I roto puu i ngeenei mahi ngoona he nui ngaa wheakoranga i waatea mai ki a ia hei pou aawhina, pou

haapai i ngaa taangata e rapu nei i te maaramatanga. I tuu hoki a Te Ua hei kaikauwhau whakahaere karakia, waananga hoki i te ngaromanga o ngngoono whakatiketike, o ngngoono whakateitei.

I noho mai ko Te Ua hei tauria ki ngaa puukenga me ngaa waananga o roto mai i te paipera. Haere te waa haere ngaa tau, haere hoki ngaa pakanga me ngaa riiriri whenua ko Te Ua teeraa i tuu hei maangai koorero, maangai tautoko i te iwi Maaori kia pupuru tonu ai raatou ki ngaa whenua e tika ana maa raatou e pupuru e tiaki hoki.

I a Te Ua e whakauu tonu ana i ngoona haepapa moo toona Haahi, ka whakauu hoki ia i te Kiingitanga me ngaa puumanawatanga o te Kiingitanga hoki. I te takinga o ngngoono anoo whakaaro ko te ora a ngaa uri o Taranaki, a Ngaati Ruanui hoki. Ko te huarahi whakatutuki i ngeenei wawata me ngeenei whakaaro ngoona ko te whakapono, ko te tautoko me te tauhaapai i te Kiingitanga.

Noo muri tonu mai i te paahuaatanga i Ooraakau i te tau 1864 ka waea haere ko ngaa uri o Taranaki te Whakapono Paimaarie, Hauhau. Ko toona ooroko tiimatanga kei te tau 1862. Ko te upoko takitaki i teenei naa whakapono ko Te Ua Haumeene.

Hei taa (Clark, 1975), i whai waahi a Te Ua ki te koorerotahi ki teetehi anahera e kiia nei toona ingoa ko Kaperiere (*Gabriel*). Naa teenei waananga me ngaa koorero, ngaa karere tuku a Kaperiere ki a Te Ua i tau ki roto ki a Te Ua me whai ia i teenei ara takahanga, te ara o te Hauhau, Paimaarire. Aua atu te whakapono nui a Te Ua ki toona ara e haere nei ia kaaore i te peeraa rawa te nui o te aronga atu o ngaa tangata ki toona whakapono. Noo muri tonu mai i ngaa tau 1864 ka tino puuriri mai, ka ngahere mai teenei whakapono.

Ko te tino o teenei whakapono i whakaarahia e Te Ua i taua waa ko te rongomau me te rangimaarire i waenga i a ia, toona anoo iwi me ngaa Paakehe, te Kaawanatanga hoki. Ahakoa te aha koia te mea matua, koia i te takinga o ngaana whakaaro. Hei aha atu te huarahi me whai e ia me ngaana apataki ki te whakatutuki i teeraa whakakitenga ngoona, ka whaaia. Aua atu ngaa whiu me ngaa wero, ngaa maanukanuka me ngaa whakatara ka kookiri tonutia kia eke noa taana e whai nei.

Ko te hononga a Te Ua Haumeene raaua ko Kiingi Taawhiao he momo hononga i renarena i roto i ngaa tau. I runga i te nui o te tautoko me te whakapono a Te Ua ki te Kiingitanga i peenei hoki ai te kaha a too raaua hono.

Ko ngoo raaua whakaaro i rite, ko ngaa raaua karere tuku i rite hoki. Hei taa (Kirkwood, 2000, p. 87), koia teenei ngaa kupu i puta i a Te Ua,

It was on the first day of 1862, Gods message of love was taken to his forgotten and deserted people. It was the fifth day of September that the Angel Gabriel appeared to me. He asked me to keep my counsel (or start fasting) on the sins of my people. I subjected myself to much anguish for one day and I was like someone in the hands of children who utter untruths while their right hands are dishonest. Still my people considered me not, for they believed I was Mad. Yet God reminded me and asked them to take me into the midst of the people that my relations might taunt and chide me. Returning to the house of Shem. For the oppressing yoke has been flung off. The message of Gabriel was that I should reject warlike practice. That is to reject the heavy yoke of the flints of the rifles, that you might be glorified by God, that you might stand here on the roof of clouds.

Ko eenei kupu aana kaaore hoki i tawhiti atu i ngaa kupu i tongingia ake ai e Kiingi Taawhiao i runga o Rangiriri i te tau 1863. Koia teenei taana tongi, hei taa (Kirkwood, 2000, p. 87), “Ko te pakanga i runga i teenei motu kua rite ki te koka harakeke. Ko te tangata whakaara pakanga a muri ake nei, koia tonu hei utu”. Ko te whakapaakehaatanga e wheenei ana, “Beware of being enticed to take up the sword. The result of war is that things become like decaying old dried flax leaves. Let the person who raises war beware, for he himself will pay the price”.

Ma roto mai i ngeenei karere tuku a Te Ua, maa roto hoki mai i ngeenei tongi a Kiingi Taawhiao e maarama ana te kite he taangata huumaarie, he taangata whakaaro nui raaua ki te rangimaarie me te rongomau. Te hiahia ki te huri tuaraa atu ki te pakanga he rite. Ngaa whakapono i a raaua he rite, te whakaaro nui ki te oranga o te iwi he rite. Koia teenei he taapaetanga ki te momo o te hononga i hono ai raaua hei Poropiti, hei Kiingi.

I mate a Te Ua Haumeene i te tau 1866. I ruku hoohonu a Kiingi Taawhiao ki ngaa ngai nui me ngaa ngai roa o te poo i taana hinganga atu. Ka tuku a Taawhiao he owhaowha whakanui,

whakamahara ki a Te Ua Haumeene. He owhaowha teenei kua raangona whaanuitia i Waikato i ngeenei raa. Ko taua owhaowha e wheenei ana, “Kua paoho mai te reo o te Atua ki te kai ruuri o ngaa ia maarohirohi o te ao. Kei te ngoikore taua ia i roto i au, he wairua whakaaio. Kua whati taku ringa matau. E te Atua whakaritea mai tau piringa mooku i runga i teenei whenua” (Kirkwood, 2000, p. 91)

2.6 Te Puutake Mai

I ora mai ai teenei whakapono te whakapono Tariao, Paimaarire i muri tonu i te papaaohotanga a Kiingi Taawhiao i tana tongi kura e kiia nei “E Ua, e toru ngaa taonga kei te kapu o taku ringa, ko te Weeteriana, ko te Roomana, ko te Ingarangi. Homai tau kia kotahi ai taku ringa hei pupuru i ngaa taonga nei.” (Kirkwood, 2000, p. 115). Ka waha a Kiingi Taawhiao i teenei tongi kura ka whaanau mai ko te Tariao, ko te Paimaarire. He tangata whakapono a Taawhiao. He tangata whakapono ki ngaa momo haahi me ngaa momo whakapono o te ao Maaori ki taa Tainui titiro, me ngaa momo ao ki tua.

Ko te ao Mihinare teeraa e koorerotia ana, ko te Katorika teeraa e koorerotia ana, ko te Weteriana hoki teeraa e koorerotia ana. I whakaarohia a Taawhiao kia whakakotahi atu ai ngaa maataapono o toona taketaketanga ki te ao Karaitiana e puta mai ai teenei taonga ngoona.

Koia teenei tana paatai, koia teenei tana tongi koorero ki a Te Ua i runga i te mea ko Te Ua Haumeene te tangata naana nei teenei whakapono Paimaarire, Hauhau ki taa ngeetehi i waihanga mai ai. Ko te kaipuru i te mauri o te Paimaarire i mua i a Taawhiao ko Te Ua.

He mea nui kia maarama ai taatou, ahakoa he ritenga, he oorite raanei te Paimaarire a Te Ua ki taa Taawhiao, aa, ahakoa i puta hoki te whakapono Paimaarire a Taawhiao i te whakapono a Te Ua, he rerekee rawa ngaa taonga e rua.

Ko te wawata a Taawhiao moo teenei taonga e mau nei a Te Ua he wawata, he manako rerekee ki taa Te Ua i wawatatia ai, i manakohia ai. Ko te painga kee teeraa ki a raaua tahi. Ko te tino o Taawhiao me ngoona anoo hiahia he waihanga i teetehi whakapono moo te Kiingitanga ka noho mai ai i roto i te rangimaarie, i roto i te rongomau.

I puta te Paimaarire, te whakapono Hauhau raanei a Te Ua Haumeene i te waa o te pakanga me te mauaahara. He momo huarahi teenei i whakamahia e ia, e Te Ua hei putanga atu maana me toona iwi i ngaa pierenuku me ngaa mauaahara o te waa. Naa ngoona akoranga me ngoona whakapono ia i aarahi kia puta peenei mai te Paimaarire.

He mea kaupare i te kino e waatea mai ai raatou te huri tuaraa atu ki ngaa riiriri o te waa. Koia teenei te ahunga mai i te oorokohiimatanga mai o te Paimaarire.

Hei taa (Paperspast, 1876), e kiia ana i te tau 1876 ko te hanganga mai o ngaa karakia Tariao he karakia kino. E whakataurite ana ngaa koorero o teenei atikara i ngaa karakia Tariao ki ngaa karakia a te Paakeha. E mea ana te atikara nei he taunakitanga ngeenei karakia ki ngaa karakia o Te Ua Haumene. E kiia hoki ana kia huri tuaraa atu ngaa Maaori ki teenei kaupapa, a kaua e whakapaakau atu, whakaratarata kee ki ngaa karakia me te whakapono a te Paakeha. E kaumingomingo ana ngaa whakaaro i pupuu ake i ahau e paanui ana i ngaa koorero i te mea, kei ngaaa koorero e haangai ana ki ngaa karakia i karakiatia e Te Ua, he koorero toorangapuu o roto, ko ngaa koorero kei ngaa Karakia Tariao, ko te nuinga he kupu whaikaha, he kupu whakaora, he kupu atua Maaori hoki.

Inaa hoki, hei taa (To pot down paimarire fanatics, 1856), he whakapono koohuru tangata te Paimaarire, aa, ko ngaa tikanga whakahaere o roto i te Paimaarire he tikanga whakamate tangata, he tikanga kai tangata, he tikanga koohuru taurekareka hoki. Ka whakaraarangi hoki te atikara nei i ngaa tohutohu i waihotia mai e Kuiini Wikitooria ki a Kaawana Hoori moo te hunga whakapuumaui i te Paimaarire.

Ko aua tohutohu raa he mea haukoti, he whakakaahore, he whakamate i ngaa iwi e haapai ana i teenei whakapono te Paimaarire. E hihiko ai te hirikapo ki ngaa momo koorero me ngaa momo tuinga wheenei i te mea e kitea ana te tirohanga mai, te tirohanga atu o te Paakehaa i ngeeraa raa ki ngaa kaupapa maaori i whakatuuria e ngoo taatou tupuna. He whakapono whakangaakau maarie te Paimaarire, koia ahau i aahua ohorere ai, wheoi, he mea nui kia aata kite, kia aata matapaki i ngaa momo tirohanga e whakapaakau ana ki aku rangahau.

He mea nui ngaa koorero nei i runga i te mea, he tirohanga taa teenaa, taa teenaa ki ngaa tikanga Maaori. Ko te me kee, maha rawa atu o taatou o Waikato he iwi whakapono ki ngaa waihootanga mai o Kiingi Taawhiao, he waihootanga whakakotahi, whakapono ki te aroha me te rangimaarie.

Ko ngaa koorero me ngaa taipitopito moo te reetootanga o te whakapono ake o te Tariao, o te Paimaarire me te Hauhau hoki i eeteahi waahanga ka tuhura atu hei te upoko tuatoru e kiia nei Io Io Rangi Io io Whenua. Koia teenei te puutakenga mai, te mahuritanga iho o te Tariao, o te Paimaarire.

2.7 Whakakapi upoko

Mai i ngaa koorero kua whakatakotoria ake nei, kua tooia mai te whakairotoanga o te waka Tainui, me toona terenga mai i Hawaiki ka uu ki te paa herenga ki Kaawhia raanoo. Kua whaohia a Tainui me ngoona takahanga i teenei te takenga mai o ngaa pane Ariki taatai whakaheke o Waikato. Mai Hoturoa ka heke te Mauri tuatahi o te motu ki a Pootatau. I a Tainui ka puta mai ki waho ko Waikato. I a Waikato ka puta mai ki waho ko Ngaati Mahuta. I a Ngaati Mahuta ka puta mai ki waho ko Taawhiao. Te Tariao takitaki i te whakapono e rangahautia ana e au. Ko ngaa parenga o Waikato me toona whakatakotoranga ki runga tonu ki te puku o te ika kua tukuna kia rere i konei taa te mea koia teenei te iwi e taawharautia nei i te Kiingitanga me ngoona Kiingi, Kuini o te poo tau mai raa ki a Kiingi Tuheitia i teenei raa.

Maa roto hoki mai i eenei haepapa ko te whakauu i ngaa puumanawatanga o te Kiingitanga me ngaana anoo whakapono. Ko Kiingi Taawhiao i hikitia, ko Te Ua Haumene i haapai ake, ko te hononga maarohirohi i a raaua i whakarewatia ki runga hei tohu i te oranga mai a ngaa raaua whakapono e ora tonu mai ana i teenei raa. Aua atu i oo te nui te iti raanei o te ora o ngaa taonga, ngaa whakapono i ahu mai i a Taawhiao raaua ko Te Ua, ko te mea nui kei te ora.

Koia teenei e aaki nei ki te rae o te whakaoranga, te oranga, me te orangatonutanga o ngaa tukuihotanga o ngoo taatou tupuna. I runga i eenei koorero, ka whakamau atu te titiro ki te whakapono ake. Kua rumakina te kaakano moo te puutakenga mai o te whakapono nei. Kua tae ki toona pihinga ake, kia pihi, kia pihi ake ai.

Upoko Tuatoru: Io Rangi, Io Io Whenua

3.1 Kupu whakataki

I te upoko kua hori i waahia te urutapu nui, i tukia ki runga ko ngaa uri a Haio i tuu ai ngaa whakapono nei. I teenei upoko ka mihia ka whakatauhia ko te Kiingitanga he maahere rautaki whakakotahi i puta mai noo muri tonu mai i te rironga whenua i Rangiriri. Ko ngaa koorero i tuu ai teenei taonga whakakotahi i ngaa iwi, teenei taonga whakapuru toto, teenei taonga whakapuru whenua hoki.

Kaaore hoki he kaupapa koorero i koo atu i te Kiingitanga hei taunaki i te kaupapa e taahuhu kau ana i teenei tuhinga. I te korenga o te Kiingitanga ka whakapono kore taatou. I runga i te mea i ora teenei taonga hei oranga moo te iwi, i puurangiaho mai teenei whakapono te Tariao. Ko te reetootanga o te Kiingitanga ka horahia ki te upoko nei.

I muri mai, ka tirohia ko te Poukai. He puna kai, he puna taangata teenei kaupapa i whakatuuria e Kiingi Taawhiao. Koia teenei teetehi o ngaa kaupapa ka noho motuhake ai ki ngaa kaiwhakapuumau i te Kiingitanga. Ko te Poukai teetehi kaupapa i taapae atu ki te oranga o ngaa karakia Paimaarire me ngoona tikanga whakahaere hoki.

Ka noho mai ko te Paimaarire hei karakia tiimata, hei karakia whakakapi hoki i ngaa Poukai puta noa i a Tainui waka. Me koorero te Poukai me toona hoohonu, me toona rangiwhaawhaa i ngoona homaitanga ki te Paimaarie, ki te Tariao hoki.

Ko te whakapono ake ka matapakihia, ka whakatewhatewhangia i teenei upoko. Ko te aahuatanga ki ngaa momo tikanga whakahaere i eera raa, me ngaa tikanga whakahaere i eenei raa. Ko te aahuatanga ki ngaa Tariao taki karakia me ngoona tikanga teeraa ka wetewetehia. Ngaa tohu e Tariao mai ai te tangata hoki.

Ko te aahutanga ki ngaa ngehe hoki teeraa ka wetewetehia. Ae raanei he tikanga teenei me whakarauora, kaaore raanei. Ka whoatu atu hoki ko ngaa Kura e toru me ngoona kupu hei tirohanga. I muri mai, ka wherawherahia ko ngaa tikanga me ngaa kura huna e mau nei ki Te Kura o te Ahiahi, ngoona puukenga ngoona waananga, ngoona tauira.

Aa, ko te momo o te reo i whakamahia e Kiingi Taawhiao hei tuhi i ngaa karakia teeraa ka tokitaararautia. Anei ngaa kaupapa e kookiri ai te maaramatanga, e tuhura ai ngaa tukuihotanga moo runga i teenei upoko teenei te haere nei.

3.2 Rangiriri

He taua he taua
He taua Hurunuku aatea
He taua Parawera nui
He taua Tahu Mawake
He taua Tahu Makaka e i e
E te Kawana o te tau 1863
E Taa Kerei u e
Me ou huruhuru
O te tara a Kuini Wikitoria
Taa Kerei pokotiwaha
Taa Kerei arero tipatipa
Taa Kerei hei kai maaku
Taa Kerei naana I whiti
Whiti whiti atu
I te kohu o te rua taniwha
Waiwaia, Te Ia Roa , Karutahi
ko te awa o Mangatawhiri e
He raupatu aa Ture
He whanako aa Ture
He kohuru aa Ture
He pawhera whera aa Ture
Pokokohua e ii e
E kii E kii
A hii
E kii E kii
A hii
E kii raa
Homai ou kupu kia wetewetea

Mua te waiehu e koro

I taku kohua taureka

Ka pau katoa a tauwi

I ahau te patu

Nge nge nge

Rangiriri

Ka ngapu te whenua

Ka haere ngaa tangata ki whea

Ruaimoko purutia tawhia

kia ita a ita ita

Ki te mate ngaa Tane

Me mate hoki ngaa waahine

Me ngaa tamariki e

Rangiriri

Ka Paakoo ai ngaa Keenana

Ka pakuu ai ngaa puu

Pu pu aa purari hua

E ko te ahi a te tipua

A Mahuika

Turamarama

Tamatea-kai-ariki

Tamatea a ngana

Tamatea a aaioo

Tamatea whakapau

Tutohu ahiahi whakarere hapara

Ariroa e

Kei riro aue

Kei mate aue

Na na na to kai

Nge nge kaitotehe

E Poo taa Te Wherowhero

He wai e kapua

Paheke I te rangi

Ki te whenua

Ka horowai hoopuapua
Ka mimiti
He Mangumangu
He Mangamangu
He Mangumangu Taipo
He waimanawa whenuatuhatuha
Kore mimiti mutunga kore
Tu te Kiingi ki Waikato
E ko Kiingi Tuheitia
Hau hau hau hi
(Totorewa, 2013),

Ka noho mai ai teenei haka hei haka waawaahi i ngaa koorero. Ko te haka e iri mai nei naa Brad Totorewa i tito i te tau 2013. He mea tito e ia hei taa (Totorewa, 2013), tuatahi hei haka whakamaharatanga ki ngoo taatou tuupuna i tuu kiriuka ai. He haka i hakaina hoki moo te raa whakamaharatanga o ngaa tau 150 i rewa ake ai taua riiritanga. Koia teenei he haka e maarama puu ai te hunga whakarongo ki te take i uru mai ai te Paakehaa ki roto ki a maatou o Waikato.

Aa, ko te whakahorohoro i aa te Maaori o Waikato te take. Ko too taatou whenua te take anoo hoki. Heoi anoo taa teenei haka e kiia ake ana, anei tonu ko ngaa uri o te raupatu e ora tonu mai ana. Ko Waikato tangata he tangata kore mimiti, he tangata mutunga kore.

Ki taa ngaa puu koorero wheenei me Raahui Papa, wheenei me Brad Totorewa ngaa tino e ora tonu mai ana e moohio matatau ana ki ngaa koorero moo te Kiingitanga, moo Rangiriri anoo hoki, ko te rewanga ake o te Kiingitanga te take i tangi ai te puu a te Paakehaa ki runga ki ngoo taatou tuupuna. Heoi anoo, he mea whakakite teenei pakanga e ngoo taatou tuupuna noo muri tonu mai i te whakawhitinga koorero i ara ake i waenga i a Kaawana Kerei raaua ko Pootatau Te Wherowhero.

He mea nui e maarama ai taatou ki ngaa koorero me ngaa kura huna i roto i teenei whakawhitinga koorero i runga i te mea ko ngaa whakakitenga i koorerotia e Kaawana Kerei, e Pootatau hoki, he whakakitenga i tutuki atu, i mahuta ake. Koia teenei taua whakawhitinga koorero.

Whakawhitinga koorero	Whakapaakehatanga
<p><i>Kaawana Kerei</i></p> <p>“Te Wherowhero, tukuna i too Kiingitanga ki raro, mei kore ake, teenei ka whakaara pakanga i runga i teenei whenua moo te 7 tau, 8 tau, 9 tau haere ake nei haere ake nei kia mate katoa koutou.”</p> <p><i>Te Wherowhero</i></p> <p>“E kore e taea te peewhea, noo ngaa Rangatira katoa o te motu teenei taonga. Kitea ana, pakanga mai raa ka aatete atu maatou moo te 7 tau, 8 tau, 9 tau haere ake nei e kore maatou e hinga.”</p> <p><i>Kaawana Kerei</i></p> <p>“Te Wherowhero he Kau taaku, i naa noa ngaana keakea huhuarau. Urutomokia teenei Kau ki roto i a koe, ka pau katoa ngaku Kau i ngoo maanga wai te inu.”</p> <p><i>Te Wherowhero</i></p> <p>“Me he wai he kapua paaheke i te rangi ki te whenua, ka horowai hoopuapua ka mimiti. Engari a</p>	<p><i>Governor Grey</i></p> <p>“Te Wherowhero, do away with your Kingship, for if you don’t, I will wage war upon you and your people within these lands for seven years for eight years for nine years and more until you are no more.”</p> <p><i>Te Wherowhero</i></p> <p>“I cannot. This taonga does not belong to me; it belongs to all the Rangatira of this Country. However, if you wage war upon my people and me within these lands, we will resist you, for seven years for eight years for nine years and more, we will not go away.”</p> <p><i>Governor Grey</i></p> <p>“Te Wherowhero I have a Cow, this Cow contains extensive progeny. If I let this Cow lose within your lands, it will drink of all your waterways until there is no more, until they are dried up.”</p> <p><i>Te Wherowhero</i></p> <p>“If it is merely rain formed in the clouds soon to fall to the ground to form puddles only to be dried up by the Sun then maybe your Cows can consume all the</p>

<p>Waikato he wai manawa whenua tuhatuha, e kore e mimiti, he mutunga kore ee.”</p>	<p>waterways. However, the people of Waikato are from a great spring deep in the earth. We will not dry up, nor will we go away.”</p>
<p><i>Kaawana Kerei</i></p> <p>“He aha hoki raa he kai maa koutou? E ora ai, e ukaukatia too iwi i te aha?”</p>	<p><i>Governor Grey</i></p> <p>“What then will you eat old man? How will you sustain yourselves?”</p>
<p><i>Te Wherowhero</i></p> <p>“He Roi, he Para, he Mamaku, he Hiinau i naa raa ngaa kai a te ao Maaori.”</p>	<p><i>Te Wherowhero</i></p> <p>“We will eat Roi, Para, Mamaku, and Hiinau. We will sustain ourselves with our natural resources.</p>
<p><i>Kaawana Kerei</i></p> <p>“Pau katoa i a koe ngoo kai, he aha hoki raa he kai maa koutou?”</p>	<p><i>Governor Grey</i></p> <p>When your food is all but gone, what then will you eat?</p>
<p><i>Te Wherowhero</i></p> <p>“Ko koe hei kai maaku!”</p>	<p><i>Te Wherowhero</i></p> <p>“I will eat you!”</p>

(Rnz, 2021)

Koia teenei he whakawhitinga koorero i ara i waenga puu i a Pootatau raaua ko Kaawana Kerei i mua tonu i te whakawaawaahitanga o Pootatau hei Kiingi i te tau 1858 hei taa (Papa, 2021). Ko te ito o te koorero kaaore hoki i tawhiti atu i teeraa o te ito o te haka e waawaahi nei i ngeenei koorero.

Kia takakino maroro ai te Kiingitanga i te tuatahi. Kia tutuki i a Kaawana Kerei teenei hiahia ngoona, ko te taamatemate o te iwi o Waikato te putanga iho hei taa (Totorewa, 2021). He mea whakamanamana hoki i te kaawanatanga o taua waa hei mana tiketike oo runga i ngaa whenua o Waikato, o Aotearoa whaanui hoki e ai ki a (O'Malley). I uaua kia ea ai, kia tutuki ai teenei toomina o Kaawana Kerei i runga i te kaha o te Kiingitanga. I kaha ai raatou, otiraa a Waikato taa te mea, noo raatou ngaa whenua haumako. Naa raatou aa raatou ake rawa wheenei me ngaa miira paraaoa, ngaa maara kai, ngaa kaipuke kawe kai ki taawaahi hoki. Koia i peeraa rawa ai too raatou kaha.

Kaaore hoki i te koorero moo te tatoko o iwi kee atu, ko Waikato noa iho teenei e koorerotia ake nei. Te kupu whakahoki a Kiingi Pootatau ki a Kaawana Kerei he kupu whakauu ki te mana i tau mai ki runga ki a ia e ngaa kaawai rangatira o te motu. Naa raatou a ia i whakamana hei Kiingi, kaaore nei ia, a Pootatau i pakanga kia Kiingi mai ia, he mea tohua e te motu. Naa kona i turaki kore ai ia i toona tuuranga hei Kiingi, tau iho mai ki te kaupapa o te Kiingitanga hoki.

Ko te peewheatanga o te kaupare atu i ngaa kupu whakatumatuma a Kaawana Kerei taa Pootatau i whakatakoto hoki. Hei taana, hei taa Pootatau, “ka aatete atu maatou i a koutou, haere ake nei, haere ake nei.” Koira te whakahirahira a Pootatau. He aha koa taana i kite atu, he aha koa ngaa kupu oati a Kaawana Kerei e tuu mai ai he pakanga, i uu tonu a Pootatau ki taana i whakapono ai.

Ko te Ture, ko te whakapono, ko te aroha, ko te rangimaarie hoki. He uaratanga i takea mai i ngoona tupuna. Aua atu ngeenei uaratanga, me mahara tonu taatou, he Ariki Tuu-Ririnui tonu a Pootatau wheenei me toona anoo matua a Te Rauangaana, ae, ehara i te mea kaaore nei a Pootatau i moohia ki te pakanga, ehara hoki i te mea i matakou a Pootatau, e kaaore. Ko whakauu taana i moohiotia, taana i whakaponoahia. I konei panonihia ngaa kupu a Kaawana Kerei, engari ko te horopaki o ngaana anoo koorero i orite.

I wheenei ia i runga i toona whakapono, kaaore nei i te peeraa rawa te koi, te kura rawa raanei a Pootatau e maarama ai ia ki taa Kerei e koorerotia ana. Ki te aata matapaki te kaipaanui i taa Pootatau whakahoki koorero, e kitea ai, e maarama hoki ki te karu paanui he hirahira ake, he taumata koorero ake taa Pootatau teenaa i te taumata i koorerotia e Kaawana Kerei.

Ko toona whakahoki he whakahoki e ea rawa ai te koorero, he iti te kupu, he nui te koorero. He iti te kupu, he mana te koorero. I roto i ngoona kupu, ngaa kupu a Pootatau, ngaa kupu moroiti noa iho nei, ko ngaa atua taana i whai, mai te rangi ki te whenua me ngaa atua o waenga nui i a Rangi raaua ko Papa. Ko te taiao taana i waha. Ko toona awa tupuna a Waikato taana i waha me toonaa reetootanga, toonaa rangiwhaawhaatanga hoki.

Ko Waikato tangata, Waikato iwi taana hoki i waha ai. I konei eke ai te koorero “He piko he taniwha he piko he taniwha, Waikato taniwharau.” Ko te oranga tonutanga taana hoki i koorerotia ake raa. Te oranga tonutanga o toona whenua toona taiao hoki, taea noatia ki te oranga tonutanga o toona iwi me ngaana anoo mangainga. Ko taa Kaawana Kerei koorero he mea koorero pakanga maa roto mai i te whakatauiria i te kau hei hoea Paakehaa e horo nei i te whenua, i te tangata, i te wai. Ae, he kereewa, hoi anoo, toona kereewa nei. Kaa mutu i konei he kupu whakawetiweti tonu taa Kaawana Kerei. He koorero muru i te whenua, he koorero muru i ngaa kai, he koorero paawhera i te tangata, te taane, te wahine, te tamariki, tatuu atu ki ngaa kauheke, kaumaatua hoki.

I puta te paatai i a ia, i a Kaawana Kerei ki a Pootatau, “he aha taana hei kaupare i ngeenei mahi, he aha hoki hei kai maa Pootatau?” Ko te whakahoki a Pootatau he whakahoki e koorero tonutia i teenei waa tonu. He peeraa rawa toona hirahira, toona rongonui. Hei taa Pootatau, “ko koe hei kai maaku.”

Ka tooia mai ko te pae tawhiti kia tata, aa, ka ara mai ko te tau 1863 ko te whakatiinanatanga teenei o ngaa koorero a Kerei. Ko te tomokiatanga teenei o ngaa kau moomona, ngaa kau horo whenua, ngaa kau horo wai, ngaa kau kaawana me ngaa kau whakahoro i tawhiti whaamaamao. Ko te ngahorotanga, ko te taamitanga, ko te parekura, ko te taahae o ngaa rawa katoa i a maatou, i a ngoo taatou tuupuna.

Ehara ko te whenua noa iho ngaa rawa me ngaa taonga e koorerotia ana. Ko ngoo taatou tikanga iho-atua, ko ngoo taatou tikanga iho-matua teeraa. Ko ngoo taatou kawa teeraa. Ko ngoo taatou moohiohia teeraa. Ko ngaa koorero tuku mai i te taioretanga o ngoo taatou tuupuna teeraa. Ko

matatau ki ngaa taaonga a Tuu teeraa. Ko ngaa toi Maaori, te whakairoiro, te mokohanga o te kiri teeraa. Ko too maatou maatauranga teeraa. Ko te reo Maaori teeraa me te huhua anoo o ngaa rawa teeraa i riro. Me i riro kore, i taamatemate, i rengarenga tuakoka rawa.

Ko ngoo taatou tuupuna i tahuri atu ki ngaa momo aahuatanga nei i rongo i kite raanei i te ao i noho ai, i roa hoki ai raatou. Ko aahuatanga o ngaa kai, ko te waipiro, ko whakatuma, te rereke o te whenua me te wai. Ko te pooharatanga teeraa hoki. Poohara aa rawa, aa tinana, aa hinengaro, aa wairua, aa whakapono hoki. Katoa mai ngaa tuukinotanga e whakaaro nei e te tangata, he mea rongo e ngoo taatou tuupuna i muri tonu i te raupatu i rewa ake ai ki runga o Rangiriri.

Toomuri mai i te puutake o te riri kaaore i ngata te hia a te Paakehaa i te rironga atu o ngaa tino taonga a te Maaori. Hei taa (O'Malley, 2021), he peeraa rawa te whakaaro iti o te Paakehaa ki a taatou tuupuna i tanumia ngaa maatou tuupuna i hinga ki roto ki te rua kooiwi kotahi. Ko taua rua kooiwi kei Rangiriri tonu e pupuru ana ki ngaa purenga wheua o ngoo taatou tuupuna. Ngaa hoia Paakehaa i hinga, i tukuna rawatia ki ngaa raatou rua takitahi. I teeraa whakatiinanatanga ake, e rongo nei i te hinapouuri o te ngaakau. Heoi anoo raatou i ora, i mauheretia ki Rangiriri.

I mauheretia ki roto ki teetehi whare karakia i reiraa. Koia raa te whare karakia i whakamahia mai e te Paakehaa hei huarahi tahuri i te whakaaro Maaori ki ngaa whakapono o tuamotu. Ngaa moorehurehu tupuna i mauheretia, maa raro i heria ki Papakura raanoo maa te ara tahaki o Waikato. Ki koraa raatou tuupika i teetehi kaipuke horo-ngaru. Ko ngeenei tuupuna i maaunu ki runga ki te puuaha niwhaniwha o Manukau o te Waitemataa moo ngaa marama e toru. I roto i ngeenei marama e toru kaaore i whaangaihia, kaaore he rama, kaaore he kai, kaaore he aha.

Ka mutu te toru marama ka tatuu atu ngoo taatou tuupuna ki runga ki te moutere o Kaawau mauheretia ai anoo. Ko te painga o taua mauheretanga, i taaea ai ngoo taatou tuupuna te whawhati kau i taua mauheretanga. Naa konei i puta ai te koorero a Whitiora Te Kuumete e mea ana "He manu ka motu i te mahanga e kore e taea te whai." E haere ake nei ko ngaa ingoa o ngoo taatou tuupuna i mauheretia.

Nгаа Tuupuna Mauhere

Tiororo Te Hura
Pairoroku Tuhikita
Kihirini Te Aho
Te Rakato Tokoahu
Piripi Matewha
Tame Hokianga
Mohi Rahiri
Wiremu Whanatangi
Hohepa Motuiti
Aperaniko Te Pahu
Heperi Tioponga
Penehamene Ngawawa
Kipa Te Hiti
Rihari Pukauae
Kereama Tena
Ririmu Pehi
Heta Te Rewatahi
Eruena Maihi Nekeneke
Matene Te Kini
Parera Tuhoropunga
Karepa Pakiuma
Ngataru Te Paeahu
Tepene Te Pae
Tangi Te Pakaroa
Hoera Hitari
Eruera Te Mahia
Mikaere Marunui
Maihi Rori, o Te Maere
Totaea Katipa
Ihaia Te Maunga
Raniera Te Whiti
Tipene Te Tahua

Perereka Ngahiwi
Maihi Whareuwhi
Tiopira Pehitaua
Enoka Pani
Watene Raniera
Hemi Tahu
Pene Kuki
Kakiwhati
Hona Te Wanikau o Waitutu
Winikerei Urumaiwaho
Karaka Tuaraiti
Taho
Arama Ngawaka
Raharuhi Te Moanao Pokeno
Nikora Karaweta
Te Tapihana Tiriwa o Kowaiari, Waipa
Te Remihana Tiriwa
Te Muunu Hiahia
Te Roia Parawhau
Hone Reokore
Riwai Pikia
Te Hapimana Maunga
Te Harawira
Hokopa
Riwi Te Wharemate
Hatama
Timeu
Hone Te Ahiwaka
Hemi Ahipu
Hepanaia Te Motukowhai
Hakiaha Te Toki o Waipa
Paora Puketaha
Timoti Te Wharau
Pirongia

Pene Tahataha
Takerei Te Rau o Meremere
Hapi Hamaka
Honatana Nganiti
Panapana
Te Manihera Kewini
Ihimaira
Matiaha Te Poho
Hairuha
Himiona Te Taiki
Nikorima Te Ikapoto
Panapana Te Tawhera
Horima Te Naihi
Haratiera Te One
Henare Te Tutuhau
Matiaha Tahapa
Tahata Ngataru
Werahiko Te Koputa
Wi Tara Te Taiepa (Iho)
Pepe Ngurunguru
Ihaka Te Iti
Ihaka Hamaka
Inoka Pehitahi
Ruta Haowhenua
Te Harini Whiti
Te Kepa Parengarenga
Te Reweti Te Nukuroa
Pehimana Te Kuri o Aowhitu
Totaea Tirohanga
Rikawa
Pumipi Tonganui
Rangitakinga
Paneianga Toka
Tipene Te Tiki

Pehimana Te Raihe
Te Wheke
Panapa Te Pua
Tuawa Haka
Reihana Te Ngohi o Rangiriri
Waikato Te Tawhana
Hori Te Paki
Hirini Te Waiwai
Aihe Komuru
Raniera Kaihu
Te Rakena Te Paewai
Hakiaha Terehu
Paha
Rapata Te Rere
Hapeta
Wiremuhana
Te Waata Taki o Te Kuta
Eruera Pahoro
Erueti Maki
Hopa Kaewa
Pairama Tiki
Enoka Ngatoa
Hemara Pana
Hunai Te Moke
Makoare Raparapa
Hori Taitaia
Hoera Hingaia
Hemi Hoera
Aperahama
Paraone Te Rangi
Wiremu Kumete o Kawhia Takatahi
Maka Waitere
Wiremu Tupuhaere
Hone Hunu

Mohi Rangipupu
Mira Waitotara
Maka Hangoro
Taneti
Wiremu
Hemi Te Iwingaro
Wiremu Te Pakaru
Te Karaka Te Hiakai
Patoromu
Ihaka Te Tahua
Wiremu Te Awhe
Wiremu Tukino
Horomona Wahanui o Paretata
Eruera Te Whare
Rihia Haperoa
Ihaka Marekai
Hori Taiepa o Te Kopua
Taneti Paeturi
Pene Paeturi
Te Wirihana
Matiu Kahukoti o Takatahi o Te Maika
Ihaha Te Wahapiro
Aihe Kahu
Epiha Koroiri
Te Ropiha Koroiri
Hori Toti
Hori Tarore o Horahora
Ikamate
Wetere Ngamuka
Hirini Tete
Wiremu Tamihana Kopa
Henare Komene
Mohi Tahuri o Poihakena
Hone Kingi Te Whakainu

Hemi Warihi Tikao
Paikao
Wiremu Tauoru
Pehimana Ngatoka
Reupena Te Ori
Hone Kuruki
Meihana Ngawhai
(Zealand, 2015),

He mea tiki atu eenei ingoa i (Zealand, 2015), anoo hoki i ngeetehi rauemi maatauranga i mahia mai e te kaumupene Kaarihi limited ngaatahi me Waikato-Tainui. Ko te hirahira o teenei raarangi ingoa e taea ai e te kaipaanui te kite mehemea ko toona tupuna i taapae atu ki te kaupare i ngaa hoariri Paakehaa kia ora ai ko ngaa raatou tamariki mokopuna.

I puaawai ai te kupu a Kerei moo te tuukinotanga i wawatatia ai e ia ki a maatou o Waikato. Engari i puaawai ai hoki te kupu a Pootatau e mea ana, “Engari anoo a Waikato he waimanawa whenua tuhatuha e kore e mimiti, he wai mutunga kore”. Ko ngaana anoo uri taana e koorero nei, Ko Taawhiao, ko Mahuta, ko Te Rata, ko Koroki, ko Te Arikinui Te Atairangikaahu, ko ngaa Kiingi me te Kuiini o te poo taea noatia ki a taatou ngaa uri o Waikato e ora tonu mai ana.

E aatete whakamua tonu ana. E whawhai tonu ana kia kore e moumou ko ngaa mahi i mahia mai e raatou kia ora tonu mai taatou, aa, kia whai taaonga tonu ai taatou. I naa hoki raa te koorero o Waikato “ahakoa he iti taku ngohi he rei kei roto.”

Ko te haangaitanga o ngeenei koorero ki te whakapono Tariao, ki te whakapono Paimaarire hoki ko te mahuritanga mai o teenei whakapono i runga i ngaa pierenuku o taua waa. Wheenei nei me ngaa tongi koorero a Taawhiao moo te aahuatanga ki te anga whakamua, ki te kaupare i ngaa riiriri, ki te whakauu i te rangimaarie, ki te whakamutu i te pakanga, ki te whakapono ki te Atua. Ngeenei tuu aahuatanga katoa, whakakotahi atu nei. Mei kore ake eenei pierenuku, kua kore teenei whakapono, koi tuumatapoongia. Kaaore ahau i te kii ko ngaa whakahaaweia i hua mai he mea pai, kaaore, kore rawa atu. Engari kee ko te maaramatanga i kitea atu e Taawhiao i roto i te poouriuri me te poo tangotango ko te whakauu ki ngoona whakapono. Whakapono taketake, whakapono karaipiture, whakapono Tariao, paimaarire hoki. Hei painga,

hei oranga, hei whakakotahi i te iwi i raro i te tika i te pono, i te rangimaarie me te aroha o teetehi ki teetehi, hei aha te aha, hei aha te aha.

3.3 Kiingitanga

Ko ngaa tapu o tua whakarere e tare mai nei. Ko ngaa raatou koorero moo te oorokohiimatanga o te Kiingitanga, toona kaupapa i tuu ai te Kiingitanga, ngngoono paanga, ngoonga momo kaupapa huhua hoki teenei te haere nei. Heoi anoo, ko ngaa kupu whakamaanawanawa teenei e tiihooka tahi atu ana mai i ngaa ookapua ka tau ki te taketake o Taupiri. Ko Taupiri te whakauenukutanga o ngaa upoko Ariki o te poo. Moe mai raa koutou kei ngaa tapu, kei ngaa ihi, kei ngaa mauri o tuawhakarere. Paimaarire.

Kiingi Pootatau, Kiingi o te tika. I waawaahitia i te tau 1858, hei taa (Te Hurinui, 2010).

Kiingi Taawhiao, Kiingi o te maungaarongo. I waawaahitia i te tau 1860, hei taa (Kirkwood, 2000).

Kiingi Mahuta, Kiingi o te rangimaarie. I waawaahitia i te tau 1894, hei taa (Kirkwood, 1999).

Kiingi Te Rata, Te taupoki whakamaarieo te taapenakara o te whakaoranga o taa te atua i pai ai. Koia raa i waawaahitia i te tau 1912, hei taa (Kirkwood, 2001).

Kiingi Koroki, Te mana Motuhake o ngaa waka katoa o te motu. I waawaahitia i te tau 1933, hei taa (Kirkwood, 1999).

Te Arikinui Kuini Te Atairangikaahu, Naa te ao katoa I waawaahitia i te tau 1966, hei taa (Kirkwood, 2001).

Naa, kua takoto ko ngaa koorero moo runga mai o Rangiriri me te pihinga ake o ngaa riiriri whenua i te taatuututanga o te Kiingitanga. I konei takoto ai ko ngaa koorero moo teKiingitanga ake. Ko ngaa raangai ariki o te poo e tare ana. Koia ka noho hei taahu matapuu i ngeenei koorero i runga i te mea kaaore nei he taumata atu i oo te taumata tapu i noohia ai raatou. He mana tiketike, he mana rangatira.

Ko te Paki o Matariki ka taarewa i te rangi. He mea puuhia e ngaa hau a Taawhiri. Aa, Ka tika kia puuhia he koorero i konei mngoonaa moo taua taonga, moo taua tohu i toona paanga hoki ki te kara o te Manawa o te Kiingi a Tuheitia. Koia raa te mana takitaki i a taaou, aa, e tika ana kia taki hoki he koorero i teenei tuinga. Hei te kura o te ahiahi e mea ana “Uenuku o kara e rongo te ao.” Hei taa (Papa, 2016), ko te Paki o Matariki koia teenei te tohu o te Kiingitanga na Tiiwai Paraone me Te Aokato i waihanga i runga i ngaa tohutohu a Kiingi Taawhiao. Inaa raa te reetootanga o ngaa koorero me ngaa tikanga o te tohu nei.

Ka koorerotia a Aituaa raaua ko Atua e noho nei hei tohu whakamaharatanga ki ngaa tuupato. Ka koorerotia a Matariki ki taa Tainui titiro he tohu aarahi, he tohu onamata, he tohu anamata, he tohu manaaki hoki. Ka koorerotia te Manawa, koia te tohu o te whakapono, atua Maaori mai, atua o ahurea kee mai raanei, aa, he mea whakahiapo i ngaa aahuatanga wairua hoki. Ko Koopu teera ka koorerotia me tana mahi tuitui i ngaa tikanga o mua tatuu mai ki ngaa tikanga o naiane, koia raa te koorero, ko taku mua taku muri. Ko ngaa tohu hoki wheenei i te tootoo kai, tootoo kaakahu me te Mana Motuhake. Katoa ngeenei tohu he mea whakahirahira, he tuaanui, tuaaroa moo te Kiingitanga me ngaana taura muka huhua, mahi roroa hoki.

I konei ka tahuri ake ki ngaa koorero moo te taatuututanga o te Kiingitanga. He nui ngaa taupatupatu me ngaa tauwehenga whakaaro o roto i ngaa roherohenga a Tainui moo te taatuututanga o te Kiingitanga. Ko taaku he whakatakoto i ngaa koorero kua tarawhati mai ki ahau i ooku maatua, i ooku tupuna anoo hoki a, ka uuwhia rawatia ki teenei tuinga whakapae. Me te mea hoki, he nui ngaa pukapuka, ngaa atikara, ngaa kiriata me te aha noa kua tuhia e te Paakeha, e Maaori hoki moo teenei kaupapa. Kua tooputahitia aua koorero ki ngaa koorero ka uuwhia.

Ka kaikanohi atu ki o ngaa tau 1840 – 1850. Hei taa ngaa Maaori o Waikato, koi kiia ko ngaa tau tiketike eeraa o ngaa tau katoa a te iwi o Waikato, o Tainui waka whaanui. Ka kii peeraa te iwi o Waikato i runga i te mea naa raatou te taioohanga. Naa raatou te nuinga o ngaa rawa hoki wheenei nei i ngaa maara kai, ngaa mira mahi puehu paraaoa, ngaa kaipuke kawae kai ki wiiwii, ki waawaa, naa raatou hoki te whenua. I taua waa tonu he nui ngaa Paakeka i tau mai ki ngaa tahatika o Aotearoa. Ko te whenua te take. He nui te pakanga i teeraa waa hoki, Maaori ki te Paakehaa, Maaori ki te Maaori. Ka whakaarohia e oo maatou tuupuna ngeenei aahuatanga katoa, aa, ka toko te whakaaro kia waihanga mai ai teetehe maahere rautaki hei kaupare i eenei tuukinotanga o te waa. Ko te maahere rautaki taaku e koorero nei ko te Kiingitanga.

Ahakoia ko Waikato te uho o taaku e koorerotia nei, ko teenei aahuatanga i ara ake i roto i a Aotearoa whaanui. I runga i teeraa whakaaro, ko taa *Te Kotahi Rau e Rima Tekau Tau o Te Kiingitanga* (2008), ko Hongi Hika o Ngaapuhi teetehi o ngaa tuupuna i whakaarohia teetehi maahere rautaki. I puta i a ia te whakaaro kia tuu ia hei Kiingi. Ko Pirikawau o Te Atiawa Taranaki hoki teetehi i hiahia ki te tuuranga Kiingi.

Hei taa *Kotahi Rau e Rima Tekau Tau o Te Kiingitanga* (2008), koia teenei he whakaaro i puta i a Pirikawau nngoono i Ingarangi. Ka kite ia i te nohotahitanga o te tangata. Ka kite ia i te ngaatahitanga o te ngaa ope taua. Ka kite ia i te kotahitanga e horapa nei i te motu. Ko te paatai i puta i a ia ki ngaa kiritea o teera muka whenua “He aha i peenei ai?” Ko te whakautu ki a ia, “He Kiingi taa maatou, koia i peenei ai.” I konei pupuu ake ai te manako i roto i a ia kia tuu ko ia hei Kiingi moo te iwi Maaori. Ka hoki haere ki Aotearoa ki Te Atiawa Taranaki raanoo, aa, ka whakatakotoria e ia i teenei kaupapa ki mua ki te aroaro o toona iwi. I te mutunga iho i whakahee raatou i a ia.

I muri mai ko Taamihana Te Rauparaha o Ngaati Toa Rangatira i haere ai ki Ingarangi. Ka kite ia i taa Pirikawau i kite. Ka hoki haere ia ki Aotearoa ki te whakatakoto i teenei kaupapa ki mua ki toona iwi. Ko taua aahuatanga anoo. I whakahee toona iwi i a ia. Heoi anoo, ko te karere ki a ia ko teenei, “He manene noa koe. Titiro atu ki Kaawhia, he tangata kee kei reira e noho ana.”

E ai ki a (Te Hurinui, 2010), i ara kee mai teenei whakaaro, te whakaaronui ki teetehi Kiingi i a Kuini Wikitooria kee me teetehi whakawhitinga koorero i ara i waenga puu i a ia raaua ko Kaawana Kerei. Hei taa Wikitoria “Ko wai te mana o ngaa mana i Aotearoa? Ko wai e taea ana te tuu hei Kiingi?” Ko te whakahoki a Kaawana Kerei, “Ko Te Wherohero, upoko ariki o Waikato, kei a ia te mana o ngaa mana. Ko ia ka tuu hei Kiingi.” Ka rongo ngaa Maaori i Ingarangi i taua waa moo teenei whakawhitinga koorero i ara ake moo te Kiingi. He reta i tuhia e Pirikawau ki a Wii Tako. I teeraa reta ngaa taipitopito, ngaa koorero moo taua hui. Ka puta teenei reta horapa i a Aotearoa e mau nei i ngaa koorero i ara me ngaa whakaaro moo teetehi Kiingi. A, hei taa (Te Te Hurinui, 2010), koia teenei te mahuritanga mai, te puaawaitanga iho o te whakaaro ki te whakataatuutu ai i te Kiingitanga.

Ahakoia ngaa momo rerekeetanga o ngaa koorero moo te whakarewanga ake o te Kiingitanga, ko teetehi ooritenga i ara ko ngaa koorero moo Maatene Te Whiwhi, rangatira o Raukawa ki te takiwaa o Ootaki, hei taa (Te Te Hurinui, 2010). Hei taa *Kotahi Rau e Rima Tekau Tau o Te Kiingitanga* (2008), aa, hei taa (Kirkwood, 2000) Ko Maatene Te Whiwhi te tangata, te rangatira naana nei teenei kaupapa te Kiingitanga i piikau, i kawe hoki ki ngaa rangatira me ngaa upoko ariki o te motu.

Kia noho mai ai ko te Tauparapara a Paraone Gloyne naana i tauparapara i te Koroneihana tuangaahuru maa toru o Kiingi Tuheitia hei tauhaapai i ngaa koorero moo Maatene Te Whiwhi. Koia i huri taiaawhio i te motu ki te whai i teetehi rangatira Maaori e tuu ai ia hei mauri moo te motu, hei Kiingi moo te iwi Maaori.

“Whakarongo raa e ngaa iwi nei ki te ara whaanui i tuu ai te Kiingitanga, naa Maatene Te Whiwhi i whiu ki a Te Whitikau ka hee ki reira. Ka whiua ki roto o Whanganui ko Peehi Turoa ka hee ki reira. Ka whiua ki roto o Taupoo ko Te Heuheu ka hee ki reira. Ka whiua ki roto o Rotorua ko te Amohau ka hee ki reira. Ka whiua ki roto o te Tairaawhiti ko Te Kani-a-takirau ka hee ki reira. Ka whiua ki roto o Ngaapuhi ko Taamati Wakanene ka hee ki reira. Ka whiua ki roto o Taranaki ko Tiitokowaru ka hee ki reira. Ka whiua ki roto o Waikato, ko Pootatau te tangata. He mana i heke mai noo ngaa maataawaka o te motu. I rere ai te kupu a Te Heuheu, Tirohia raa te wai e noho nei ngaa taniwha, tirohia raa te whenua e noho nei ngaa rangatira, he piko he taniwha whiua ki roto o Waikato.”

E tauria mai ana teenei tauparapara i te nukuroa o te whenua i takahia ai e Maatene Te Whiwhi. Koia teenei te ara i takahia ai e ia noo muri tonu mai i te huihuinga a Taamihana Te Rauparaha ki toona anoo iwi ki a Ngaati Toa Rangatira. Koia te hui i horahia e ia e Taamihana Te Rauparaha te whakaaro moo te Kiingitanga. Koia hoki teenei te tahuritanga atu a Maatene ki te tauhaapai i te kaupapa whai Kiingi moo te iwi Maaori. Ko te ara i whaia e Maatene Te Whiwhi i wahaina mai ai e te tohunga taatai kupu e Paraone Gloyne i roto i toona tauparapara, kaaore i kapi katoa ngaa ara me ngaa rangatira i apohia e Maatene. Ko te tuaapapa a ngaa mahi me ngaa takahanga toona uho. E haere nei ko ngeetehi ingoa i mahuetia i te tauparapara raa. Hei taa (Te Hurinui, 2010). Hei taa *Kotahi Rau e Rima Tekau Tau o Te Kiingitanga* (2008), aa, hei taa (Kirkwood, 2000) hoki,

Ko Te Akerautangi te tangata, ko Ngaati Hikairo te hapuu.

Ko Te Haapuku te tangata, ko Te Whatuiapiti te hapuu.

Ko Karauria te tangata, ko Te Aitanga-a-hauiti te hapuu.

Ko Taamati Hone te tangata, ko Ngaati Ruanui te hapuu.

I te tau 1854 ka tuu he huinga rangatira ki Haurua, ki Te Kuiti raanoo. Ko ngaa iwi i tatuu atu ki teenei hui ko Ngaati Maniapoto, ko Ngaati Hinetuu, ko Ngaati Apakura, ko Whanganui, ko Ngaati Tuuwharetoa, ko Waikato me ngeetehi iwi atu anoo o te motu. Ko te Tanirau te rangatira naana nei te pootae piwara haate i taupoki ki runga ki te upoko o Pootatau, aa, ka kiia i konei ko ia hei Kiingi. Hei taa Pootatau, “Kua too te raa ki ahau, ko taku tokotoko taku ripa tau aarai”.

Ko te whakahoki ki a ia, “he ahakoa kua too te raa ki a koe, he raa ka ara mai aapoopoo.” I konei, i teenei hui e ai ki a *Te Kotahi Rau e Rima Tekau Tau o Te Kiingitanga* (2008), ka herea te tangata me te whenua. Haere te waa ka tuu anoo teetehi hui ki Mangataawhiri, ko Taakerei Te Rauangaanga, ko Te Wharepuu maa ngaa puu koorero i te hui raka. Ko taa raatou he whakauu i a Pootatau hei Kiingi. Kia puru i te whenua me te mana o te tangata.

He nui noa atu ngaa huihuinga i tuu i mua noa atu i te waawaahitanga o Pootatau hei Kiingi i te tau 1858 hei taa *Te Kīngitanga The People of the Māori king Movement* (1996). Ko teetehi o ngaa tino hui i tuu ko te hui i Puukawa i te tau 1856. Ko ngaa rangatira o ngaa iwi o te motu i tatuu atu, i whakatetee atu i runga i te karanga o te waa. Ko ngaa Pane Ariki o ngaa iwi me ngaa hapuu i haere ai ki Puukawa ko ngaa mea wheenei nei i a Whanganui, i a Kahungunu, i a Raukawa, i a Tuuwharetoa, i a Ngaai Hineuru, i a Ngaati Toa, i a Ngaati Maniapoto, i a Waikato me te huhua noa atu. Ko ngaa rangatira wheenei nei i a Te Heuheu, i a Te Rangihirawea, i a Te Paerata, i a Topia, i a Takerei Te Rauangaanga, i a Porokoru, i a Maatene Te Whiwhi, i a Taieti, i a Rewi Maniapoto me te makiu taangata, makiu rangatira hoki. Ko te puutake ko te ngako o teenei kia whakatau ngaa rangatira puta horapa i te motu ko wai hei Kiingi moo te iwi Maaori. Ko ngaa koorero a ngoo taatou tuupuna ko te roanga ake o teenei hui ko toona toru ki te rima raa. E mea hoki ana i nguu ngaa ngahere i te rirotinga tau o ngaa manu o te wao nui hei kai maa te tini. He peeraa rawa te nui o ngaa taangata i haere ake.

I teenei hui i whakatuuria he pou, aa, ko te ingoa o taua pou raa ko Te Riu o Tongariro. I teenei hui i karapoti ngaa taangata i teenei pou ki te aata wetewete i teenei kaupapa te Kiingitanga, te Kiingi. Haere ngaa raa ka whakatauhia ngaa rangatira ko Pootatau hei Kiingi moo te iwi

Maaori. Hei tohu i te whakaaetanga o ngaa rangatira i teeraa huiraka, ka herea e raatou he taura muka ki a Te Riu o Tongariro, aa, ka paua, ka titia iho ki te whenua. E tohu ana teera i taa raatou whakaae ki a Pootatau kia tuu hei Kiingi, maana a raatou whenua e tiaki, a raatou iwi e manaaki, a raatou mana e kawe, a raatou mauri e pupuru hei painga moo te iwi. Ko ngaa iwi katoa i whakaae, i hinga, i peenei ai te mahi, i herea, i pau titia ki te whenua. E haere ake nei ko te ingoa o ngaa maunga i herea ai he titi manuka ki Te Riu o Tongariro.

Ko Karioi te maunga
Ko Parininihi te maunga
Ko Turangi te maunga
Ko Kaipopo te maunga
Ko Okurukuru te maunga
Ko Taranaki te maunga
Ko Te Ikaroa te maunga
Ko Kumea Mai te maunga
Ko Taiporohenui te maunga
Ko Kai-iwi te maunga
Ko Matemate-a-one te maunga
Ko Kiritahi te maunga
Ko Nukutewhatewha te maunga
Ko Tawhitikuri te maunga
Ko Takitumu te maunga
Ko Tatarua te maunga
Ko Ruahine te maunga
Ko Te Hiwi-ki-Parapara te maunga
Ko Te Kumi-a-Taawhao te maunga
Ko Titi-o-kura te Maunga
Ko Hikurangi te maunga
Ko Te Kowhai te maunga
Ko Maungapoohatu te maunga
Ko Huiarau te maunga
Ko Puutauaki te maunga
Ko Tawhiuau te maunga
Ko Ngongotaha te maunga

Ko Matawhaura te maunga
Ko Maunganui te maunga
Ko Te Aroha te maunga
Ko Kohukohunui te maunga
Ko Rataroa te maunga
Ko Moehau te maunga
Ko Kapiti te maunga
Ko Otiria te maunga
Ko Kaikoura te maunga
Ko Aorangi te maunga
Ko Paretetaitonga te maunga
Ko Tapuwaenuku te maunga
Ko Pirongia te maunga
Ko Taupiri te maunga
Ko Kakepuku te maunga
Ko Rangitoto te maunga
Ko Wharepuhunga te maunga
Ko Maungatautari te maunga

Te Kotahi Rau e Rima Tekau Tau o Te Kiingitanga (2008).

Kaaore a Pootatau i te hui i Puukawa, eengari ko toona karanga matua i reira. Ko Taieti toona ingoa, hoi ko Paatara Te Tuhi ki eeteahi. Ka karangatia e Te Heuheu a Taieti, ka puta hoki te koorero i a Te Heuheu. “Hinana ki uta hinana ki tai tirohia te wai e noho nei te Taniwha, tirohia te whenua e noho nei te Rangatira, tukuna ki a Waikato kiia ai a Pootatau ko ia hei Kiingi”. (Te Hurinui, 2010, p. 306). I te tau 1858 ka waawaahia a Pootatau hei Kiingi. Ka waawaahia ki ngaa kupu tapu i utaina e Wiremu Tamihana ki runga ki a ia.

Koia teenei teeteahi o ngaa koorero huhua moo te whakarauikatanga o ngaa mana nui o te motu. Koia teenei te ara takahanga i whaaia kia tutuki ngoo maatou tuupuna, ki te whakakotahi i ngaa iwi, ki te puru i te toto me te whakamutu i te pakanga, ki te pupuru hoki ki te whenua me ngaa rawa e toe mai ana ki a maatou.

Koia teenei ngaa kaupapa i tuu ai te Kiingitanga. I te matenga o Pootatau i te tau 1860 ka ara mai ko Taawhiao Pootatau Te Wherowhero hei Kiingi tuarua moo te iwi Maaori, (Kirkwood, 2000). Ka waawahia ia ki ngaa kupu wheenei nei i ngaa kupu i uta ki runga ki toona matua. Ko te tino o ngaa rerekeetanga i te waa i a Pootatau ki te waa i a Taawhiao, i a Pootatau ngoona rawa katoa.

I a ia, i a Pootatau ngoona whenua, ngoona awa, ngoona maunga, ngoona ngahere, ngoona mania, ngoona moana, ngoona roto me te tautoko nui o ngaa iwi puta noa i te motu. Te waa i a Kiingi Taawhiao, ko ngoona rawa katoa i raupatuhia i te tau 1863 kua koorero keetia.

Heoi anoo, ko te Kiingitanga he kaupapa e ora tonu mai ana. Ko too taatou Kiingi o mohoa noa nei, a Kiingi Taawhiao e pupuru tonu nei ki te mauri o ngongoona tupuna. Koia hoki e kawea tonutia ana i ngaa kawenga peeraa me ngaa kawenga, ngaa haepapa i utaina ki runga ki a Pootatau. Kaaore nei i rerekee. Ko te puru i te whenua te matua. Ko te puru i te toto te matua. Ko te whakakotahi i te iwi te matua. Kei aa te waa o ngoo taatou ariki e tuu nei i taua taumata te rerekeetanga, koira. Ko toona tapu whakahirahira e rite, aa, ko toona mana he rite.

Atu i ngaa koorero kua koorero keetia, he waahanga wairua too te Kiingitanga. Hei taa (Raa, 2001), ko ngaa maataapono me ngaa uaratanga Maaori wheenei i te aroha, i te kotahitanga, i te whakapapa, he mea takea mai ai i te Kiingitanga anoo nei ko te Kiingitanga he ao wairua, he ao e kitea ai te maaramatanga. Inaa hoki he mea nui kia maarama te Maaori ki ngeenei koorero i te mea he huarahi e maarama puu ai koe ki a koe anoo. Atu i oo ngaa maataapono matua, te puru i te toto, te puru i te whenua, te whakakotahi i te iwi, ko te ao wairua he ao hirahira ki a taatou te Maaori. Koia hoki i hirahira ai te Kiingitanga.

3.4 Puna kai – Poukai

Ko te Poukai teetehi o ngaa tino kaupapa o roto i a Waikato. Koia teenei he kaupapa i whakatuuria, i rewa ake ai e Kiingi Taawhiao noo muri tonu mai i teetehi o aana terenga moana ki Ingarangi. I rokohina mai te tuaapapa o te taatuutuutanga mai o te kaupapa Poukai i teetehi koorero a Tiitokowaru. Ko taua koorero e taarewatia ana i raro nei.

“Tirohia a Matariki kua noho ki ngaa puke o Tautoru

Kua moohio taatou ko ia te Kai ruuri o te tau

Tahitahi ki a Pipiri, ruarua ki a Hongongoi
Torutoru ki a Hereturikooka, Whaawhaarua-a-tai
I mua o Hiringa-nuku, i mua o Hiringa-rangi
Ki tua o Hiringa-kerekere
Ka kerekere te wai
Ka kerekere te patu
Ka kerekere te kai
Ka kerekere te tangata
Ko noho a Rehua ka heke iho a Uruao
Ka tootoo te kai, ka tootoo te tangata”
(Kirkwood, 2000, p. 183)

Ka aata matapakihia e Kiingi Taawhiao ngaa koorero a Tiitokowaru e iriiri mai naa. Ko te uho o aua koorero he mea whakahaangai, whakakupu hoki i te momo o te ora o ngoo taatou tuupuna. He oranga i pupuu mai ai i te pakanga, i pihi ake ai i te raupatu. Hei taa aua koorero ko te kerekeretanga wai teeraa, ko te kerekeretanga o ngaa kai teeraa, aa, ko te otinga iho ko te taamemehatanga o te tangata teeraa.

Kia kauaka teenei momo oranga e tokatuu hei oranga ake ake moo ngoo taatou tuupuna me ngaa uri te haere mai nei, me tuki ki runga ko te rangimaarie hei taa Kiingi Taawhiao. Kia noho mai ko tootoo kai, ko tootoo tangata te matua. I konei wahaina mai ai te tongi koorero a Kiingi Taawhiao e kiia ake ana “Kua whakatuuria e au teenei kaupapa hei whaangai i te pani, te pouaru me te rawakore. He kuaha whaanui kua whakapuaretia ki te puna kai raaua ko te puna tangata. Ka ora teetehi mea, ka ora teetehi mea.” (Takerei, 2008, p. 15). Koia teenei te rewanga ake o te kaupapa Poukai i roto i ngaa kupu moroiti noa iho nei. He ahakoa teeraa, ko te maaramatanga ki toona puutaketanga mai i taaku i hiahia ai kia horahia ki teenei tuhinga. I naa raa ko te Poukai teetehi o ngaa kaupapa ka kaha kitea, rangona hoki ko ngaa Kura Tariao, karakia Paimaarie. He kaupapa teenei e taapae rawa ana ki te oranga o te whakapono Tariao i te nui o te whakamahinga o ngaa karakia Paimaarire ki teena marae, ki teena marae puta noa i a Tainui.

Ko te tuuaapapa o ngaa Poukai i te waa i a Taawhiao he rerekee rawa ki too te tuuaapapa o ngaa Poukai ka whakahaerehia i ngeenei raa tonu. I te waa i a Kiingi Taawhiao ko te oranga o te Kaupapa o te Kiingitanga te matua. Ko te oranga o te Kiingitanga i whakatutuki maa roto mai i te oranga o te taangata, i te oranga o ngaana anoo uri whakaheke hei taa (Kirkwood, 2000).

I teenei raa, i ngaa raa o mohoa noa nei, ko te tuaapapa o ngaa Poukai ka whakahaerehia ko ngaa kaupapa o te waa. Ko ngaa kaupapa noa e whai paanga ana ki teenaa marae me ngoona uri, ki teenaa marae me ngoona uri. Heoi anoo, haaunga te kaupapa a teenaa marae, a wai raanei ka noho tonu ko ngaa Poukai hei kaupapa whakauu, whakapuumau i ngaa karakia Paimaarire. Ka whakauungia ngaa karakia i te hikinga o te kara o te Kiingi hei te whitu karaka i te ata. Ka whakauungia ngaa karakia i te ekenga mai o te Kiingi me toona iwi ki runga ki te marae, te marae e whakahaere ana i te Poukai i taua raa hei te tekau karaka i te ata. I te otinga iho o te kaupapa, ka whakauungia ngaa karakia i te hekenga o te kara. Ki te aata arotakengia ngaa tatauranga moo te aahuatanga ki te nui o te tauhaapai o teenei kaupapa te Poukai i teenei whakapono me ngaana anoo karakia.

E rua tekau maa whitu Poukai i te tau. E toru ngaa waa ka wahaina mai ai ngaa Poukai i ngaa karakia. I te otinga o te Poukai whakamutunga o te tau ki Reretewhioi Marae, waru tekau maa tahi ngaa waa kua taakinatia ngaa karakia i roto i te tau kotahi. Moo te aahua o te noho, moo te aahua ki te ora o teenei whakapono i ngeenei raa, he aawhina nui teeraa. Kua kore hoki pea teenei whakapono e ora i te korenga o ngaa Poukai.

I te tau 2015 i taakina ake raa e Te Rangamaaheuheu moo te Kiingitanga he rangahau moo te nui o te taangata e moohia ana ki te Paimaarire. I taua tau he ono tekau maa waru mano ngaa uri o Waikato i reehitatia ki a Waikato-Tainui. Kaaore i tua atu i te kotahi paiheenetia o aua uri kua reehitatia e moohio ana ki ngaa karakia Paimaarie, Tariao hoki. Ko te kotahi paiheenetia o te ono tekau maa waru mano ko te ono rau waru tekau, aa, ki te weheruatia i taua nama ka puta mai ki waho ko te toru rau whaa tekau.

Hei taa ngaa tatauranga o Te Rangamaaheuheu, he iti iho te oorau o te tangata moohio ki ngaa karakia Paimaarire i te kore ira rua rima paiheenetia (0.25%) o ngaa tangata katoa kua reehitatia ki a Waikato-Tainui i te tau 2015. He mate nui teenei. Koia ki aaku whakaaro he kaupapa nui, he kaupapa whakatiketike te kaupapa Poukai. I toona whakauu, i toona whakaora i ngaa taonga me ngaa homaitanga a ngoo taatou tupuna.

3.5 Te Whakapono ake

Kua koorerohia keetia te puutakenga mai o teenei whakapono heoi anoo, hei taa (Papa, 2013) ko te whakapono nei he mea i kuumea mai ai i ngaa whakaakoranga o ngaa kura tawhito a te Maaori o Tainui, ngaa kura i haere ai a Taawhiao ka whakakotahi atu ki ngaa maataapono o te karaipiture. Ko te otinga iho o taua momo whakakotahinga, ko te Tariao. Ki taa Tainui titiro ko te Tariao te whetuu o te ata. Ka tiikina mai ko te ingoa Tariao hei ingoa moo te whakapono hou e ai ki a (Kirkwood, 2000). He taonga i puea mai raa i te whakapono Paimaarire, Hauhau ki taa ngeetehi hei taa (Clrack, 1975), i whakahaerehia e Te Ua Haumeene koia kua koorerehia i te upoko i mua mai i teenei naa. Ko te aahuatanga ki te Paimaarire me te ingoa Paimaarire he mea i tiikaro e Kiingi Taawhiao i ngaa karakia a Te Ua Haumeene. Ko taana, ko taa Kiingi Taawhiao he pupuru tonu ki te whakamutunga o te raarangi karakia a Te Ua e mea ana, rire rire hau, Paimaarire.

Ko ngaa karakia mai anoo i te waa o Kiingi Taawhiao e ora tonu mai ana i teenei raa tonu ka noho ki raro ki te Kaupapa o te Tariao hei taa (Papa, 2013). Ko ngaa karakia e whaa taaku e koorero nei. Ko te Owhaowha teeraa. Ko te Kura o te Ata teeraa. Ko te Kura o te Awatea me te Kura o te Ahiahi hoki teeraa. Hei taa (Papa, 2013), e toru tahi ngaa momo ingoa moo te Karakia Owhaowha.

Ki eetehi ko te Owhaowha, ki eetehi ko te Ohaoha, ki eetehi atu ko te Ohooho. E kene pea kua whakatainuitia te kupu Ohaoha kia puta mai ko toona whakahua hei Owhaowha.

Ko te aahuatanga ki te ingoa Ohooho he tuaahua whakaohoho i te wairua i aa te tangata e takitaki nei i te karakia raa. Hei taa (Toka, 2021), ko te karakia Owhaowha te karakia ka kaha raangona i ngaa huihuinga maha. He huhua ake toonaa raangona i te rongomanga ake o ngaa Kura e toru. Ko te Owhaowha he karakia ka raangona ki ngaa momo huihuinga katoa, Kiingitanga mai, kura mai, koohanga mai, waahi mahi mai, maarena mai, hui marae mai, te aha noa te aha noa hoki. I runga i ngeenei koorero, haaunga te reetootanga o te rangahau, te huhua hoki o ngaa ara i rangahautia, kaaore ahau i kite, i aahei raanei ki te kimi atu i te ingoa o te tangata naana nei ngaa kupu o te Owhaowha i tuhi.

Kaaore hoki i taea e ngaa taangata, naaku i uiui te kii naa wai i tuhi. Hei taa (Kereopa, 2021), e whakapono ana ia kaaore nei a Taawhiao i tuhi i ngaa kupu ki te Owhaowha he aha koa naana nei te karakia.

I peenei aana koorero i runga i te mea he kupu whakanui Kiingi o roto tonu i taua karakia, aa, e kore a Kiingi Taawhiao e whakahoonore i a ia anoo. He Kiingi, he tangata whakaiti a Taawhiao. Engari anoo ngaa kura, naa Kiingi Taawhiao ngaa kupu o roto, aa, ko ngaa kaupapa wheenei nei i te Poukai i te meatanga ake o te kara ki runga, te Koroneihana, me ngaa kaupapa Kiingitanga ngaa momo waahi, kaupapa, horopaki hoki e kitea ai te takitakitanga o ngaa Kura.

Ahako te kitenga atu i te takitakitanga o ngaa Kura ki ngeenei kaupapa huhua ehara hoki teeraa i te tohu ki ahau e ora rawa ana teenei whakapono. He torutoru noa iho ngaa taangata e ora ana e moohio nei ki te taataki i ngaa kura. He ruarua e moohio ana ki te taataki i ngaa kura aa, e maarama hoki ana ki taana e taataki nei. Hoi, ka whewherahia te taamemehatanga o te Tariao, aa, he aha i kiia ai e taamemeha haere nei i te upoko o muri mai. I taua upoko hoki ka koorerotia moo te ohonga ake.

Moo te aahuatanga ki ngaa Kura e toru, e rua noa iho ngaa Kura e peeraa rawa ana te ora. Ko te Kura o te Awatea teeraa me te Kura o te Ahiahi. Ko ngeenei Kura e rua te tino o ngaa Kura ka kaha whakamahia. E ai ki a (Kereopa, 2021), raaua ko (Totorewa, 2021), ko ngaa tohunga o mua peeraa i a Henare Tuwhaangai, Te Kaapo Clark, Pumi Taituha me Hone Haunui maa te whakamutunga o ngaa taangata maarama, moohio hoki ki ngaa Kura katoa. Araa eeteahi taangata o mohoa noa e moohio ana engari he uua ka kite, he pakupaku noa raanei te moohio ki te whaanuitanga o te maaramatanga kei roto he ahako toona moohio ki ngaa kupu.

I naa raa he whakapono wairua teenei. He whakapono whakaora i te wairua, te ngaakau, te hirikapo me te tiinana hoki. He whakapono hei kaawhaki i ngaa mauiui, he whakapono hei wete i ngaa paamamaetanga. He whakapono arataki i te hunga kua ngaro. He whakapono para i te huarahi ki te ora. He whakapono tiaki hoki i too taatou Kiingi me toona whare Ariki. Ko te whakapono ake teenei o te Kiingitanga. Koia ka whakaaro nui ahau ki teenei taonga te Tariao, te Paimaarire.

3.5.1 Tariao

E tika ana ko te ingoa Tariao te ingoa taawharau i te whakapono ake, engari, koia hoki raa te ingoa ka utaina ki runga ki te tangata maana ngaa karakia e taki. I te waa o Kiingi Taawhiao hei taa (Wananga, 1876), ko Kiingi Taawhiao te upoko o ngaa Tariao. He tuuranga motuhake teenei, te Tariao maa te tane.

I naa hoki, he peeraa rawa te nui o te horapa o teenei whakapono i te motu i runga i te nui o ngaa Tariao. He Tariao puta i ngaa iwi o Tainui waka wheenei i a Waikato, i a Hauraiiki, i a Maniapoto, i a Raukawa, i a Ngaati Haua hoki. He Tariao i Ngaati Tuuwharetoa, i Taranaki, ki te motu o te Noota, ki te Tairaawhiti tau atu ki Tauranga moana hoki. I ngoona raa ko te tohu o te Tariao ko te Mataora. Koia teetehi tikanga i whakatakotoria e Kiingi Taawhiao. Ahakoa koo wai te tangata, mehemea e hiahia ana ia ki te tuu hei Tariao, ka mokongia tana kanohi. Ko teetehi o ngaa Tariao tuatahi a Taawhiao ko tooku tupuna koroua e kiia nei toona ingoa ko Tokona. Koia tooku tupuna e here nei i ahau ki taku whaanau Rahiri, Tutahi hoki o roto mai i a Te Wairoa i Tauranga Moana.

Moo te aahuatanga ki te tuuranga Tariao o mohoa noa nei, ehara i te mea he tuuranga ookawa teeraa e whakauu nei a Waikato, a te Kiingitanga, a wai raanei, wheera i te waa i a Taawhiao. Ko te tangata e taea ana te takitaki i ngaa Kura o te Paimaarire ka kiia he Tariao.

Koia puu. Kaaore ngoona tohu, kaaore ngoona waananga i whakangungu i a ia, kaaore he aha. Me te aha hoki, koia e kii nei ahau e taamemeha haere ana too taatou whakapono. Kaaore i te peeraa rawa te kaha, kaaore i te peeraa rawa te ora, te whaanui o te moohio me te maarama o te tangata.

E ai ki a Wananga, 1876, ko ngaa mahi a te Tariao i ngoona raa he takahi whare, he takahi whenua, he karakia whakawaatea, he whakapono ki te atawhai me te aroha. Koia raa te tohungatanga o ngaa Tariao o ngaa raa o uki. Kaaore au i te kii ko ngaa taangata o naaianei kaaore hoki e mahi peeraa ana, engari, he uaua ka kite i te tangata kotahi ka taea eeraa haepapa katoa, wheenei i oo taatou tuupuna.

He nui ngaa taapaetanga i wheenei ai taatou heoi anoo, ko te mea nui e ora tonu ana taatou, e ora tonu ana ngoo taatou taonga horopuu. Ko te oranga te mea nui. I naa raa te kupu a Kiingi Tuheitia, “Amohia ake te ora o te iwi ka puta ki te wheiao”.

3.5.2 Ngehe

Ko te ingoa moo ngaa Tariao wahine ko te Ngehe. He tuuranga ookawa teenei i whakauu, i whakahautia e Kiingi Taawhiao. Ko toona tuahine e kiia nei toona ingoa ko Tiria te upoko arataki i ngaa Ngehe.

He rite tahi ki te tuuranga i mau ai i a Taawhiao. Moo te aahuatanga ki teenei tuuranga, te Ngehe i ngeenei raa, kua rohe, kua hinga, kua mutu, kua kore, kore kore nei. Kua roa teenei tuuranga e ngaro ana. E kore taatou e kite i te wahine takitaki i ngaa Kura. Ko ngaa tikanga o mohoa noa nei e kiia ana, e kore e taea te wahine te taki haere i ngaa Karakia. Hei taa (Totorewa, 2021), kaaore anoo ia kia kite atu he wahine e tuu ana ki te tuuranga Ngehe wheeraa me te tuuranga Tariao, aa, he whakahaere karakia te mahi he kauwhau tahi, he koorero tahi hoki. He momo kaaore anoo kia kite i roto i ngaa tau rima tekau neke atu.

Engari kee ia he tikanga teenei i ahu mai i roto i ngaa rangahau. He tuuranga motuhake, he tuuranga ookawa i whakamanahia e Kiingi Taawhiao. Me he iwi whakauu taatou i ngaa koorero wairua, i ngaa koorero tupuna, ka tika me whai waahi te wahine ki te taataki i ngaa karakia. Wheenei hoki me ngaa tikanga tuu, tikanga noho i koorerotia e (Totorewa, 2021), ehara i te mea me tuu te tangata i a ia e arahina ana i ngaa karakia, e waatea kee mai ana taatou ki te noho.

Heoi anoo, naa te hurihanga o te waa me te whakaaro o te tangata, i ngaa waa katoa koi tuu te tangata, ngaa taangata raanei e aarahi ana i ngaa karakia, ahakoa, i noho ngoo taatou tuupuna. Ehara i te mea e huri tuaraa atu ana ki ngaa mahi o uki, engari, kauaka taatou e pooheehē, kauaka hoki taatou e whakaaro e tika ana aa taatou mahi i te korenga kee o te moohio, te maarama, te rangahau hoki i te hoohonutanga o ngoo maatou mahi. Rawa atu me he mahi tuupuna. I roto i ngaa tau tata kua hori kua maamaa atu ngaa whakaaro ki ngaa waahine. Naa runga hoki i te rangahau, me ngaa huihuinga o te kaahui taki i ngaa karakia, kaahui wheenei hoki i a Te Rangamaheuheu moo te aahuatanga ki ngaa waahine, ki teenei tuuranga Ngehe mai anoo i te waa o Kiingi Taawhiao, o Tiria hoki.

Naa teenei kua ngaawari haere ngaa tikanga onaaianeimoo ngaa waahine taki karakia. Ahatia teeraa, he uaua tonu ka kite i te wahine ka taki haere ana i ngaa kura. Ko te waahanga noa iho ki a raatou ko te taki i ngaa Owhaowha i te mutunga mai o ngaa Kura. Naa teenei tuhinga pea e whai waahi mai ai he maaramaranga, e puurangiaho mai ai hoki taatou ki ngaa momo whakahaere i taakina ake raa e Kiingi Taawhiao me ngoo taatou tupuna. Naa taatou katoa teenei whakaponono nooreira ki ooku whakaaro, e waatea ana ki a taatou ngaa uri.

3.6 Ngaa kupu ki ngaa Kura

Ka ruia ki teenei waahanga o te tuhinga nei te whakatakotoranga o ngaa kupu o roto mai i ngaa Kura e toru o te whakapono Tariao, Paimaarire hoki ka karakiatia tonutia. Ka ruia ko ngaa kupu noa ki teenei waahanga e kitea ake ai te kaipaanui o teenei rangahau i ngaa karakia i naa raa he karakia tawhito ngeenei. Ko toona momo he momo e kore pea e kitea, e kore pea e raangona hoki ki waahi kee atu. Noo muri tonu mai i ngaa kupu ka whakamau atu ngaa koorero ki te whakamaaramatanga o teetehi o ngeenei Kura noa iho. Ko te Kura o te Ahiahi teeraa kua tiipakohia.

E whakamaarama kau ana ahau i teetehi o ngaa Kura noa iho i runga i te mea he peeraa rawa te nui o te tikanga o ia kupu, o ia ingoa, o ia Atua, o ia whakapaparanga, o ia kupu whakarite, o ia waahi, o ia aha noa e mau nei ki ngaa Kura. Katoa ngaa whakamaaramatanga o ngaa Kura tee taea te noho i raro iho i ngaa aaheinga a ngaa ture o te tuhinga paerua i toona rangiwhaawhaatanga. Me tuhinga kairangi kee ka uru te katoa o ngaa koorero me ngaa maaramatanga o ia Kura ki te tuhinga kotahi. Koia teenei ngaa kupu ki ngaa Kura te haere nei. Taihoa ake te whakamaaramatanga ki te Kura o te Ahiahi.

3.6.1 Te Kura o te Ata

Ko maui mua, maui roto, maui taha, maui takitaki o te raa - ka pai
Uenuku o kara e rongu te iwi, kua rauna te ki - ka pai
Ruanuku Rurangi rupapa hukerekere - ka pai
Ko ahau ko tarawhitiao, whitiao, whiti whiti ora - ka pai
Tuu ana Uenuku e karakia ana i taana karakia i a tuhoki ki te rangi aawhiowhio,
ko tuhoki ki te rangi aanewanewa - ka pai
Matariki Tautoru, taawera te whetuu taki ata - ka pai
Takiri mai te ata, ko rihi te manu tino awatea ka ao te raa - ka pai
Tokona te hee i ahau e Te Ariki e Te Atua - ka pai
Tena purutia too iwi te hekia too wai - ka pai
Heuea i ruia ki a Papatuaanuku - ka pai
Ko matahe heuea ko tama i araia ko Kahukura-nuku ko Kahukura-rangi - ka pai
Ka puta kei tua kei a hukenui, hukeroa, he paki aio - ka pai
Korotaha o te poo, karotaha o te ao, naa raro mai koe,
naa runga atu au whakaea te ika a Tangaroa - ka pai
He toi tupu, he toi ora he toi ahu mai Hawaiki - ka pai
Ka kau taaua ki Moana-nui, ki Moana-roa, ki Moana-uriuri ki Moana-irokia - ka pai
Teena purutia tawhia kia taka paunui a papa,
Te mana o te tangata te ihi te tapu, mana o te rangi - ka pai
Ka rere te matangi ngaa turutu haere ki Ruanuku patanga rere mai Kahukura - ka pai
Ko te iwi too ahurewa
Rire, rire hau, Paimaarire

3.6.2 Te Kura o te Awatea

Wahia i te uru tapunui o Tumatauenga ko
Io rangi, Io Io whenua, maroro whenua - ka pai
Ko te a ko ranga ko te matahuuhuu o rangi - ka pai
Ngai-nui Ngai-roa Ngai-papa Nga- te-hurumanu - ka pai
Tuu ana Rehua taatahi o te Mangoroa - ka pai
Ko koe ko ahau taaua nei tara whitiao whitiao, whiti whiti ora - ka pai
Hikitia mai ta taaua rangi hapainga mai ta taaua rangi, he
rangi haruru, he rangi ngatoro - ka pai
Piki ake Tawhaki i te rangi tuatahi, i te rangi tuarua, i toona raa
ko Tuhokainuku, ko Tuhokairangi, papaa te whatitiri,
ko Matire-hoahoa, katohia - ka pai
Toia Tainui koia i herea ki te mata o Whatitiri, taka taka tuu mai taku rangi - ka pai
Ko Tiki ko Tohi ko Rauru, ko Rakeiao, ko Tama ki Hikurangi - ka pai
Hikurangi tikitiki maroro te marau, he hape ki tua o te rangi he moana Ariki - ka pai
Ruatapu kei te whakakaho i te wai te ihinga nei e te warenga nei e - ka pai
Tangaroa wetea i te whiwhi, wetea i tehara tawhito te rangi - ka pai
Tumekawa ka tahi, tumekawa ka rua tikina e koe ki whiti te kawa
ko Kahukura Ariki - ka pai
Hapai ngaa mahi haa-nui, haa-roa, ko Hatupatu - ka pai
Hira mai te uru, hira mai i te whatu te kura takahi puni o Rongomai i huia - ka pai
Whakatau i te ata, whakatau i te muri,
turupana te ika ki te manea kia uru haea - ka pai
Ko Hawaiki te ahunga, te aponga, ko tutoro hakina tutenga nau - ka pai
Ko Tauru ko Te Raa, ko Tuteahurangi kei runga torona
Rire, rire hau, Paimaarire

3.6.3 Te Kura o te Ahiahi

Ko Rangi ko Papa, ko Rongo, ko Taane-Mahuta - ka pai
Tawhirimatea te tangata tuuturu o te motu - ka pai
Heuea Heuea te uri o haio - ka pai
Ko te Kore Kore-nui, Kore-para, Kore-whiwhia, Kore-rawea - ka pai
Hekii teenei Tiki te pou-mua, Tiki te pou-roto, Tiki te hahunga mai Hawaiki - ka pai
Ko Toi ko Haatonga, ko Rakeiora - ka pai
Ko taha Titi ko tama ki te rangi, ko te a titi rauwea, konoa - ka pai
Ko Taa whaki a hema, ko Tanoa, ko Hinga ki reira - ka pai
Ko te ata werohia, ko Tutunui, ko Tukurangi - ka pai
Uenuku o kara e rongo te ao - ka pai
Mautaka te po, mautaka te ao, he ao maaneanea, he ao maarama - ka pai
Tukia te rangi ki runga whakaorangia te iwi - ka pai
He tu he tawhito, ko tawhito i whea - ka pai
Matiho ropaki ki uta, matiho ropaki ki tai,
matiho ropaki ki te urauro o te wai - ka pai
Ko mahuki hinengaro anake teenei taku kupu mai Hawaiki,
Horomia i te paratawa, ka tuu te hiku auta - ka pai
Homai raa kia purutia kia hereherea, ta whiwhi ta mau - ka pai
Taku ringa ringa nei, he Atua ai nuku, he Atua ai rangi,
he tamaire he ta whakahoro - ka pai
Ko te rangi anewa kei runga torona
Rire, rire hau Paimaarire.

3.6.4 Te whakamaaramatanga

Koia teenei he whakamaaramatanga, he whakamahukitanga i puta i a Brad Totorewa. Ko Brad Totorewa te Kaiarahi o Te Rangamaheuheu moo te Kiingitanga. Hei te upoko e haere mai nei ka wherawherahia te taapaetanga o Te Rangamaheuheu ki teenei whakapono. Ko Brad Totorewa te heamana o Ngaa Marae Toopu. Ko ia te heamana o Ngaati Naho, he hapuu teenei mai anoo i te oorokohiimatanga mai o te Kiingitanga, o teenei whakapono hoki e whakauu nei i ngaa maataapono o ngaa kaupapa nei. Aa, i ngoona raa ko Brad Totorewa i tuu hei Toki moo te Kiingi Maaori a Kiingi Tuheitia. Kaaore hoki he tangata e ora tonu ana i tua atu i a Brad Totorewa hei tuhura mai i eetei whakamaaramatanga e haangai nei ki te Kura o te Ahiahi.

Hei taa Totorewa ko Kiingi Taawhiao, ko Manuhiri, ko Te Tapihana ngaa taangata naa raatou ngaa kupu ki ngaa kura i taarai. Ko te Kura o te Ahiahi te Kura o ngaa mea e toru ka taakina ake raa, ka karakiatia i te ahiahi poo, atu i te toru kara. Hei taa Totorewa he momo whakapaparanga taa ngaa whiti me ngaa kupu. Kua aata rautakihia ngoo taatou tupuna i te nohoanga o ia kupu, o ia rerenga anoo nei he puuraakau e koorerohia ana. Ehara i te mea he kupu noa kua makaia, kua rapa matapookere poka noa, kaaore. Kua arohaehaetia, kua taataritia, kua matapakihia, kua reetoo te ruku o ngoo taatou tupuna ki te aahua me te whakatakoto o ia kupu o te Kura nei.

He whakamaaramatanga; Koia e koorero ana i ngaa tukuihotanga e haangai nei ki a Rangi raaua ko Papa. Mai anoo i te waa i noho wehe ai a Rangi raaua ko Papa i mua tonu i taa raaua piritahitanga. Ka koorerotia te waa i noho piri ai raaua atu ki te whakamutunga o ngaa wehenga i wehe ai raaua.

Te tokonga ake a Taane i a Rangi ki runga ka whakarerea iho ko Papa ki raro. Ko te waahanga ki a Rongo raaua ko Taane-Mahuta i roto puu i teenei Kura he mea whakamihi i a raaua, me te Urutapu-nui i noho ai ngaa Atua Maaori.

Ka tau mai ki a Taawhirimaatea hei tangata tuuturu o te motu, koia teenei tomokitanga mai o te ira tangata ki ngaa koorero. Aa, e kiia ana ko ia, ko Taawhirimaatea te tangata tuuturu i te mea ko ia te haa e ora ai te tangata. Ko te haa e koorero mai naa ko te hau e kawea nei e Taawhiri. He aha koa naa Taane-Mahuta te haa i ora ai te tangata, te tihei mauri ora i ora ai te tangata naa Taawhiri te haa e ora ai te tangata.

Mei kore ake a Taawhirimatea, kua korekore nei te tangata i te ao e noho nei taatou o mohoa noa nei. Koia ka kiia ko Taawhiri te tangata tuuturu o te motu. E haangai hoki ana teenei waahanga ki ngaa mihi ki a Taane-Mahuta i runga i te mea naana nei ngaa raakau e haapai nei i te pupuhitanga o Taawhirimatea. I naa hoki, i te wehenga o Rangi raaua ko Papa, ka puurangiaho mai ko ngaa raaua tamariki katoa ki teenei ao kikokiko.

He rite tonu te wairua o te kupu heuea ki ngaa kupu wheenei nei i te tauwehe, i te motuhanga, i te tauaarai hoki. Ko taua kupu heuea e tohu ana i te maawehe o Rangi raaua ko Papa. Ko te kupu haio e koorero mai naa moo te haa o Io. I te weheruatanga o Rangi raaua ko Papa, ka heuea raaua, aa, ka puta mai ki te ao ko te haa o Io maa roto mai i ngaana uri i whaanau mai i teenei wehenga. Ko te haa o Io, ko ngaa uri o Io raanei e koorero ana hoki moo taatou te tangata, aua atu i oo te koorero moo ngaa Atua noa. I naa raa he uri taatou i heke mai i a Io. Kei teenei tuhinga whakapae e tauria mai ana i te whakapaparanga e mau nei aua koorero, te whakapapa hei taa (Jones, 2013).

He huhua ngaa momo horopaki ki a teenei koorero. I teetahi horopaki ko te Kore e koorerohia ana ko ngaa rangaranga me ngaa momo ngoikoretanga o te waa i noho ai te ao i te Kore. I a te ao e noho nei i te Kore ka hiimata ake ai eetahi aahuatanga te puaawai. Naa eenei momo aahuatanga ka aitia te Kore i a ia anoo, aa, ka puta mai ko Kore-nui ko te Kore-para, aa, heke, heke, heke noa atu.

He rite tonu, aa, e whakahaangai hoki ana teenei Kore ki te koorero o roto tonu i te Paipera e mea ana “I te tiimatanga ko te Kore naa te Kore i ai.” Kaaore i rerekee atu, kaaore i matara atu. Me te mahara hoki ko Taawhiao he tangata whakapono ki ngaa haahi huhua. Ko ngaa koorero o roto mai i ngaa kura katoa, he koorero i ahu mai i ngaa Kura taketake o te Maaori, i takea mai hoki i ngaa whakapono i haere mai i tawhiti.

Maatua raa he kupu tohutohu kei roto. Ko te kupu hekii ehake i te mea he kupu kotahi, engari kee ia e rua tahi ngaa kupu. Ko toona whakatakotoranga tika ko teenei, he kii teenei. Hei tauria, e rite ana ki te whakatakotoranga kupu e mea nei, naaku te kii, noona te kii, maana te kii, aa, koia teenei te wairua o taua koorero. Heoi anoo, ko teenei kii, ko teenei tohutohu i ahu mai i a Io. Ko taa Io tohutohu ki a taatou he tiki i eenei pou e koorerotia ana i roto i te Kura.

Te pou-mua, te pou-roto. Ko ngeenei pou ehara i te pou e tuu ai teetehi mea, engari he kupu whakarite. Ko te aronga kimihanga, ko te hua kimihanga taa ngaa pou e koorero nei, he whai tikanga kee.

Ko te kimihanga o te hua me te aronga i roto i te Kore. Koia teenei te haangaitanga o teenei whiti ki ngaa koorero o te whiti tuawhaa. Ka kitea he hua he aronga raanei i roto i te Kore, ko te whakawhanaketanga teeraa, ko te puaawaitanga teeraa o roto mai i te Kore. He rite tonu ki te kaakano. Me rumaki te kaakano e pihi ake ai te huta. Noo reira, ko ngaa tohutohu, ko te kii raanei o Io he rapu i te mea ngaro. Wheenei nei ki taa Kiingi Taawhiao tongikura, “Takoto ki raro rapua te mea ngaro.” (Kirkwood, 2000, p. 94).

E koorero ana hoki teenei Kore moo te whakawaatea i te hinengaro. Kia kauaka te hinengaro e rangirua, kia kauaka te hinengaro e kootiti e tapepe noa nei. Kia kotahi ai ngaa whakaaro ki a Io Matua Kore. E waatea mai ai te tangata ki te aata whakaaro me te aata whakarongo. Kaua a tinana noa engari a wairua hoki ki te kii a Io.

Ki te hoki koomuri te titiro ki te tiimatatanga mai o ngaa koorero ko te wehenga o Rangi i a Papa teeraa. Ko te whaanautanga mai a ngaa raaua uri, ngaa uri hoki a Io. Ka koorerotia hoki ko ngaa Kore me ngaa kii, ngaa tohutohu a Io. Koia teeraa ngaa tohutohu ki te kimi ki te whai take raanei, whai tikanga, whai auahatanga. I eenei koorero ka tau taatou ki ngeenei Atua e kiia nei oo raatou ingoa ko Toi, ko Haatonga, ko Rakeiora. He Atua whakaora eenei. E hanga rite ana eenei Atua ki ngaa Atua kare-aa-roto.

He Atua whakatinana a Toi i te rongorongo. He Atua whakatinana a Haatonga i te momo ngau, i te whakaparure. He Atua whakatinana a Rakeiora i te ngangahau, i te tuukooripi. Ki te whai i te raupapatanga o ngaa koorero, he mea koorero i te ora mai o teetehi mea ki te ao mai i te kore. Ko te waahanga ki teenei whiti he mea koorero moo ngaa momo rongorongo me ngaa momo kare-aa-roto i a teetehi mea ka ora.

E koorero ana hoki moo ngaa momo Atua, aa, he Atua anoo ngeenei. Ko te Atua e kiia nei toona ko Taha, e hanga rite ana ki te tiitaha. He momo kaaore anoo kia tau noa. Ko te Atua e kiia nei toona ingoa ko Tama-ki-te-rangi he mea whakatiinana i te ungaunga, he Atua whakakoorero i te momo o te haukerekerere. Ko te Atua a Titi-rauea-konoa he atua whakatiinana i te momo pootatutatu. Katoa eenei Atua i teenei whiti he momo puumanawatanga.

E whakatauiria mai ana i ngaa momo aahua wheenei i a ngaa whiti o mua tonu mai i teenei. Ko te raupapa i ngaa aahua, i ngaa mea, i ngaa rongorongo, i ngaa aha raanei i te waa ka ora mai teetehi mea, teetehi tangata, teetehi aha raanei i te Kore.

Ko te Atua e kiia nei toona ingoa ko Taa i teenei whiti e koorero mai naa moo Taawhaki. Hei taa Tainui whakapono ko Taawhaki i piikauria i ngaa rangi ki te tiki mai i ngaa kete o te waananga, wheenei nei i ngaa kete kua koorerohia keetia i teenei tuhinga whakapae. Ko toona haangaitanga ki teenei karakia ko ngaa waananga i kawea mai ai e Taawhaki e mau ana ki roto ki aua kete. Ko aua waananga ko te mea takea mai i te ao kikokiko. Ko ngaa puukenga me ngaa tauira o te ao kikokiko.

Ko te reo teeraa, ko ngaa tikanga teeraa, ko ngaa aahuatanga katoa o te ao Maaori teeraa. Koia teenei he whiti whakamiha i a Taawhaki i ngoona piikautanga nui whakaharahara. I runga i eenei koorero kua neke, kua tahuri ngaa koorero o te karakia nei ki teetehi waahanga, kaupapa atu anoo o te ao mai i te kore. Ko te tootoo mai i te maatauranga, ko te kukumetanga mai o ngaa akoranga hoki. Ahatia toona rerekee, toona kaupapa, e haangai tonu ana. He rite tonu.

I te hokihanga mai o Taawhaki i ngaa rangi kua horahia kua ruia ko ngaa maatauranga naana i tiikarohia ki te ao. Ko teenei whiti he mea e koorero ana moo te aahuatanga ki te whakauu i ngaa waananga i heria mai e Taawhaki ki teenei ao. Ko te aata werohia, ko te ngaru akiaki, ko te tohutohu, ko te whakakai, ko te whakaako, ko te whakatakoto, ko te whakapuumaui i ngaa taonga katoa i roto i ngaa kete e horapa ai ki te ao.

Moo te aahuatanga ki ngaa kupu wheenei i te kupu nuku, te kupu nui, te kupu rangi raanei ka whakamahia, e tohu ana ngeenei kupu i te tauwehetanga o te ao wairua i te ao kikokiko.

E koorero ana te waahanga moo te Atua e kiia nei ko Uenuku. Ko teenei Atua te Atua ka koorerohia e Kiingi Pootatau i roto i toona tongikura e mea ana,

I te haere mai i Hawaiki ko too koutou Atua ko Uenuku-kai-tangata. I te raa nei ko too koutou Atua ko te Atua nui o te rangi ko Ihoa-o-ngaa-mano. Kia mau ki te Ture, kia mau ki te Whakapono, kia mau ki te Aroha. Hei aha te aha hei aha te aha.
(Kiingitanga, 2019).

Koia nei te waa i tahuri ai ngoo taatou tuupuna o Waikato ki ngaa whakapono hou. I huri oo taatou tuupuna mai i ngaa mahi a Uenuku-kai-tangata ki ngaa mahi o te Matua nui i te rangi, a Ihoa-o-ngaa-mano. I eeraa waa hoki, he nui ngaa Atua e kiia nei oo raatou ingoa ko Uenuku, ko Kahukura, ko Uenuku-kai-tangata, ko Oouenuku.

E haangai puu ana hoki he koorero ki te horapatanga o ngaa akoranga me ngaa maatauranga ki te ao. E peenei ana te whakamaaramatanga o te whiti i runga i ngaa koorero ake. Ko toona rite e kiia nei, ka puta ki te wheiao ki te ao maarama, e kiia nei hoki ka poo, ka ao, ka awatea. Ko te aata noho tau hoki o te tangata i te ao. Ko ngaa momo whata hoki o te ora e noho nei te tangata ki roto i te ao.

I runga i te rite a ngaa tikanga o ngaa koorero. Ko te whakarewanga ake o ngaa maatauranga ki runga ki te rangi, ki te ao raanei, aa, kaaore i rerekee atu i te whiti tuaiwa. Moo te aahuatanga ki ngaa koorero e mea ana ko tawhito i whea e tohu ana i te ahunga mai o ngaa waananga i whea. E tohu hoki ana i te ahunga mai o ngaa mea katoa i whea hoki.

Ko ngeenei koorero he maramara koorero e whakamaarama ana i te tuaapapa o teenei whakapono. I naa te huhua o ngaa koorero kei ngaa karakia e taaea ana ki te tuhinga whakapae kotahi. Ka maatua i konei ngaa koorero whakaamaratanga. Ko te uho, ko te ito kua takotoria.

3.7 Te Reo me ngongoona tikanga

I konei ka aata tirohia te momo o te reo Maaori i whakamahia e oo taatou tuupuna. He mea nui ki ahau teenei waahanga o te tuhinga i runga i te mea ko te momo o te reo i whakamahia hei taarai i ngeenei karakia he momo kaaore e kitea ana i ngeenei raa. Ko te reo Maaori ka kitea, ka raangona, ka koorerotia i ngeenei raa kaaore i te hanga rite ki taa te reo o ngoo taatou tuupuna.

Hei taa (Totorewa, 2021), he reo tawhito te reo Maaori kei ngeenei karakia, aa, he reo karaipiture tahi. Ko reo whakapapa hoki teeraa e kitea nei i runga i toonaa tuitui i a taatou te tangata ki ngaa Atua. Ka kiia hoki e (Totorewa, 2021), ko te reo Atua te momo o te reo kei a ngeenei karakia hoki. Kauaka i te mea e karakiatia ana ki ngaa Atua kaaore, eengari kee too te tikanga o ngaa kupu, ko te whakapaparanga o ngaa kupu. He kupu whakahaangai i te momo o te Atua, i te Atua raanei.

E kiia nei he reo Atua hoki i runga i te mea e koorero ana moo ngaa Atua Maaori. He reo taketake teeraa, he reo tawhito noo mua mai i te reo o te tangata. Hei taa (Totorewa, 2021) ko te reo Haariki teeraa e koorerohia nei. Ko te haa o ngaa Ariki. Me he maarama taatou te tangata ki ngaa kupu me te reo o roto i ngeenei karakia he tohutohu ngoona. Ko taua tohutohu e mea ana me hoki ki uta. E whakarite ana teeraa takotoranga koorero ki te tangata ake, aa, maana hei huritao whaiaro i a ia anoo.

Koia hoki te wairua o roto i ngaa karakia nei. He whaiwhakaaro ahatia te takenga mai o te whakaaro i whea. E ai ki a (Totorewa,2021) i roto i ngaa uiui kaaore i te peeraa rawa te nui o ngaa taangata e moohio ana, e maarama hoki ana ki te hohonutanga o ngaaa koorero me te reo o roto i ngaa karakia nei. Ahatia teenei ehara i te mea me maarama te tangata ki te reo o roto, i te mea he reo wairua hoki teenei, he whakapono wairua hoki teenei. I whakauu a (Toka, 2021), i ngeenei koorero hoki.

Hei taana kaaore ia i te tangata maarama ki te katoa o te reo me ngoona tikanga, ngoona whakamaaramatanga engari ko te wairua o ngaa kupu me te reo o roto e maarama puu ana ki a ia. Ko te waa e tino maarama ana aa wairua nei e Mahana Toka ki ngaa reo o roto i ngaa karakia nei ko te waa e taki haere ana ia i ngaa karakia nei.

Hei taana, hei taa (Toka, 2021) he reo aataahua te reo o roto i ngaa Kura, i teenei whakapono. Ko ngaa momo kupu whakarite noo taua waa tonu ka kitea, ka raangona. Ko te whakarite i te tangata ki te taiao, te taiao ki te tangata anoo hoki. Wheenei i taa (Totorewa, 2021), he reo Atua te reo. Kauaka i runga i te tikanga o ngaa kupu noa iho, engari i runga i toonga haangai.

Hei taa (Kereopa, 2021), ko te momo o te reo i eetehi waahanga o ngaa karakia, o ngaa kura raanei kaaore i te peeraa rawa te hohonu. Ko te waahanga e koorero mai naa e ia ko te reo i tiikarohia i ngaa karakia a Te Uahaumeene. Ko taua waahanga e mea ana “rire rire hau.” Ko taua waahanga he mea whakauu i ngaa koorero o roto tonu i te pairepa, aa, he reo karaipiture.

Hei taa (Kereopa, 2021), he hononga whakapapa hoki taa te reo e mau nei ki ngaa kura. Hei taana hoki, hei taa (Kereopa, 2021), maa te tangata anoo ngaa maaramatanga o ngaa kupu me te reo o roto e kimi. He peeraa hoki ki taa (Totorewa, 2021) i mea, me hoki ki uta. Ko te huritao whaiaro teeraa ka puta i teenei o ngaa reo.

Katoa ngaa koorero moo te aahuatanga ki te reo o ngaa Kura, o ngaa karakia, o teenei whakapono e kiia nei he reo Atua. I reo Atua mai i runga i toona whakahaangai ki te hanganga mai o te ao mai i te kore. I Atua mai i runga i toona whakatakotoranga. I Atua mai i runga i te reetootanga o te tikanga a ngaa kupu.

I Atua mai i runga i ngaa kupu whakarite, i runga i toona rere, i runga i ngoona tohutohu, i runga i te wairua o te reo ka rongu nei te tangata. Ka uua te kite i te reo wheenei, ka uua te rongu i te reo wheenei hoki. Ki aaku whakaaro he mea nui teenei reo i te mea koia teenei he huarahi e hono ai i a taatou te tangata o te ao kikokiko nei ki ngoo taatou tuupuna, ki ngaa Atua hoki. He aha koa te nui o te maaramatanga ki ngaa kupu, te moroiti raanei o te maaramatanga ki ngaa kupu, ko toona wairua i a te tangata e taki nei i ngaa kupu i te karakia hoki, he wairua ka rongu. He taketaketanga ka rongu. He Atuatanga ka rongu.

Koia i rerekee hoki ai taa taatou reo Maaori ki ngaa reo puta noa i te ao. He aataahua too taatou reo. He reo rangatira.

3.8 Whakakapi upoko

Maa roto mai i te upoko nei kua tuhura atu, kua whakatakotoria te tuuaapapa me te ahurewa o teenei whakapono te Tariao, te Paimaarire. Mai anoo i te oorokohanganga mai o te Kiingitanga me ngoona kaupapa taunaki i ora ai, aa, e ora tonu nei, e haapai tonu nei i too taatou whakapono. I naa hoki ko ngaa momo tikanga a Kiingi Taawhiao i tirohia wheenei i ngaa tuuranga Tariao me ngaa tuuranga Ngehe. He mea i maataakitia e taea ai e maatou o mohoa noa nei te whakauu ki roto ki ngaa maatou mahi. Hei whakakitenga atu o te anganga whakamua o teenei whakapono.

Ko ngaa Kura e toru i pania ki teenei upoko e kitea ai ko te aataahua o te reo i oo taatou tuupuna. E kitea ai ko te aataahua o te whakaaro o ngoo taatou tuupuna me taumata o te whakaaro i a raatou e puta wheenei ai he whakapono, he Kura i a raatou. Ko te manako hoki i ahau i te kitenga atu o te tangata i o taatou Kura, karakia raanei, he puutake whakaohoho ka pihi ake ai.

Kia ora ai to taatou whakapono haere ake nei haere ake nei. He taipitopito whakamaarama noa iho taaku i rapa moo te Kura o te Ahiahi ki teenei upoko.

Kaaore hoki i taea te whakatamarahi i te katoa o ngaa koorero me ngaa whakamaarama i runga i te rangiwhaawhaa o ngaa koorero me ngaa whakapaparanga e mau nei ki teenei Kura haaunga ngaa Kura katoa. Heoi he hui kaimanawa i kitea ake ai, maapihi maurea i kitea ake ai, he kuaha i puaretia ki ngaa whatumanawa o ngoo taatou tupuna. Kei whea hoki mai he tuuaahua i tua atu he ahakoa te iti o te ngohi, he rei aa roto. Koia raa ko te momo o te reo i tirohia. He reo Atua, he reo wairua, he reo haariki. Ko toona otinga iho e kiia nei he reo Maaori, he whakapono Tariao.

Upoko Tuawhaa: He toi ora, he toi ahu mai Hawaiki

4.1 Kupu whakataki

I teeraa upoko i titiro whakataatare ai au ki te whakapono ake. Koia ka papa pourewa i ngaa koorero te haere nei. He koorero moo te whakamoe, te taamemehatanga raanei i tau ki runga ki teenei whakapono me ngaa pierenuku ngoona, o te whakapono e rongu tonu nei. Mai i te waa o ngoo taatou tuupuna tau ki runga ki a maatou i naaiane.

Ka tirohia ko te ohonga ake o te whakapono nei me ngaa momo takahanga i para e ngaa Rangatira wheenei nei i a Te Puea kia ora tonu ai teenei whakapono me ngoona maataapono e aarahi nei ia taatou. Ka tirohia hoki ko ngaa taapaetanga o Te Rangamaheuheu i maaturuturu mai ki runga ki teenei whakareanga e ora hoki ai teenei whakapono. Ko ngaa huarahi i takahia, ko ngaa tikanga i waihangatia e Te Rangamaheuheu hoki taaku ki teenei upoko. E tare mai ana ko ngaa upoko takitaki koorero e eke ai, e ea ai te waahanga ki teenei panepane koorero, panepane rangahau.

4.2 Te moe

E whaatoro ana ngaa koorero a (Papa, 2014) ki te waa i whakamoea e Taawhiao i ngaa karakia Paimaarire. I whakamoea i runga i te aahuatanga a te whakamahinga o te iwi i ngaa karakia o te whakapono Paimaarire. I tahuri atu te iwi ki te karakia ki a Taawhiao ake, kaaore nei i takutaku atu ki ngaa atua e tau pai ai te oranga me te maaramatanga ki runga ki ngaa iwi i pae ki runga ki te mata o te whenua.

I konei, i eenei aahuatanga o toona iwi ka whakamoea e Taawhiao ngaa karakia me teenei whakapono i roto i te tongikura. Ko taua tongikura i kiia ake ai e Kingii Taawhiao koia ko teenei, “E te iwi ko teenei taonga ka whakahokia ki ngaa pae maunga, ki te toimaha koutou tiikina atu maana koutou e whakaora.” E whakauu hoki ana a (Toka, 2021), i ngeenei koorero. I runga i te okiokinga o ngaa karakia me te whakapono i mahia mai e Kiingi Taawhiao, koia teenei teetehi o ngaa taapaenga i mimiti, i mooioio ai te whakapono Tariao. Kei waanangatia te uho a teenei tongi, ka pihi ake ai te maaratanga he aha i wheenei ai ngaa whakaaro me ngaa koorero i puta.

Ngaa marama i pau ki te karakia i ngaa karakia i heke, i runga i ngaa tohutohu a te tongi koorero. Ngaa raa i pau ki te karakia i ngaa karakia i taataka, i runga i ngaa whakahau a te tongikoorero. Ngaa haora i pau ki te karakia i ngaa karakia i tuumatapoongia i runga hoki i taua take kua koorerohia. Naa te iti a te iwi whakamahi i ngaa karakia ka itiiti haere nei te whakapono. Haere te waa haere te waa, haere ngaa tau haere ngaa tau whakauu i ngaa kupu a Kiinga Taawhiao ka torutoru noa nei ngaa taangata e moohiotia ana, aa, e mahara hoki ana ki ngaa Karakia. Ahatia te tongi a Taawhiao, tee hiahia, tee manako i a ia ngaa toimahatanga i hua mai i taua waa, i teenei waa hoki.

Moo te aahuatanga ki te oranga o te whakapono me ngaa karakia i teenei waa tonu nei, hei taa (Totorewa, 2021), i te torutoru noa o ngaa Tariao, ngaa taangata moohio ki te kawe i ngaa kura me ngaa karakia, kua kurumemeha te oranga o te whakapono nei. Araa noa he taangata wheenei nei i a Rahui Papa, i a Taonui Campbell, i a Tukuroirangi Morgan, i a Tame Moana e moohio ana ki te kawe i ngaa kura. Ngaa taangata hoki i aakona ki ngaa waananga o Te Rangamaheuheu, aa, i puta Tariao mai. Ahakoa teeraa, o te whitu tekau maa waru mano uri o Waikato, e kore teenei whakapono me ngoona karakia e ora i te rua tekau, i te toru tekau taangata, aa haere ake nei, haere ake nei.

Ko ngaa koorero a (Kereopa, 2021), i te waa i tatau atu ai ko Te Arikinui Te Atairangikaahu ki te torona tapu i noohia ngaa Kiingi o te poo, araa noa ngaa panonitanga me ngaa whakarua tikanga ki oo te whakapono aahua. Ko ngaa waa e karakia ai ngaa karakia teeraa, ko wai maa te hunga e taea ana te taki i ngaa Kura teeraa, ko wai e taea ana te whakaako, ko wai hoki e taea ana te ako.

Heoi anoo, ko ngeenei panonitanga hei taa ngaa Tariao kua koorerotia e au, ko te whakahaangai i ngaa tikanga ki te waa o te Ariki koia e noho nei ki te torona tapu te huarahi e ora tonu ai te whakapono Tariao. He rerekee te nohoanga a Kiingi Taawhiao teenaa i te nohoanga a Kiingi Mahuta. A Kiingi Te Rata ki a Kiingi Koroki. A Te Arikinui Te Atairangikaahu ki a Kiingi Tuheitia hoki. He rerekee, naa konei ka kiia, me haangai ngaa tikanga ki te waa o te ora, e ora tonu ai. Wheera hoki ki te kiianga e mea ana ‘me takahi ngaku tikanga kia ora anoo ai ngaku tikanga’.

Ka moe ko Te Arikinui Te Atairangikaahu, ka ara mai ko Kiingi Tuheitia Pootatau Te Wherowhero VII ki toona torona tapu. I takahia e ia te ara i takahia toona Whaea.

He panonitanga, he whakarua tikanga ki oo te whakapono me ngaa karakia te mahi. Hei tauira, aua atu i oo te whakamahi i ngaa Kura ki ngaa uhunga noa iho, wheenei nei i te waa e ora ana te Kuini, ka whakamahia hoki inaaiane tonu ko ngaa Kura kauaka ki ngaa uhunga noa iho engari ki ngaa kaupapa e hira ake ana. Aua atu i oo te ako i ngaa pakeke noa iho, kauaka ko ngaa tamariki i ngaa kura wheenei nei i te waa o te Kuini, he nui ngaa Koohanga Reo, ngaa Kura Kaupapa Maaori, Wharekura hoki o mohoa noa nei e whakaako ana i ngaa Kura Tariao ki a raatou tauira. Ko Te Wharekura o Raakaumangamanga raatou ko Ngaa Taiatea Wharekura, ko Te Wharekura o Kirikiriroa, ko Te Wharekura o Te Rau Aroha eeteahi e mahia mai ana i ngeenei akoako.

I runga i te mea ko ngaa hiahia me ngaa wawata o too taatou Kiingi te kaiarataki i ngaa maatou mahi, aa, me te mea hoki e manako ana ia kia ora tonu teenei whakapono, kia tahuri atu maatou ngaa uri o te Kiingitanga ki te whakarauora i teenei taaonga. Kia kotahi anoo te panga atu o te reo o ngoo taatou tuupuna puta noa.

4.3 Te whakaarahia o Te Puea Te Kirihaeae Herangi

Ko teeteahi i haapai ake i te whakapono Tariao me ngaa karakia taea noatia ki te whakauu i ngaa kupu a Kiingi Taawhiao ko Te Puea Herangi. Hei taa (Papa, 2014), naa Te Puea Herangi teenei whakapono i whakarauora i te waa i a raatou e tohetohe ana ki te kaawana, e kore ai e riro ko ngaa taane e noho nei i raro i ngoona whakamarumaruru ki te pakanga tuatahi o te ao (King, 1997). Koia teenei te waa i noohia ai a Te Puea Herangi me tana iwi ki Te Paina raanoo.

Ka puta te koorero e haere atu ana ko ngaa pirihimana me ngaa mema o te kaawana ki te tiki atu i ngaa taangata e takahi nei i te ture hei taa te Paakehaa. Ko te takahi ture Paakeha e koorerohia ana ko te kaupare atu i te tono kia haere ai ngaa Taane ki te pakanga o te ao. I te rongomanga ake o ngaa minita me ngaa pirihi moo te haeretanga mai o ngaa Pirihimana ki te tiikaro i ngaa taane e karo atu ana i te ture kawe tangata, ka wehe raatou.

I wheenei hei taa (Papa, 2014), e kore ai raatou e paatata atu ki a Te Puea me ngaa taangata i aatete atu ki te Kaawana. I te taenga mai o ngaa pirihimana ki te kawe atu i ngaa taane kua kore he taangata e toe mai ana ki te taki i ngaa karakia maa te hunga whakapono nei.

I teenei aahuatanga i riro atu i ngeeteahi koroua tokorua ngaa karakia te taki, aa, ko ngaa karakia Paimaarire taa raaua i karakia ai.

I konei ka whakatauria e Te Puea kia noho mai ai ko ngaa karakia Paimaarire o te whakapono Tariao hei karakia maa maatou. Ko ngaa tikanga i whakatakotoria e ia ko te karakia i te whitu karaka i te ata.

Koia raa hei tohu i te tiimatatanga mai o te raa, te tiimatatanga hoki mai o ngaa mahi. Ko te whitu karaka hoki i te poo taana i whakatau ai hei waa karakia. Koia raa te tohu e whakaata nei i te mutunga mai o te raa me te mutunga mai o ngaa mahi. Ko te whitinga mai o te raa, ko te toonga mai o te raa.

Maa roto mai i ngeenei mahi me ngeenei whakatau a Te Puea, koia raa ko te whakauu i ngaa kupu i waihotia mai ai e toona koroua e Kiingi Taawhiao ki a ia. Ko taa Kiingi Taawhiao i kii ai, i te waa o te toimaha tiikina mai te taonga nei hei oranga maa koutou.

Ka rongo a Te Puea me tana iwi i ngaa paauaua me ngaa paahekeheke o te waa, i nanao atu a ia me toona iwi i te taonga i whakahokia ai e Kiingi Taawhiao ki te take o ngaa maunga e puta ora ai raatou i te poo.

Naa eenei mahi whakauu a Te Puea me tana iwi ki ngaa koorero a Kiingi Taawhiao, i tino ora ai teenei whakapono i a raatou. I ora ake teena i te ora i a te whakapono i mua mai. Koia teenei teetehi o ngaa taapaetanga nui i paa ki te oranga o te whakapono nei me ngoona karakia, ngoona nei kupu, ngoona nei akoranga hoki.

Tatuu iho raa ki ngaa tikanga i whakaritea mai e Te Puea. He tikanga eenei e whaaia tonutia ana e maatou o mohoa noa nei. Ngaa kaupapa huhua puta noa i a Waikato, ngaa kaupapa Kiingitanga hoki wheenei nei i ngaa poukai, i ngaa Koroneihana, i ngaa Riiketa, i ngaa raa Kiingitanga, i ngaa tangihanga puta noa i a Tainui Waka i te motu hoki, i ngaa nohoanga marae te aha noa raanei, ko ngaa tikanga i mahia mai e Te Puea, ngaa tikanga aarahi i a maatou moo te aahuatanga ki te karakia.

I te whitu karaka i te ata ko te hikinga teeraa o ngaa kara, aa, ko te waa karakia hoki teeraa ahakoa te kaupapa. Ki konei karakia ai te Kura o te Awatea me te Owahaowha. I te whitu karaka i te poo, ko te hekenga iho o te kara teeraa, aa, ko te waa karakia hoki teeraa ahakoa te kaupapa.

Ki konei karakia te Kura o te Ahiahi me te Owahaowha. Araa noa ngeetehi rerekeetanga e haangai nei ki ngaa tikanga karakia kua panonihia i roto i waa heoi, me peewhea e kore ai. Ka hoki ki aua koorero o ngaa Tariao i uiuitia ai e au, ko te whakahaangai i ngaa tikanga ki te waa o te Ariki koia e noho nei ki te torona tapu, koia raa te huarahi e ora tonu ai te whakapono Tariao.

I te korenga o ngeenei taapaetanga a Te Puea me ngaana anoo mahi whakauu, whakahau kua tino kore nei taa maatou whakapono i ngeenei raa. I runga i aana mahi, he whakapono tonu taa maatou, he karakia hoki aa maatou. He ahakoa kaaore nei teenei whakapono i te ora peeraa me toona ora i ora ai teenei whakapono i toona ohinga, moo te aahuatanga ki te nui o te tangata e moohio ana, e maarama ana hoki ki ngaa karakia te momo o te ora taaku e koorero nei, me whakapuumaui tonu taatou, me whakamomori tonu taatou kia ora anoo ai teenei taonga horopuu. He taonga horopuu i heke iho mai i ngoo taatou tuupuna. Ka maatua i konaa teetehi take o ngaa take manomano me whai tonu maatou i ngeenei mahi.

4.4 Te Rangamaheuheu

Moo ngaa mahi taapae ki te whakarauora whakapono, whakarauora karakia hoki o mohoa noa nei, kaaore i koo atu i a Te Rangamaheuheu. Hei taa (Totorewa, 2021), i whakatuuria e ia teenei ohu waananga i te tau 2013 ki te whakapakari ake i te hunga taane e toomina nei kia noho ai raatou ki ngaa paepae koorero o ngoo raatou marae ake.

Kia toki ake ai raatou ki te whaikoorero, ki te tauparapara, ki te whakapapa, ki te tuitui i ngaa maataawaka o te motu ki te Kiingi, te tuitui i te rangi ki te whenua me aua momo aahuatanga katoa. I peeraa hoki moo te aahuatanga ki ngaa waahine, ehara i te mea he waananga noa teenei i aro ki te ira taane, engari kee ia i poowhiritia hoki te ira wahine. I waenga puu i ngeenei waananga i aro nui ai raatou ki ngaa Kura.

I waanangahia ai ko ngaa kupu me ngoona tikanga, i waanangahia ai ko te whakatakotoranga o ngaa Kura, i waanangahia ko te aahua o te kawehoki i ngeenei karakia. He maahere rautaki teenei i whakaritea ai moo te rua tekau maa rima tau te roa hei taa (Totorewa, 2021). I te otinga iho o ngaa tau rua tekau maa rima ka puta matatau ngaa taangata i waatea mai ki teenei ohu waananga a Te Rangamaheuheu.

Puuaawai mai he kaikorero, he kaikaranga e waatea hoki ana ki too taatou Kiingi. Naa runga anoo i te mooioio, i te rawakore hoki o te tirohanga o te paepae o taua waa i karangahia te Kiingi ki a Te Rangamaheuheu kia whakakiikii i ngaa whaaruarua. Naa konei, aa, naa teenei tononoo a te Kiingi i mutu ngaa waananga o Te Rangamaheuheu. I mutu i runga i te nui o ngaa kaupapa hei kawehi, i runga i te nui o ngaa whaaruarua hei whakakii. Ko teenei tononoo a te Kiingi i puta i te tau tua rua o ngaa waananga a Te Rangamaheuheu.

Heoi anoo, i roto i ngeenei tau e rua, e whitu ngaa Tariao i ara mai i te rua. Ko te tuuranga Tariao taaku e koorero nei. He tangata e taea ana te kawehi i ngaa karakia, aa, he maaramatanga hoki oo raatou. Ko Mahana Toka teeraa, ko Jason Kereopa teeraa, ko Morehu Bishop teeraa, ko Don Turner teeraa, ko Erin Paki teeraa, ko Harley Raihe, ko Brad Totorewa hoki teeraa.

Ahatia te nui, te iti raanei o ngaa Tariao i puta i a Te Rangamaheuheu, he nui ake i oo te kore. E koorero wheenei ana taa te mea kaaore hoki he waananga i whakahaerehia e teetehi hei whakanguunguu i te reanga e hiia ake ana. Kaaore he kura maa raatou, kaaore hoki he kaiako. Koia i hirahira ai a Te Rangamaheuheu. Ko te ngaakau whakauu ki ngaa kupu a Kiingi Taawhiao taa raatou i whai.

Ko teetehi o ngaa tino taapaetanga hoki a Te Rangamaheuheu ko ngaa poo karakia i whakaritea, i mahia mai ai e raatou. He kaupapa i whakatuuria i runga i te mea ko ngaa karakia Tariao, Paimaarire hoki kaaore i peeraa rawa te nui o te whakamahi i te waa o te ora, o te hari me te koa.

Ko ngaa kaupapa hirahira me ngaa waa e toimaha nei te iwi ngaa waa i whakamahia mai ngaa karakia. Me te pai hoki o aua mahi, hoi anoo, ka tika kia karakiatia i ngaa karakia i te waa o te ora hoki. Ko eenei poo karakia, poo wairua i tuu ki runga o Tuurangawaewae marae me te wharekarakia i Hopuhopu. Koia hooki teenei teetehi o ngaa kaupapa i taapae ki te ora o te whakaponohi, ki te ora o too taatou Kiingi hoki, me te iwi i tae atu.

4.4.1 Whare wairua

Ko teetehi o ngaa panonitanga i mahia mai, i koorero hoki e (Totorewa, 2021), ko te whare wairua. Ko teenei whakaaro i ahua mai hei taa (Totorewa, 2021), i a ia anoo. Me peewhea e aata ea ai i a ia te whakarauora anoo i teenei whakapono. He tohu i tau ki runga ki a ia, he tohu wairua ki te waihanga, ki te whakarite i teetehi whare wairua e tau ai te kaahui whakapono.

Ko te kaahui whakapono ki aana anoo koorero ko te iwi ka tatuu atu ki te karakia, kauaka ko te iwi tira whakahaere karakia. I runga hoki i te takotoranga me te raupapatanga o ngaa mahi o ngoo taatou Whare Waananga tawhito o roto mai i a Tainui kua ingoa keetia, i whakaaro ake hoki ia me peewhea e taea ai e maatou te too mai i ngaa maataapono o te ao tawhito ki roto ki ngaa whakahaerengaa o ngaa karakia e kawea nei i eenei raa. He maataapono i apohia kia whakariterite i te tangata ki te whakawhiwhi atu ki ngaa hua me ngaa maaramatanga o ngaa Kura ka karakiahia.

Hei taa (Toka, 2021), i raupapatia te whare wairua kia rite ki too te whakatakotoranga me te nohoanga o ngaa pou pou e tuu ai teetehi whare. Koia teenei teetehi o ngaa tauira i tauratia ai e ngaa Kura tawhito o Tainui. Naa, ko te Paepae te pou tuatahi, toomuri mai ko te Pou mua, toomuri mai ko te Taapenakara, aa, ko te Pou roto, ko te Poutokomanawa, ko te Poutuaarongo te otinga iho. Ko te tino tikanga o te whare wairua me ngaa taangata whakakii i aua tuuranga Pou he mihi ki te iwi.

Ko te whakakipakipa i te iwi, ko te tuku i ngaa kupu e waatea ai te hirikapo, e makere ai ngaa toimahatanga o te waa, kia mauri tau, kia mauri paihere i te tapu o ngaa koorero ka koorerohia. Kei ia pou ngoonaa anoo koorero, ngoona anoo mihi, ngoona anoo Wairea e whakatutuki ai te waahanga whakariterite. Ka tae ki te Poutuaarongo, te whakamutunga o ngaa Pou, ko ia hoki te Tariao moo te poo.

Heoi anoo, tae rawa ki a ia, kua rite hoki tana wairua me tana mauri ki te kawea i te Kura. Noo reira he huarahi, he rautaki raanei teenei hei whakatau i te katoa i mua tonu i te takitakinga o te Kura. Kia kotahi atu ai ko ngaa whakaaro katoa ki roto ki te karakia. Koia toona tino, koia toona puutake whakaohoho.

I eenei taapaetanga a Te Rangamaheuheu kauaka ki te whakapono Tariao noa iho, eengari ngaa taapaetanga ki ngaa tikanga i makere mai i ngoo taatou tuupuna, ngaa taonga hoki i waihoo mai hei manaaki maa taatou, kua ora ake eenei tuaahua teenaa i o raatou ora i mua noa atu. Koia me mihi ki a Te Rangamaheuheu moo te Kiingitanga.

4.5 Whakakapi Upoko

Ko te waihanga o teenei upoko, he whakatakoto iho i ngeetehi koorero moo te taamemehatanga o te whakapono nei hei taa te nui o ngaa taangata, te iti raanei o ngaa taangata e whakauu ana i te whakapono e karakia hoki ana i ngoona karakia.

I horahia hoki ki teenei upoko ngeetehi i taapae atu ki te oranga, ki te whakaoranga, me te orangatonutanga o teenei whakapono. Ko aa raatou huarahi, ko aa raatou rautaki, ko aa raatou tikanga i whakaritea mai, ngaa tikanga hoki i panoni, i huri kia haangai ki te waa. E hirahira ana ngeenei koorero i runga i te mea koia nei ngeetehi huarahi ka tuu hei tauira whakarauora maa maatou ngaa uri e hiia ake nei. Otiraa, ko te oranga tuu teenei te haere nei i te upoko e whai ake nei.

Upoko Tuarima: Teena purutia too iwi

5.1 Kupu whakataki

Kua kitea i te upoko tuawhaa ngaa piki me ngaa heke o te oranga o te whakapono Tariao. I konei i te upoko tuarima ka tirohia te oranga tuu o te whakapono Tariao, o te Paimaarire. Ko ngaa hapuu o roto kei waho hoki o Waikato, e pupuru tonu nei ki ngaa karakia me te tapu o teenei whakapono ka raarangihia. Ko ngaa marae o roto o aua hapuu hoki teeraa ka rapa ki eenei koorero. Ko ngaa uri hoki o ngeenei marae e tauira mai ana i te ngaakau uu, ngaakau whakapono ki te kaupapa. Ko ngaa tuutohu koorero e tutuki ai teenei upoko e iriiri ana.

5.2 Te oranga tuu

Mai o te waa o Kiingi Taawhiao ko te oranga tuu o teenei whakapono i noho ki roto ki te kapu o ngaa ringaringa horapa i ngaa iwi o te motu. I tau hoki ki roto ki ngaa hapuu kua koorero keetia e ahau i te upoko tuawhaa. I naa hoki he nui noa atu ngaa Tariao, aa tuuranga nei taaku e koorerotia ana i aua waa. He nui noa atu hoki ngaa Ngehe i a te waa o Tiria koia raa i aarahi i ngaana anoo apataki. Kei whakaarohia e taatou ki taua waa, ko te tiketiketanga teeraa i eke ai teenei whakapono, i runga i te huhua o ngaa taangata a ngaa iwi me ngaa hapuu i mahia katoatia i teenei whakapono.

Moo te waatuu, kei aa ngaa hapuu me ngaa marae o roto i a Waikato me ngeetehi uri a Maniapoto e whakauu nei i ngaa maataapono Tariao. Wheenei hoki me ngaa uri a Te Kei o Te Waka Tainui, ko raatou ngaa tino e taawhia tonu nei i te oranga tuu o te whanakapo Tariao. E kii wheenei ana i runga i te mea koia teenei ngaa iwi me ngaa hapuu e whakamomori ana kia ora tonu ai teenei taonga. Ma roto mai i whakangungu, te whakaako, me te whakamahi i teenei whakapono ka ora, ka tuu tonu aa haere ake nei haere ake nei.

5.2.1 Ngaa Hapuu me ngaa Marae

Hei taa (Totorewa, 2021), ko teetehi o ngaa hapuu kua roa nei e kawe ana i teenei kaupapa te Tariao, te Paimaarire ko Ngaati Koroki Kahukura.

Mai o te waa o ngaa tohunga noo taua hapuu e pikau ana i teenei kaupapa, tau rawa iho mai ki te waa i a taatou he tohunga tonu noo taua hapuu e ora tonu mai ana, aa, ko Rahui Papa teeraa e koorerotia nei.

I a raatou, i a Koroki Kahukura ka tere tonu te ia rere o te wai ki Ngaati Mahanga ki te rua o te Taniwha i a Tuheitia, koia teenei Te Papa-o-Rotu marae kei te whenua. Ko Morehu te puuteetere mau tonu ki ngaa kupu kei te whakapono hei arahitanga mngoonaa moo toona whaanau, hapuu, marae hoki. Hei taa (Kereopa, 2021), ka whakamau te titiro, ka kaikanohi atu ki a Ngaati Wairere te nohoanga kainga a Hukunui me oo raatou uri.

Ko te whaanau Puke he whaanau ka koorerotia whaanuitia e whakamomori atu ki te whakahau kauaka noa iho i te Kiingitanga engari ngoona maataapono wheenei i te Tariao, i te Paimaarire hoki. Ko Ngaati Mahuta i kiia ai he hapuu kaha ki te whakapuumau i te kaupapa e koorerotia ana. Ko Turangawaewae Marae me taa raatou kaakaa haetara e kiia nei toona ingoa ko Ikimoke Takerei. Whiti atu ki Raahui Pookeka kei whakamau mai ki te aroaro e ko Waahi Paa me Taane-i-te-pupke e tuu nei. I konei hira mai raa ko ngaa uri taahekeroa wheenei me Erin Paki raatou ko Mahana Toka, ko Jason Kereopa ngaa apataki o Te Rangamaheuheu, ngaa Tariao moo ngoo raatou whenua taurikura.

Kaaore nei i matara atu i a raatou ko te whakarauikatanga o ngaa hekenga a Ngaati Naho kei te takapuu o Waikato. I naa raa te whakapaparanga e mea ana, i a Naho ka puta mai ki waho ko Pura, naana ko Te Pou, i naana ko Tipene Te Pou, naana ko Tukarawa Te Pou, naana ko Te Whiunui Tukarawa, naana ko Te Hiwa Whiunui, i a ia ka puta mai ki waho ko tooku kuia e kiia nei toona ingoa ko Parehiwa Whiunui, naana ko tooku Paapa ko Brad Totorewa, aa, ka puta mai ki waho ko ahau ko Te Oko Horoi Totorewa.

Ko ngeenei tuupuna ooku, ngeenei taatai whakaheke mai oo te takiwaa i ora ai a Te Whiunui Tukarawa he tangata whakauu ki ngaa kupu a Taawhiao. Katoa he tangata whakapono ki te Tariao me ngoona katoa.

Ehara i te mea koia eenei ngaa hapuu me ngaa marae noa iho o roto i a Waikato kei te whakauu me te whakamahi i te Tariao nei, ko ngaa huaanga o roto i te Puaha o Waikato, wheenei me Ngaati Kaihua o te Marae o Tauranga-nui, whiti atu ki Ngaati Aamaru e noho mai naa ko Te Awamaarahi marae.

Whiti atu ki te raki raanoo ko Te Aakitai o Makaurau Marae, o Puukaki Marae taea noatia ki Te Puea marae e tuu mai naa ko te Whare o Te Puea. Mai o te raki ka heke whakateraawhiti ka tau ki Ngaati Kuiaarangi, ki Ngaati Tai, koia raa te nohoanga kainga a Taniwha marae me ngaa raatou uri. Ka heke ka heke ki a Ngaati Ahuru e aamai nei ki runga ko Ngaa-Tira Marae. I konei ka huri ki te taitonga, aa, koia raa ko Ngaati Rora, koia raa ko Te Tokanganui-a-noho Marae e hii mai nei te rangatira e kiia nei toona ingoa ko Taonui Campbell.

Ko Taonui teetehi o ngaa whakamutunga i ako ki ngaa rekereke o ngaa tohunga wheenei me Hone Haunui maa. I oo te tonga ka huri ki te hauaauru me ngoona marae maha, me ngoona hapuu huhua e mau tonu ana ki te Tariao.

5.2.2 Waikato tangata

Ko te oranga tuu o te whakapono Tariao kei a ngeenei hapuu, kei a ngeenei marae me ngoo raatou uri. Heoi anoo, araa ngeetehi uri e ora tonu mai ana i teenei waa tonu e taapae nuitia ana ki te oranga tuu, ki te oranga mauroa o te Tariao. I whakaarohia kia whakaingoatia ko raatou ki teenei tuhinga whakapae i te nui o taku kauanuanu atu ki a raatou me ngaa mahi e mahia mai ana e raatou moo te too maatou iwi a Waikato, me oo maataou maataapono, whakapono hoki. Kua koorerotia keetia ko te nuinga hoia anoo a raatou mahi, kaaore anoo kia koorerotia.

Ko Rahui Papa kei te matamata o hiiri. Kaaore nei he tangata i tua mai i a Rahui moo te moohio ki te whaanuitanga o ngaa koorero o Tainui waka. Ko ia te kaipupuru i ngaa koorero tuku a too taatou waka me too taatou iwi. Kua roa nei a Rahui e whakakuuene ana kia ora tonu ngaa taatou koorero me ngoo taatou tikanga, whakapono hoki. Ko teetehi o ngaa kura waananga e whakahaerehia ana e Rahui e kiia nei toona ingo ko Te Pae Kaaka. Koia teenei teetehi kura waananga moo ngaa taangata matatau i roto i a raatou tiknga. Me teenei kura raataou e matatau ake ai.

Ko ngaa akoako o roto, he akoako tuutohu whenua, he karakia, he waerea, he whakapapa, he whaikoorero, karanga, he ako me te waananga hoki i ngaa kura Tariao. Koia noa iho teetehi o ngaa huarahi e whakamahia mai ana e Rahui kia ora tonu ai too taatou whakapono Tariao.

Toomuri mai i a Raahui ko Jason Kereopa raaua ko Mahana Toka. Teenei tokorua e honu manawa rahi ana kia ora ai too taatou whakapono. He Tariao, he taanga moohio ki te takitaki i ngaa Kura hoki.

Aa, moo te aahuatanga ki te taki i ngaa kura, kaaore he painga i tua atu i a raaua. Ko Jason Kereopa he tangata whakahaere, waihanga hoki i ngaa momo hootaka reo puta i te iwi o Waikato moo ngaa uri o Waikato.

Koia teenei teetehi huarahi e ora tonu ai too taatou whakapono me ngaa taatou tikanga taketake, reo taketake hoki. Ko Mahana Toka teetehi ki too Rahui Papa taha e whakahaerehia ana ngaa waananga Paimaarire moo ngaa marae puta i a Waikato. Me whakaingoa, me whakamihi hoki ka tika i te tokorua nei kei te whakatuaraa i teenei whakapono kia ora mai ai ki taa te ururoa, kua ki taa te wheke.

Nei me ngaa waioha, nei me ngaa mihimihi ki taku rangatira ki a Morehua Bishop. He tangata kua roa e whakaako ana i ngaana anoo tauira o Te Wharekura o Rakaumangamanga ki ngaa karakia o te Paimaarire. Kei te hia te nui o ngaa tauira o taua kura kua puta moohio, kua puta maarama mai ki ngaa karakia i ngaa akoranga a Morehu. Koia hoki teetehi o ngaa Tariao i puta mai i Te Rangamaheuheu.

He tangata aarahi i ngaa karakia ka tuu i ngaa poo wairua moo too taatou Kiingi i ngaa waa o te mauiuu, i ngaa waa o te ora hoki. Kaaore nei he tangata manawanui, manawatitikaha teena i a Morehu moo te oranga tuu o te Tariao, o te Paimaarire.

Me whakamaanawanawa ka tika i taku Paapaa i a Brad Totorewa. Kua kii keetia ko ia te tangata naana nei a Te Rangamaheuheu i hiimata ake ai. Koia hoki teetehi i noho ki too ngoo taatou kaumaatua taha ki te aata waananga i teenei kaupapa te Tariao, te Paimaarire hoki ki a raatou hui Ngaa Marae Toopu. He tangata whakarauora i ngaa tikanga o te Paepae o roto i a Waikato me ngaa hui huhua kei a maatou wheenei me te Poukai, wheenei me te Koroneihana hoki.

He tangata kaha ki te whaangai i ngaana anoo waananga me ngaana anoo tauira ki ngaa reanga te haere mai nei, kauaka i roto i a Te Rangamaheuheu noa iho, e ngari he whaanui he whaarahi ake i taua punua tangata. He kanohi kitea ki ngaa kaupapa Kiingitanga katoa, he kanohi aarahi

i te hunga whakapuumau ki te Kiingitanga me ngaana maataapono katoa, me ngaana whakapono katoa hoki.

Katoa ngeenei kaka haetara, katoa ngeenei Taniwha he tino o roto i too taatou iwi o Waikato e taapae ana ki te oranga tuu o too taatou whakapono, aa, ka tika, me mihi i a raatou.

5.3 Whakakapi upoko

I teenei upoko i taakina ake raa i te oranga tuu o teenei whakapono me ngaa hapuu, marae, tangata hoki kei a raatou teenei haepapa. Moo te oranga tuu o teenei whakapono, te orangatonutanga hoki o teenei whakapono anei te hunga maa raatou teenei taonga e kawe ki tua, e kawe ki tawhiti whaamamao. Heoi anoo, maa taatou katoa teenei haepapa e hiki. I naa raa te koorero a Kiingi Taahwiao, “Ko koe ki teetehi kiwai o te kete, ko ahau ki teetehi kiwai o te kete.” (Kirkwood, 2000, p. 83).

Upoko Tuaono:

Ka pai

6.1 Kupu whakataki

Kei teenei upoko ko ngaa koorero e rohe ake ai teenei tuhingaroa, teenei tuhinga whakapae. Ka koomuri te titiro ki oo ngaa koorero, ki oo te paatai matua i rapa ki teenei tuhinga, aa, ka whakautua atu. Ko te pae huaki kei tawhiti ka whakamaua mai kia tata, aa, ko ngaa whaaaititanga ka whakamaua mai ki tina.

6.2 He hokinga whakamuri

I waahia ake te uru tapunui o taku rangahau i te upoko tuatahi. Ko ngaku kaupapa matua teeraa i whakatakotoria wheenei nei i te puutakenga mai, i te oorokohiimatanga o te whakapono Tariao me ngoona anoo karakia. Matua raa, ko te rawea, ko te herenga o ngaa koorero, ngaa whakapapa, ngaa tukuihotanga o te whakapono Tariao me ngaa karakia Tariao ki te whakaoranga o Waikato tangata. I meatia hoki teneki upoko ki ngaa whiwhia me ngaa hua e manakohia ana ka puta i teenei rangahau.

Ko te oranga tonutanga o teenei whakapono teeraa te hua matua e hiahiatia ana. Maa te taawhia tonu ki ngaa koorero a Taawhiao, maa te whiri hoki ki ngaa tawhito, ki ngaa hereherea, ngaa momo tikanga o te whakapono nei e eke ai ngaa hua. Ko te aata maarama ake ki te reo me ngaa koorero o roto i teenei whakapono me ngoona karakia teeraa kua hua mai ai i te pae. Ko te takahanga rangahau o Te Whare Tongikura i hahau ki a te upoko tuatahi hoki hei arataki i ngaku mahi me taku tuhinga.

Aa, ko ngaa kete o te waananga, ko Taawhaki teeraa i kapi ake i ngaa koorero i konei. Mngoona te maatauranga i tau mai ki runga ki a maatou te tangata e noho nei i teenei ao tuuroa nei. Koia raa te takenga mai o ngaa maatauranga kei te Whakapono Tariao.

I te upoko tuarua ko Tainui waka i tere mai i Hawaiki raanoo me ngaa koorero moo te hanganga mai o teenei waka i taarai ki teenei upoko. Koia hei tohu i te takenga mai o ngaa uri a Tainui, a Hoturoa i whea, heke iho mai ki a Kiingi Taawhaio. He riponga koorero moo Waikato awa, Waikato iwi, Waikato tangata e maanaaki nei i te mauri o te Kiingitanga hei painga moo te

motu. I naa raa ko te Tariao, ko te Paimaarire te whakapono Matua o te Kiingitanga, aa, e waatea ana teenei whakapono ki ngaa uri o te Kiingitanga. Ko Taawhiao raaua ko Te Ua Haumeene i paiheretia ki konei me ngaa koorero onamata e paa ana ki a raaua whakapono e mahia tonutia ana e maatou ngaa uri o mohoa noa nei. Koia hoki teenei te whatinga mai o te puutaketanga o te whakapono Tariao.

I ekeniga teenei upoko tuatoru ki ngaa huinga takatuunui oo rangi. Koia raa te tarenga mai o ngaa Pane Ariki kei poo uriuri, kei tohi oo whakauenuku. Mai oo te mauri tuatahi o te tika, ka heke ka heke ki aa te tuarua i te tuatoru i te tuawhaa i te tuarima i te tuaono, aa, ka tau ki too taatou Kiingi, ka tau ki te Kiingitanga.

Ko te puna kai, ko te Poukai i horahia i konei i runga i toona taapae ki te oranga o te Tariao. He kaupapa whakamahia, he kaupapa whakangungua i teenei whakapono. Ko te whakapono ake teeraa i wetewetehia me ngoona tikanga, ngoona anoo kura hoki. Ko te whakamaarama i te Kura o te Ahiahi e hinaatore mai a hiiri ki ngaa koorero whakaraakeiora e mau nei ki teenei taonga horopuu.

Ko te whakamaaori i te momo o te reo Maaori i oo taatou tupuna hoki he pehonga tirohanga. Wheenei me ngaa momo whakapaparanga, ngaa momo taatai whakaheke ki ahau, me tooku whaanau he aahuatanga i tiro. Ko toono tohu i taku hongo taatai nei ki teenei whakapono.

Ko pakaritanga, ko te aupiki, ko te auheke, ko ngaa whakaaraara, ko ngaa whakarauoratanga kei konei kei ngaa upoko tuawhaa, tuarima hoki. Koia teenei te waahanga o ngaa koorero e kite ai taatou i te momo o te ora o teenei whakapono, aa, mehemea raanei kei te ora tonu. He aha hoki, maawhea hoki e ora tonu ai teenei taonga hei painga maa ngaa uri.

6.3 Te paatai matua

Ko te paatai matua o teenei tuhinga e whai ake nei,

- Ka whai waahi raanei te Tariao i roto i ngeenei raa?

Koia teenei te paatai i tau ki te upoko tuatahi o teenei tuhingaroa. Inaa hoki ko taku whakapae kei reiraa kei te upoko tuatahi e mea ana i whakatuuria te Tariao ki te aakinga i te oranga mai

o te tangata. Ko te oranga a tinana teeraa, ko te oranga a hirikapo teeraa, ko te oranga a wairua hoki teeraa.

He kaupapa teenei i whakatuuria e Kiingi Taawhiao hei kaupapa atawhai i te iwi. Hei taa ngaa rangahau kua horahia katoatia ki ngaa upoko kei teenei tuinga, mai oo te pikihanga ake a Taawhaki ki ngaa rangi e riro mai ki a ia ngaa kete o te waananga koia e mau nei ki teenei whakapono, ko oranga te uho, ko te oranga te ngako, ko te oranga te matuu o teenei whakapono.

Naa raa he toopuuranga whakapono teenei e nanao atu ana ki ngaa taketaketanga o ngoo taatou tupuna Maaori, ngaa akoranga kei ngaa kura tawhito, ngaa maataapono hoki o te atua nui i te rangi o Ihoa o ngaa mano.

Ko teenei whakapae i tautokona maa te ruku ki te reetootanga me te whakautu hoki i ngaa i aapitihanga i raarangitia i te upoko tuatahi teenei te haere nei.

- He aha te puutakenga mai o te Tariao?
- Ka whai hua raanei te Tariao i roto i ngeenei raa?
- Te mimiti haere o te Tariao, he aha ai?
- I ora mai te Tariao i te aha?
- Ko wai maa ngaa iwi, hapuu kaha ki te whakapuumau i te Tariao?
- He aha Ngaa Kura Tariao, he aha hoki te momo reo ka whakamahia?

Maa roto mai i te wetewete i ngaa aapitihanga ko te puutakenga mai o te whakapono Tariao teeraa i tuhura mai. He paanga ki a Te Uahaumene, ki a Kiingi Taawhiao, ngaa uri o te raupatu, ngaa uri o ngaa riiriri whenua. He kaupapa, he whakapono teenei i mahuta ake i te rironga atu o te whenua, i te rongomanga ake o ngaa whakahaawe o te waa. He whakaaro i mahuta ake kia tau mai ko te rangimaarie, te rongomau me te kotahitanga ki runga ki te iwi.

Ko ngaa kaupapa o roto i a Tainui waka, i a Waikato iwi, i a te Kiingitanga hoki wheenei i ngaa puna poukai, wheenei i te Koroneihana, wheenei i ngaa poo karakia poo wairua hoki koia e whakamahia mai ana i teenei whakapono Tariao.

Ko te taamemehatanga o teenei whakapono, aa, he aha i taamemeha ai, i aituu ai nuku, i aituu ai rangi ai teenei whakapono teeraa i totohu ki te upoko tuawhaa. Ko ngaa putanga o te

totohutanga a te kaupapa nei me hea whakamahia mai e Kiingi Taawhiao. I whakamoea e ia te whakapono nei maa te tongikura.

Naa te whakapono me te whakauu a te iwi ki ngaana anoo koorero, i mooioio, i hiimata ake ai hoki te mimiti haere o te whakapono. I wheenei a ia i runga i te momo o te whakamahinga o te iwi i ngaa karakia o te whakapono. A, haere te waa, ko te aahuatanga ki te iti o ngaa taangata e moohiotia ana, i mahara hoki ki ngaa karakiao taua waa taea noa mai ki a taatou o mohoa nei, kaaore tonu i te peeraa raw ate nui o ngaa taangata e moohio katoatia ana ki te hohonutanga o te whakapono me ngaa karakia kei te whakapono nei. Ko te huri o te waa, ko te huri o te tai, ko te huri o ngaa tikanga, ko te huri o te whakaaro hoki ngaa tino taapaetanga i mimiti kau te whakapono nei.

Ko toona whakapakaritanga i pakari anoo ai teenei whakapono me ngaana karakia he mea takea mai i a Te Puea i toona waa. Naanaa ngaa tohutohu, naanaa anoo ngaa tikanga whakaora, whakamahi hoki i ngaa karakia me te whakapono nei i whakatakoto i whakaritea mai hoki. Koia raa in oho hei tauira moo ngaa taangata onaaianeie whaiwhai haere ana i te tauira i tauratia ai e ia, e Te Puea.

Ko ngaa taangata wheeraa me ngaa apataki o Te Rangamaheuheu, ngaa kaupapa wheenei i te Poukai, te Koroneihana me ngaa huihuinga Kiingitanga, ngaa iwi wheenei me Waikato, me Maniapoto, ngaa hapuu hoki naa raatou i puaawai mai anoo teenei whakapono e whai nei i te ara takahanga i para e Te Puea.

Ko ngaa kura he whakapapa, he taura whiritoi i a taatou te ira tangata ki ngaa atua mai oo te kore, ki a Rangi raaua ko Papa heke iho mai ki ngaa raaua tamariki. Ko te reo he reo atua hoki, he reo whakapapa hoki. He reo tawhito nuku tawhito rangi, he reo karaipiture, he reo taiao. He reo whakarite, he reo tauwehe. He reo maama, he reo kaaore hoki nei i te maama. I te mutunga iho, koia teenei te reo Maaori, koia teenei te reo o ngoo taatou tupuna.

6.4 Te herenga ki te whakaoranga o Waikato tangata

Ko te herenga o teenei whakapono ki te whakaoranga o Waikato tangata he herenga kurutauaawhiro. I runga i ngaa putanga o te rangahau nei, kua kitea te hiranga ake o te puutakenga mai o teenei whakapono me ngaa tikanga, ngaa tauira, ngaa taonga horopuu kei roto kei teenei whakapono me ngoona karakia.

He herenga e kore e motu e kore hoki e rohe. He whakapono arahai i te whakaoranga aa hinengaro, aa tinana, aa wairua, aa taatai whakapapa, aa tikanga, aa reo, aa maatauranga, aa taiao, aa toi, aa kawa hoki. Koia teenei ngaa momo aahuatanga kua koopani pohapoha nei a Kiingi Taawhiao ki teenei whakapono kotahai hei huarahi ki te ora me te rognomau, hei huarai ora ki te aroha a teetehi ki teehei, hei ruarahi ki te kotahitanga.

He whare wairua teenei naa Kiingi Taawhiao i waihanga hei oranga mau roa maa ngaanga anoo uri me ngaa tangata whakapono ki ngaa atua, ki te kaupapa Kiingitanga anoo hoki. Hei taa (Papa, 2013), koia teenei te whakapono o te Kiingitanga, naaraa e waatea mai ana teenei whakapono ki ngaa uri a te Kiingitanga. Ae, ko Waikato tangata teeraa e koorerohia ana inaa raa ko Waikato ngaa kaitiaki o te Kiingitanga, oi anoo, ko te Kiingitanga naa te motu whaanui noo reira teenei whakapono e waatea ana ki ngaa uri a te Kiingitanga kei ngaa whaapito katoa o te motu.

Hei whakaoranga kauaka moo Waikato anahe engari moo ngaa uri whakapuumau, whakapono ki te Kiingitanga. Koia raa ko te koorero a Kiingi Taawhiao e mea iho nei, “Teenei ahau taa koutou whanaunga he hoa aroha ki ngaa iwi, ki ngaa haahi katoa.”

6.5 Te pae huaki

Ko te oranga tonutanga o teenei whakapono te pae huaki e wawatatia ana, e manakotia ana hoki. Ko toona ora ko te ora o ngaa koorero kei roto kei teenei whakapono me ngaana karakia. Ko toona ora ko te ora o te reo kei roto kei teenei whakapono me ngaana karakia. Ko toona ora ko te ora o ngoo taatou tikanga me ngaa taatou kawa e whakamahia mai ana i roto i teenei whakapono me ngaana karakia.

Ko toona ora ko te ora o ngaa whakapapa, o kei roto kei teenei whakapono me ngaana karakia. Ko toona ora ko te ora o ngaa taonga horopuu me ngaa tukuihotanga kei roto kei teenei whakapono me ngaana karakia. Kei ora tonu ai teenei whakapono, kei ora tonu ai ko te mauri me te tapu o te Kiingitanga. Mai anoo i te mauri tuatahi o te Tika, heke, heke iho mai ki te mauri tuarua i te te tuatoru i te tuawhaa i te tuarima i te tuaono ka tau ki runga ki te Kiingi Maaori, te Kiingi Tuawhita a Tuheitia, te taahuhu-matapu o te iwi Maaori.

Hei taa ngaa Tariao i uiuitia, kaaore hoki ngeenei koorero i tawhiti atu i a raatou. Ko te toomina kia ora tonu ai teenei taonga haere ake nei haere ake nei. Maa whea? Ko te huarahi e ora ai teenei taonga, teenei whakapono ko te whakaako i a taatou uri maa roto mai i ngaa akoranga taketake i whaia ai e ngoo taatou tupuna. Kauaka aa kupu noa iho, engari kee ia te reetootanga o ngaa maaramatanga me ngaa taura o roto i ngaa kupu me ngaa karakia. Koia teenei te huarahi.

E noho nei taatou i teetehi ao e mimiti haere nei ngaa taatou koorero tuaaurirui, tuaawhiowhio. Kei noho, kei whaiwhai tonu taatou i teenei ahuatanga koia ngaro, ko taamatemate kauaka ko teenei taonga ake, engari ko too taatou Maaoritanga, ko too taatou Waikatotanga, ko too taatou Tainuitanga. Naa konei ngaa Tariao, ahau hoki e kiia nei, taawhia rawatia ki teenei whakapono, whakaakonaria e ora tonu ai ko ngaa taonga o roto.

6.6 Ngaa whaaititanga

Ko te whaaititanga matua o teenei rangahau ko te rapu i ngaa rawa, ko te rapu pukapuka, ko te rapu whaarangi ipurangi, ko te rapu kiriata, ko te noho taratahi, ko te rapu tohunga matamau hoki e mau nei i a raatou ko ngaa koorero me ngaa maaramatanga o te whakapono Tariao. I runga i te mea kaaore nei i te peeraa rawa te ora, kaaore hoki nei i te peeraa rawa te nui o ngaa tohunga tariao e ora tonu mai ana e moohio hoki ana ki ngaa teenei whakapono, kaaore hoki i te peeraa rawa te nui o ngaa koorero moo te kaupapa nei. Ahakoa he huhua noa atu ngaa iwi i whai paanga mai ki te whakapono Tariao, ko ngaa taangata i uiui noo roto mai i a Waikato ake.

Ae, i runga i te mea ko Waikato te iwi e kaha whakauu nei i teenei whakapono. Teetehi aapitihanga ki teenei wero, ko te korenga o te raangai Tariao wheenei me Taonui Campbell, Tukuroirangi Morgan, Raahui Papa, Ruakere Hond, Tame Moana i whai kupu mai, i uiuitia i runga i ngaa whakawai o te waai engari, kei te oha atu.

I runga i ngaa peehitanga o te waa e huri taiaawhio ana i te ao i noho taratahi ai taatou te iwi whakapono i a taatou anoo. Koia i mahue mai ngaa reo o eetehi tangata moohio. Ahakoa hoki teena, ko ngaa iwi i whai paanga mai kua tahuri atu ki ngaa momo whakapono atu i oo te whakapono Tariao.

Ehara hoki i te mea ko te nuinga, engari ko te maha o ngaa koorero e mau nei ki ngaa pukapuka naa Tauwi i tuhi. I mate ahau ki te matapaki me te wetewete i ngaa koorero a Tauwi kia tau mai ko te maaramatanga Maaori ki runga ki a hirikapo. Ko ngaa pukapuka hoki he pukapuka Kiingitanga e tirohia ana te ora o ngaa Kiingi te me Kuini i te waa i a raatou. E pakupaku noa te waahanga ki te whakapono Tariao.

Ko ngaa whaarangi ipurangi i tirohia he whaarangi e whakaaturia ana i ngaa koorero noo ngaa tau 1850. Ko toona uauatanga ko te paanui i ngaa koorero inaa raa he reo rua ngeetehi kupu. A, ko ngaa kiriata i tirohia he kiriata rawe, oi anoo, he moroiti noa iho nei.

6.7 Kupu whakakapi

Ka hoki anoo ai ki ngaa koorero a Kiingi Taawhaio “Rahi ake taku hari kia koutou e uu nei ki ngaa whakahaunga tika a te atu te ariki kaha rawa koia nei te Kiingi korooria. Teenei ahau taa koutou teina e tuari ana ki ngaa mea ngaro o too Matua. Teenei ahau taa koutou whanaunga he hoa aroha ki ngaa iwi me ngaa haahi katoa. Kia rite koutou ki te kukupa teharakore, kia maa te me hukarere. Kia manawanui ki a raatou e whakapouri nei i ngaa koutou ngaakau. Kia tuohu atu ki a Ihoa i roto i oo koutou whare.”

Kei ngaa nui, kei ngai roa, kei ngai papa kei ngai te hurumanu, anei he koorero e takoto iho nei hei koorero taapae atu ki te whakaoranga, ki te oranga me te oranga tonutanga o too taatou taaonga, too taatou whakapono ahakoa te iti o taku ngohi.

Matua Paimarire Tamati Paimarire Wairua Paimarire

Kororia ki te paata kooti te paata Paimarire

Kooti taana Paimarire Koti horikoti Paimarire

Rire rire hau Paimarire

Nгаа Whakapuakanga

Ballara, A. (1996). *Te Kingitanga* (Illustrated ed.). Auckland University Press.

Biggs, B., & Jones, P. T. H. (2005). *Nga Iwi o Tainui: The Traditional History of the Tainui People/Nga Koorero Tuku Iho o ngaa Tuupuna* (New edition). Auckland University Press.

Clark, P. (1975). *'Hauhau': The Pai Marire Search for Maori Identity*. Auckland University Press.

Duffie, M. K. (2000). *Through the Eye of the Needle: A Maori Elder Remembers (Case Studies in Cultural Anthropology)* (1st ed.). Wadsworth Publishing.

Evans, J. A. & Te Awamutu Museum. (1994). *Uenuku*. Unknown Publisher.

Forbes, T., Trustees, M. M., Douglas, E. M. K., & Davis, T. A. (1986). *Te Tumu o Tainui: a commemorative souvenir of the opening of Te Tini o Tainui dining hall*. Maketu Marae Trustees.

Frood, J. (1994). *Parihaka*. Elizabethan Promotions.

Gorst, J. E. (1863). *Te Pihoihoi mokemoke i runga i te tuanui*. I taia ki te Perehi o te Kura.

Grace, J., & te H. Grace, J. (2005). *Tuwharetoa*. Reed Business Education.

Hamilton Public Library (Hamilton, N.Z.), Gregory, D., Rollo, G., & Hamilton Public Library (Hamilton, N. Z. (1997). *Wiremu Tamihana*. Hamilton Public Library.

Houston, J. (1965). *Maori Life in Old Taranaki*. Reed Business Education.

Te Hurinui, T. P., & Society, T. P. (2010) – cf: Jones, P. Te H. King Pōtatau: An Account of The Life of Pōtatau Te Wherowhero, the First Māori King. Wellington: Polynesian Society, 1959.

- Te Hurinui, J. P. T. (2013). *He tuhi mārei-kura = Ngā kōrero a te Māori mō te Hanganga mai o te Ao Nō ngā whare Wānanga o Tainui*. Aka & Associates.
- Jones, P., & te Te Hurinui Jones, P. (1945). *Mahinarangi (the Moon-glow of the Heavens)*. J.C. Ekdahl.
- King, M. (1977). *Te Puea, a Biography*. Hodder and Stoughton.
- Kirkwood, C. (1999). *Koroki, My King*. Penguin Random House.
- Kirkwood, C. (2000). *Tāwhiao: king or prophet*. MAI Systems.
- Kirkwood, C. (2001). *Te Arikiniui and the millennium of Waikato* (1st ed.). Turongo House.
- Maori King Country Sacred Pact Committee (N.Z.). (1950). *Te Kingi Kanatere Ohaki Tapu me to Komihana Raihana*. Maori King Country Sacred pact Committee.
- Milbank, B., & Goldsmith, S. (2008). *Taranaki Whenua*. Puke Ariki.
- Mullon, H. D. (1967). *An Index to The History of Taranaki by Benjamin Wells (1878)*. H.D. Mullon.
- Muru-Lanning. (2016). *Tupuna awa People and Politics of the Waikato River* (1st ed., Vol. 1). Auckland University Press.
- New Zealand. Māori Language Commission. (1991). *Nga whatiwhatinga*. Te Taura Whiri i te Reo Maori.
- New Zealand Ministry for Culture and Heritage. (2022). *Maori Peoples of New Zealand =: Nga Iwi O Aotearoa*. David Bateman.
- Nahi, H. (1891). *Ko te hikurangi Tainui whiti, 1891*. Advertiser Office.
- Phillips, F. L. (1995). *Nga tohu a Tainui =: Landmarks of Tainui: a geographical record of Tainui traditional history* (Vol. 2). Tohu Publishers.

- Pool, I. (2015). *Colonization and Development in New Zealand Between 1769 and 1900: The Seeds of Rangiatea*. Springer.
- Ra, M. (1999). *Ancestral Recordings of Tainui - Maku a Ariki Ko Atu Ma Io*. Mitaki Ra Publications.
- Ra, M., Wherowhero, P., Mitaki Ra, & Te Wherowhero, P. (2001). *Kingitanga*. Mitaki Ra Publications.
- Rauparaha, T. T., & Calman, R. (2021). *He Pukapuka Tataku i Nga Mahi a Te Rauparaha Nui / A Record of the Life of the Great Te Rauparaha* (Bilingual ed.). Auckland University Press.
- Stokes, E. (1983). *Pai Mārire and the Niu at Kuranui* (2nd ed.). Centre for Maori Studies and Research, University of Waikato.
- Takerei, M., & Thapa, J. (2008). *Ngā Tongi A tāwhiao*. Te Pou Taki Kōrero.
- Te Hokioi (e rere atu-na)*. (1922). Amsterdam University Press.
- Te kotahi rau e rima tekau tau o te kiingitanga (Ed.). (2008). *Te kotahi rau e rima tekau tau o te kiingitanga = The sesquicentennial of the kiingitanga, 1858-2008*.
- O'Malley, V. (2016). *The Great War for New Zealand: Waikato 1800-2000*. Bridget Williams Books.

Ngaa pae tukutuku

Kiingitanga. (2019, August 20). *Te Koroneihana o Kiingi Tuheitia Pootatau Te Wherowhero VII*. YouTube. Retrieved March 12, 2022, from

<https://www.youtube.com/watch?v=YG3ya1b9ztU&t=224s>

Radionz. (2021, February 11). *NZ wars: Stories of tainui | documentary | RNZ*. YouTube. Retrieved November 11, 2021, from

https://www.youtube.com/watch?v=lgZT0_8Hpw0&t=494s.

Te Karakia Hauhau. (1876, August 12). Paperspast.Natlib.Govt.Nz.

https://paperspast.natlib.govt.nz/newspapers/WANANG18760812.2.13?items_per_page=10&query=Tariao&snippet=true

To pot down paimarire fanatics . paperspast.natlib.govt.nz. (n.d.).

https://paperspast.natlib.govt.nz/newspapers/NENZC18650511.2.34?items_per_page=10&query=Paimarire&snippet=true.

University of Waikato. (2016, October 19). *University of Waikato Kīngitanga Day 2016: Te Paki o Matariki*. YouTube. https://www.youtube.com/watch?v=-9u_gOrKkbw

Wakahuiatvz. (2013, July 13). *Waka Huia - Pai Marire faith 14 July 2013*. YouTube.

<https://www.youtube.com/watch?v=WRaSfuXC-uk&t=1463s>

Wakahuiatvz. (2014, May 3). *The 150th anniversary of the land wars - the battle of rangiriri*. YouTube. Retrieved November 11, 2021, from

<https://www.youtube.com/watch?v=AjiK-NYOAEU&t=266s>.

Zealand, A. N. (2015, May 18). *Printed list of Māori prisoners taken at Rangiriri (1863)*.

Flickr. Retrieved November 12, 2021, from

<https://www.flickr.com/photos/archivesnz/17777674336>.

Nгаа uiui

Kereopa, J. (2021, September 06). Personal interview.

Toka, M. (2021, September 07). Personal interview

Totorewa, B. (2021, August 29). Personal interview.

Faculty of Maori & Indigenous
Studies
Te Pua Wānanga ki te Ao
The University of Waikato
Private Bag 3105
Hamilton, New Zealand

Dr Haki Tuaupiki
Phone +64 7 858 5017
haki.tuaupiki@waikato.ac.nz



Te Kāhui Manu Tāiko: Human Research Ethics Committee Faculty
of Māori & Indigenous Studies
Te Pua Wānanga ki te Ao

4 August 2021

Ethics Approval

Tēnā koe e te manu tāiko e rere atu nā i ngā huarahi o te rangahau.

This letter is to confirm that Te Okohoroi Totorewa has received ethical approval for the study, '**Tariao Whitiwhiti ora. He kura Tariao he kura whakapapa, te herenga ki te whakaoranga o Waikato tangata.**' The ethics application was reviewed by members of Te Kāhui Manu Tāiko and was signed off by the chair of the committee on 4 August 2021. Good luck as you embark on your research.

Mahia te mahi hei painga mō te iwi – Nā Te Pua Herangi.

Ngā manaakitanga.

Dr Haki Tuaupiki
Convener, Te Kāhui Manu Tāiko
Te Pua Wānanga ki te Ao
Te Whare Wānanga o Waikato
Faculty of Māori & Indigenous Studies
The University of Waikato


Consent form

Title: Tariao, whitiwhiti ora

Researcher: Te Oko Horoi Totorewa

1. I have read the 'Information Sheet' for this study and have had details of the study explained to me.
2. My questions about the study have been answered to my satisfaction, and I understand that I may ask further questions at any time.
3. I also understand that I am free to withdraw from the study at any time, or to decline to answer any particular questions in the study.
4. I agree to provide information to the researchers under the conditions of confidentiality set out on the information sheet.
5. I wish to participate in this study under the conditions set out in the 'Information Sheet'.
6. I would like my information: (circle option)
 - a) returned to me
 - b) returned to my family
 - c) other (please specify) ..
7. I consent to the information collected for the purposes of this research study to be used for any other research purposes.

Participant's Name:

Participant's Signature: 

Date: 29/08/21

Contact details: brad@ranginiri.com

Researcher's Name: Te Oko Horoi Totorewa

Researcher's Signature: 

Te Manu Tāiko
Committee

Te Whare Wānanga o Waikato Human Research Ethics
Private Bag 3105

Te Pua Wānanga ki te Ao
Faculty of Māori and Indigenous Studies
& Te Kotahi Research Institute

Hamilton 3240
Phone: 64-7-838 4737
E-mail: fmis@waikato.ac.nz



THE UNIVERSITY OF
WAIKATO
Te Whare Wānanga o Waikato

Consent form

Title: Tariao, whitiwhiti ora

Researcher: Te Oko Horoi Totorewa

1. I have read the 'Information Sheet' for this study and have had details of the study explained to me.
2. My questions about the study have been answered to my satisfaction, and I understand that I may ask further questions at any time.
3. I also understand that I am free to withdraw from the study at any time, or to decline to answer any particular questions in the study.
4. I agree to provide information to the researchers under the conditions of confidentiality set out on the information sheet.
5. I wish to participate in this study under the conditions set out in the 'Information Sheet'. 6. I would like my information: (circle option)
 - a) returned to me
 - b) returned to my family
 - c) other(please specify) ..

Participant's Name: Mahana Toka

Participant's Signature: _____

Date: 7 /9 /21

**Contact
details:** _____

mahana.toka@tainui.co.z

Researcher's Name: Te Oko Horoi Totorewa

Researcher's Signature:  _____

FMIS HREC - Research Consent Form 2017

Consent form

Title: Tariao, whitiwhiti ora

Researcher: Te Oko Horoi Totorewa

1. I have read the 'Information Sheet' for this study and have had details of the study explained to me.
2. My questions about the study have been answered to my satisfaction, and I understand that I may ask further questions at any time.
3. I also understand that I am free to withdraw from the study at any time, or to decline to answer any particular questions in the study.
4. I agree to provide information to the researchers under the conditions of confidentiality set out on the information sheet.
5. I wish to participate in this study under the conditions set out in the 'Information Sheet'.
6. I would like my information: (circle option)
 - a) returned to me
 - b) returned to my family
 - c) other(please specify) ..

Participant's Name: Jason Kereopa

Participant's Signature: *J.Kereopa*

Date: 6 / 9 / 21

Contact details: jason.kereopa@tainui.co.nz

Researcher's Name: Te Oko Horoi Totorewa

Researcher's Signature: *T. Totorewa*